

國民黨之回顧錄

國民黨之回顧錄序

自古中原板蕩之秋必有猾民巨奸乘時壟斷以爲利此其成備考之史策班若列星然未有以一二人之僞巧嘯聚黨侶劫天下之耳目以供其剝奪如國民黨之甚者也其嚙兪之性歷久仍頑此而不鳴鼓相攻則因循以往其謬托政黨之名實行盜賊之行必有未能暴於天下者故畧著其事蹟以爲後人鑑焉

民國初立綱紀墮地庶政散弛爭以黨會相尙其桀黠害羣者實爲同盟會同盟會何自始乎其原始於三合天地諸會創者爲孫文以革命爲幟而會匪其實質也武漢起義天下人心蠢然思動東南大吏不能保輯於是陳其美起於滬上黃興來自廣東群不逞之徒呼號叫囂攘臂豎旗各爲都督徒侶洶洶衆莫敢撓長江以南遂徧布同盟會之人物矣孫文自海外歸敢爲大言以詐騙爲恫嚇十七票自立爲大總統入據南京而同

盟會遂爲政府矣既假國家發號施令之機關迭作威福三月以還紕繆萬狀賣鑛送路聞者切齒彼所謂南京政府者敲剝民膏滅裂人道罕有倫比時人有言羣盜鼠竊狗偷死者不瞑目嗚呼豈虛言哉豈虛言哉

同盟會既爲政府恣其暴戾亦自知儻然不可終日也乃更名曰國民黨而自號於天下曰今日同盟會改組政黨曰國民黨者惟一之政黨矣於是盡取嚮之流氓猾盜爲黨員不足益以劣紳土棍猶不足益以游客訟師然猶以爲不足張其軍也乃益以據高位擁重兵之勢力以助之而民國元二年間國民黨人橫行於中國魚肉良善武斷鄉曲不肖者入國民黨如虎傅翼賢者不入國民黨無所逃死蓋中國社會抗拒不安之象未有如壬子癸丑間之甚者推原其故則國民黨寔爲禍魁

然此其毒中於社會者猶小其中於國家者則誠所謂創鉅痛深者也孫黃本無賴子耳一旦號爲元勳偉人則大肆其饕餮之求日叩政府之門

而婪索金錢焉非百萬即數十萬而其欲終不得饜於是危言虛聲百端挾制所索累億金錢輒復購運器械以謀反對中央李烈鈞跋扈於江西胡漢民盤踞於廣東屠殺無辜聚斂都會各擁重兵覬覦非望盡舉國家之寶藏人民之汗血供其一擲而且黨中議員分踞京外假人民代表之號橫行無憚視政府之行政若芒在背必破壞而後已故當時議會之錯亂無章爲天下笑而國民黨表裏相應務以淆亂政局爲心其險很實不可問嗚呼國人其思之當時慘黷之狀實有史以來之異聞其後卒至構成兵禍耗竭財力僅乃削平大難而吾國之元氣已彫喪殆盡噫嘻酷已夫國民黨之罪惡路人皆知吾今何必重爲叙錄及之然是非易殺時過境遷痛苦已失則一二無識細民或有忘其險譎而躬陷邪辟者故勿憚煩瑣重申事鑑以告國人纂輯既終乃復爲數言弁以傳之害群之馬不得不除是書之作豈得已耶

國民黨之回顧錄

民國三年仲冬編者識於都門悲天憫人之廬



國民黨之回顧錄總目錄

第一卷

序文

目錄

大總統命令

大總統布告

第二卷 紀事

南京臨時政府總統孫文私與外人訂立國家銀行合同之披露

粵同盟會強迫選舉之駭聞

同盟會與統一共和黨合併

湖南省耶湯沐邑耶

湖南大小元勳之最近動作

國民黨之回顧錄

工商總長竹槓政策之失敗

孫中山之外國信仰

國民黨之大笑話

叛黨最近駭人之舉動

誌割據江西之李烈鈞

李烈鈞誤國殃民之罪惡種種

湘省借款合同披露

胡陳之捲逃官款

追誌黃興在南京謀亂之始末

第三卷 電報

李烈鈞與國民黨本部往來密電

其一

其 二
其 三
其 四
其 五
其 六
其 七
其 八
其 九
其 十
其 十一
其 十二
其 十三

國民黨之回顧錄

其十四

其十五

其十六

其十七

其十八

其十九

其二十

其二十一

其二十二

其二十三

其二十四

其二十五

其二十六

其二十七

天津電

第四卷 公告

參謀陸軍部宣布亂黨罪狀通電

全國商界宣布亂黨五大罪狀

京滬贛人呼籲之通電

胡都督宣布熊克武十大罪狀

華僑代表沈智夫痛哭陳詞

何海鳴之宣言

第五卷 調查

調查第一件

國民黨之回顧錄

調查第二件

調查第三件

調查第四件

調查第五件

調查第六件

調查第七件

調查第八件

調查第九件

調查第十件

調查第十一件

第六卷 輿論

論同盟會無組織內閣之資格

論約法上總統之任命權及同盟會不宜再組織內閣

告亂暴專制之國民黨

黃克強專爲要錢來乎

亂事溯源

戡亂當清亂源

揭國民黨反對大借款之裏面普告國民

再揭國民黨反對大借款之裏面普告國民

斥徐謙布告國民之妖言

宋案之過去歷史

黃克強利用宋案之真相

刺宋案證據之研究

李烈鈞通電書後

論亂黨之罪狀

滬警痛言

論滬亂聲中宋案之真相

各省都督對於贛亂之態度觀

讀誅逆命令感言

岑黃之後來觀

論岑春煊之結果

爲亂黨與外人秘密事哀告國民

湘事豈猶可再誤耶

論孫文賣國之罪狀

駁孫文致某國人書

第七卷 外論

盜名誑世之孫逸仙

外報論孫中山之千變萬化

日人之責國民黨

論黃興爲川粵漢鐵路總理

外人之國黨觀

英報論亂黨事之一

英報論亂黨事之二

陰謀與道德

西報闢南北之謬說

法報對於二次革命之評論

西報對於贛亂之評論一

西報對於贛亂之評論二

西報對於贛亂之評論三

贛亂觀

上海西人戰事觀

西報論亂黨之人物

英人之上海治安論

英報對於孫文函件之批評

國民黨之回顧錄第一卷目錄

大總統命令

大總統布告

國民黨之回顧錄

國民黨之回顧錄



民國二年十一月四日 大總統解散國民黨命令

據警備司令官彙呈查獲亂黨首魁李烈鈞等與亂黨議員徐秀鈞等往來穆密鴻密各電數十件本大總統逐加披閱震駭殊深此次內亂該國民黨本部與該國民黨國會議員潛相構煽李烈鈞黃興等乃敢據地稱兵蹂躪及於東南各省我國民身命財產橫遭屠掠種種慘酷情形事後追思猶覺心悸而推原禍始實屬罪有所歸綜觀該逆等往來密電最爲我國民所痛心疾首者厥有數端一該各電內稱李逆烈鈞有聯合七省攻守同盟之議是顯以民國政府爲敵國二中央派兵駐鄂純爲保衛地方起見乃該各電內稱國民黨本部對於此舉極爲注意已派員與黃興接洽並電李烈鈞速據要塞以備對待是顯以民國國軍爲敵兵三該各電既促李逆烈鈞以先發制人機不可失並稱黃聯甯皖孫聯桂粵甯爲根據速立政府是顯欲破壞民國之統一而不恤四該各電既謂內訌迭

起外人出而調停南北分據指日可定是顯欲引起列強之干涉而後快凡此亂謀該逆電內均有與該逆本部接洽及該黨議員一致進行並意見相同各等語勾結既固於是李逆烈鈞先後接濟該黨本部鉅款動輒數萬復特別津貼該黨國會議員以厚資是該黨黨員及該黨議員但知擾亂以便其私早已置國家危亡國民痛苦於度外亂國殘民於斯爲極本大總統受國付託之重既據發現該國民黨本部與該黨議員勾結爲亂各重情爲挽救國家之危亡輕減國民之痛苦計應飭北京警備地域司令官迅將該國民黨京師本部立予解散仍通行各戒嚴地域司官各都督民政長轉飭各該地方警察廳長及該管地方凡國民黨所設機關不拘爲支部分部交通部及其他名稱凡現未解散者限令到三日內一律勒令解散嗣後再有以國民黨名義發布印刷物品公開演說或秘密集會者均屬亂黨應即一體拿辦毋稍寬縱至該國民黨國會議員既受

李逆烈鈞等特別津貼之款爲數甚多原電又有與李逆烈鈞一致進行之約似此陽竊建設國家之高位陰預傾覆國家之亂謀實已自行取消其國會組織法上所稱之議員資格若聽其長此假藉名義誠恐生心好亂者有觸即發共和前途之危險甯可勝言况若輩早不以法律上之合格議員自居國家亦何能以法律上之合格議員相待應飭該警備司令官督飭京師警察廳查明自江西湖口地方倡亂之日起凡國會議員隸籍國民黨者一律追繳議員証書徽章一面由內務總長速從行令各該選舉總監督暨選舉監督分別查取本屆合法之參議院衆議院議員候補當選人如額遞補務使我莊嚴神聖之國會不再爲助長內亂者所扶持以期鞏固真正之共和宣達真正之民意該黨以外之議員熱忱愛國者素不乏人當此盡去害羣即所以扶持正氣決不致懷疑誤會藉端附和以自蹈曲庇亂黨之嫌該國民黨議員等回籍以後但能湔除自新不

與亂黨爲伍則參政之日月仍屬甚長共和之幸福不難共享也除將據呈查獲亂黨各證據另行布告外仰該管各官吏一體遵照此令

又令近年以來國民黨之所謂黨畧大率改革政治之名行攘奪權利之實凡可以逞其野心者雖滅國亡種荼毒生靈亦所不惜其運動方法或以利誘或以威嚇或以詐取務使同種之人互相殘害而自爲狡兔三窟之謀其鼓吹之術或以演詞或以報紙任意造謠顛倒黑白利用一般思想單簡之青年一入彀中即爲所賣附和煽亂至死不明此等鬼蜮行爲即個人尙不能立身遑論治國查廣東湖南兩省爲該黨之根據地而暴民專制土匪橫行其痛苦亦甲於各省倘各省均如湘粵豈非成一暴民土匪之國更何言共和幸福該黨標其名曰國民而專以殘民爲事民與意違反良善者敢怒而不敢言本大總統爲顧全大局容忍經年靜盼默化潛移漸趨正軌乃近來體察情形該黨陰謀詭計層出不窮秘密機關

逐經發現本大總統何能寬容少數亂徒置四萬萬人利害於不顧不得已始有解散該黨之令但籍隸該黨之人或未察內容致歧途之誤入或牽於大勢類從井以救人倘因黨籍牽連淪於廢棄豈得謂平著各該長官留意考查其性情暴戾甘與逆謀固爲法律所不容如心術純正才具優長經此次解散之後仍可量才任使不得預設成見故意詆排並飭各縣知事誥械民人不得懷挾私仇藉端報復該黨人既經解散仍是公民須知有國而後有家有家而後有身當以愛國爲前提以危身爲炯鑑萬不可輕信煽惑以致害於爾國凶於爾家自貽伊戚將此通令知之此令

十一月四日大總統布告國民黨員及國會國民黨議員叛亂罪狀

本年七月江西湖口江蘇徐州等處首由逆魁李烈鈞黃興等勾結叛兵作亂旬日之間皖粵湘閩等省少數暴民互相煽惑事變猝發海內騷然國家危亡幾在旦夕本大總統其時方在臨時大總統任內爲救國救民

起見不得已而依照國家法律用兵定亂國軍所至甫四十餘日而內亂告平國家雖幸而未至於亡然每念及用兵省分被亂地方十室九空流亡載道商泣於市農號於野綜計吾國四萬萬哀哀無告之同胞所有身命之被亂兵屠戮遭害者當在數萬以上財產之被亂兵敲詐焚掠者當在數萬萬以上我國民自上年革命以來滿目瘡痍元氣未復所望忍痛須臾以購共和之幸福乃不意謬託二次革命者之爲禍更酷於往時也追原禍始誰實薦階我國民痛定思痛其亦知使我國民之顛沛流離於鎗林彈雨之中者爲國民黨黨員及國民黨議員乎查國民黨係由前同盟會於上年併合其他團體改組而成當該黨出現之日日本大總統方以爲既已一變其從來秘密結社之性質自當力循正軌與各政黨共圖國家政治之進行同受國家法律之保障詎料該黨黨魁黃興等竟借此號召黨徒潛謀破壞一年以來各省之擁兵跋扈形同割據籍端斂財有若

盜賊以致國家不能統一地方愈遭糜爛莫不出於該國民黨黨員然猶以或係個人行爲無關黨義政府對於該黨一意以國利民福相期雖有時委曲遷就亦所不恤本年七月十三日據臨時副總統兼領湖北都督事黎元洪電稱近日亂黨多借某黨名義勾結軍隊散給黨證作爲票布迭次破獲機關拿獲罪犯有某黨黨證收儲甚夥等語本大總統發布命令時明知副總統來電所稱某黨即係指該國民黨無疑然爲保全該國民黨名譽起見故雖明發詰誥之詞猶復默示包容之意一概未加深究原冀其翻然悔悟漸被自新或可共濟艱難勉爲大局及李烈鈞等僭竊湖口首倡內亂黃興在甯陳炯明在粵陳其美在滬柏文蔚在皖許崇智在閩程潛等在湘次第響應此外展轉附和稱兵構亂各地方其匪首及改設各該僞職亦無一非國民黨黨員本大總統猶以涇渭未必同源良莠不可無別雖黃興陳其美李烈鈞陳炯明柏文蔚皆係國民黨緊要之

人究竟該黨是否通謀現值戒嚴時期應即查明以憑按法辦理特於七月三十一日令行北京警備地域總司令傳詢該黨幹部人員如果不預逆謀應限令三日內自行宣佈並將隸籍該黨叛徒一律除名政府自當照常保護若其聲言助亂或籍詞搪塞則是以政黨之名義爲內亂機關法律具在決不能爲該黨假借等因旋據總司令呈稱據國民黨先後呈復到案初稱黃興等除名一節仍須決之大會方能發生完全効力幹部人員未便專行等語其迴護逆首之情昭然若揭旋於八月三日復稱黃興陳其美李烈鈞陳炯明柏文蔚除名一事理應由大會公決惟期限切迫一時不能召集大會今由幹部決定遵令除名等語而於黃興以外籍隸該黨之叛徒如作亂於江蘇地方之鈕永建李書城黃郛沈懋昭章梓冷遙洪承點何成濬沈葆義何海鳴詹大悲戴天仇汪碩王逸居正田桐白逾桓張光羲王憲章趙正平何嘉祿等作亂於江西地方之俞應麓賀

國昌林虎方聲濤蔡銳彭程萬劉世鈞等作亂於湖南地方之譚人鳳仇
鰲程潛程子楷蔣笠武陳強唐蟒周震麟等作亂於安徽地方之范光啓
龔振鵬祁耿寰胡萬泰等作亂於福建廣東浙江地方之許景智胡漢民
范賢方等作亂於四川地方之熊克武楊庶堪等並各地方之以國民黨
黨員名義驅迫長官乘亂獨立迭據各該都督司令電呈有案凡姓名事
實昭昭在人耳目而均未據一律宣布除名至於前在武昌等處以黨證
作爲票布所招致之各方匪類應如何迅速淘汰驅逐之處迄今延宕三
箇月之久更無一語涉及不知該黨幹部人員是何居心既於該司令限
令呈復時先後呈稱各節竟至若此矛盾閃爍則其始以黃興等五人之
除名諉諸大會公決及至三日限滿忽稱由幹部決定登報遵令除名此
外則猶熟視無覩顯係有狡獪之徒隱爲挾持操縱於其間即未聲言助
亂似此藉詞搪塞殊不足爲該黨非內亂機關及不預逆謀之証惟本大

總統始終以保全該黨名譽爲心一再容忍至於今日以爲苟屬法有可貸情有可原即躬蒙姑息之名亦不妨曲留該黨自新之地乃月前查獲逆首李烈鈞與國民黨議員徐秀鈞等往來鴻密穆密各電始悉此次內亂之蔓延實出於該國民黨黨員與國民黨議員所計畫種種隱謀言之令人不寒而慄如李烈鈞致徐逆秀鈞等江電內稱現值選舉告竣吾黨現占優勢如憲法問題總統問題擬不日派員赴滬與克強遜初溥泉諸公商議一切總統如屬之項城則鄙見以爲須採聯邦制等語又卅電稱本黨議員多已北上重要事件仍可到京再商爲善速與本部接洽分電一致進行等語又宥電內稱王查辦使兼管鎮守使事務雖云暫局王使即無他志然窺中央用意顯欲於揚子江重要口岸拒我兵權布置勢力請即赴本黨本部趕速設法來電催王赴京俾免鎮守機關長留中央得以利用等語又徑電內稱國會成立本黨議員一致進行烈鈞不敏當勉

隨驥尾挽此狂瀾等語又篠電稱本部需款甚急再撥四萬元接濟等語又稱本黨議員每員特別津貼洋百元希照撥等語此李烈鈞與國民黨本部及國民黨國會議員勾結之鉄証也至於國會議員徐秀鈞等致李逆烈鈞各電尤爲亂事起原如議員徐秀鈞王有蘭等致李逆烈鈞青電內稱七省聯合對付袁氏袁氏利用機會飭李純兵隊移駐武漢扼長江之要區布北兵之勢力此事全誤於黎氏之請兵故李氏乘間而入本黨對於此舉極爲注意已派員赴申與克強接洽等語又議員朱念祖致李逆烈鈞號電內稱黎氏悍然請兵中央近調李軍扼武漢矣我公聯合七省先發制人機不可失謹遵來示秘密進行等語又徐秀鈞致李逆烈鈞箇電內稱黎藉鄂亂急電請兵聞已派六師先發二師繼之明爲鎮鄂恐侵及贛望速防要塞以備對待等語又江電內稱孫黃二先生大計已定公宜速急籌洋五十萬元屆期接濟等語又文電內稱公倡七省聯合攻

守同盟同人悉心研究皖浙尤關緊要皖贛唇齒贛若以全力攻鄂皖必出師豫魯攻其必救又滬上英士力薄必得浙助可策萬全常恒芳凌毅等十二人公電柏公得覆如約楮輔成等十人曾致電杭垣浙之同志來電云朱督模稜兩可恐敗吾事並聞其密告袁氏必不得已以猛烈除之毋人負我等語又冬電內稱近來內訌迭起作速進行機不可失黃聯甯皖孫聯桂粵寧爲根據速立政府外人一出調停南北分據指日可定等語又魚電內稱事已萬急無可再俟歐陽等三君誰最可靠務宜及早密商某與有蘭侃羣密商意見相同乞早決定是要等語又蒸電內稱我公聯合七省攻守同盟中央或有意外舉動應預防再本部用項支絀粵督已允接濟十萬可否酌撥二三萬元議員補助費已借發等語又效電內稱本黨議員特別津貼已由本部支發粵已寄本部十萬元公助款尙餘二萬元張繼囑緩送等語又皓電內稱本黨現處於極危險地位省會聯

合會望督促進行若得人指揮或可矯正一二等語此國民黨黨員暨國民黨國會議員李逆烈鈞並黃興等勾結之鐵証也綜以上各電情形而論李逆既迭電接濟該黨本部巨款復特別津貼該黨國會議員推李逆等之處心積慮一則爲國會議員選舉該黨既占優勝必欲於憲法等問題貌襲聯邦各制以遂其破壞統一之狡謀一則以爲長江重要口岸該黨應占勢力必欲以駐兵等問題聯合攻守同盟以快其傾覆國家之毒計若非該黨議員內外一氣何以徐秀鈞等密致李逆各電一則曰先發制人再則曰以備對待而黎副總統請兵移駐武漢一層在政府純爲保衛地方起見乃電稱該黨對於此舉極爲注意並派員與逆首黃興接洽查核各該逆電係發於四五月之交是該黨亂謀醞蓄最久即未致僭竊湖口獨立而司馬心跡業已路人皆知其最爲狼毒者則莫如該逆徐秀鈞文電所謂全力攻鄂出師豫魯以爲攻其必救之謀冬電所謂速立政

府外人調停可定南北分據之局凡此諸端皆欲恃武力以蹂躪地方挾外力以動搖國本設或不幸言中恐亡國滅種之慘劇早演之於數月以前我國民之困苦顛連至今又不知其景象何若也夫國會爲最高立法機關議員又自稱國民代表該黨議員與李逆烈鈞等既已密電接洽爲本部一致之進行遂乃假借職權行挾制政府之詭計當李烈鈞等逆跡漸露之日正該議員等助長內亂之時擁兵者既跋扈以自恣擅權者復驕縱而加厲刁滑者潛赴南方躬預亂事陰險者盤踞國會力爲後援方本大總統下令免去李逆烈鈞之本官也天下稱快該黨獨不謂然於是隸籍國民黨之議員聯翩質問無一非與民國政府爲難明知免任職員統率軍隊爲本大總統約法上之特權而悍然不願約法之如何規定但苟有可以迴護亂黨者莫不侈然而爲種種之託詞當李逆烈鈞尙未免官之時如衆議院議員邱冠棻徐秀鈞王恒凌鉞王有蘭歐陽沂梁系登

王侃李積芳鄧元賀贊元等質問關於政府調兵聚集武穴案內則稱贛督既無獨立之確証中央何來進攻之傳聞謠呶繯紛易淆觀聽等語又議員蔡突靈蕭輝錦廬式楷黎尙雲田永正童杭時劉濂周震鱗朱念祖符鼎升燕善達等質問中央調遣軍隊集聚武穴案內則稱贛督李烈鈞熱心愛國政府蔽於莠說動生意見因滋猜忌據贛省議會刪電聲明獨立之說絕無影響究竟中央何事至有進兵武穴江西謬舉等語我國民試思該黨議員等對於江西獨立固明明力辨其誣中央調兵尤悻悻力指其謬願何以湖口首亂以所謂熱心愛國之贛督竟一變而稱兵構禍之暴徒國民即不責言該議員等恐亦無詞自解然此猶可諉之曰亂象未萌非局外人所能逆料也乃自李逆烈鈞免去江西都督本官而後於是該黨議員龔政馬如飛劉峯一石瑛張耀曾黃攻秦吳壽田鄭克莊詹調元溫世霖張于溥林文英王葆真丁超五彭學浚徐秀鈞賀贊元王有

蘭彭允彝羅永治歐陽振聲褚輔成王永錫董耕雲樂山張樹桐黃寶銘等則以李烈鈞免職政府種種舉動殊屬曖昧等語相質問矣議員鄧元文篤周歐陽沂王有蘭盧元弼程鐸黃格鷗林文英林英鍾凌鉞張瑞王定國陳時銓詹調元邵瑞彭羅永治曾幹楨陳九韶李積芳高旭辛際唐邵慶麟覃超秦廣禮等則以李烈鈞受事年餘輿論翕然大總統下免贛督之令倒行逆施之隱實爲欲蓋彌彰等語相質問矣議員文羣辛際唐盧元弼王侃歐陽振聲黃格鷗王有蘭曾幹楨丁惟汾陳策陳鴻鈞賀贊元等則以贛督已撤胡督繼去柏譚兩督撤易之消息且喧傳矣而聯名阿附政府之各省都督自若也此種政策將何以告國民等語相質問矣議員燕善達王觀銘劉濂蔡突靈謝樹瓊盧式楷蕭輝錦朱念祖田永正鄒樹聲湯漪黎尙雯符鼎升等則以李烈鈞免官對於此項命令深文周内或者別有用心等語相質問矣此外議員饒芙英李搢榮褚輔成羅永

慶羅永治盧元弼辛際唐王傑李根源趙潘屠寬張士才邵慶麟馬文煥
張大義周之翰陳九韶黃汝瀛張國浚凌品升李燮陽郭寶慈楊夢弼湯
松年丁惟汾張治祥杜凱元高旭詹調元丁洪超張秉文蘇祐慈盧宗嶽
司徒穎陳時銓易宗夔徐傅霖等則以關於副總統電告政府破獲機關
有某黨黨証一案而有質問議員高旭周珏林文英胡兆沂凌金駱繼漢
盧元弼葉夏聲茅祖權文群林玉麒俞鳳韶邵瑞彭汪建剛陳子斌傅夢
豪杭辛齋覃超王有蘭戚嘉謀馬如飛歐陽沂張秉文孫潤宇等則以政
府派員南下擾亂地方爲詞而有質問議員賀贊元羅永治鄧元陳子斌
辛際唐黃格鷗邱冠芳彭學浚盧元弼林文英王定國李維綸俞鳳韶梁
仲則戴書雲汪建剛歐陽沂鄒魯劉建一林英鍾文凱元曾幹楨王舒蘭
駱繼漢文羣王侃葉夏聲張樹桐梁昌誥凌鉞等則又以政府不撤赴潯
北軍爲詞而有質問以上原質問書之內容無一不以助亂爲張本本大

總統當時以戡定內亂爲急尊重國會爲心雖迭據報告該黨議員助亂情形而深維國家多故議院未可動搖故每遇質問之來仍飭國務院依法答復耿耿此心其所以委曲求全者可謂無微不至諒爲我國民所悉知乃該黨議員既利用其議員資格以曲庇作亂之逆黨復利用其同院資格以曲庇助亂之議員前次該黨議員張耀曾谷鍾秀等有議員保障法之提議原案僅此三條而其扶助亂黨破壞約法之詭謀昭然若揭充該黨議員張耀曾谷鍾秀等之用心不過欲假國會提案之職權陰行其助長內亂之毒計該項議案與其謂之爲議員保障法毋甯謂之爲內亂外患犯保障法此以證李逆烈鈞等往來密電此次南方亂事係出於該黨議員鼓吹一致進行於內而後該黨黨員乃能主張七省聯合於外實爲確鑿無疑天津警察於十月六日搜得人力車上皮包內何海鳴與其黨首函中有假托賊政府軍隊肇釁英俄使外人從而干涉等語意在挑

戰強鄰激成十分裂其設心尤爲兇狡查該國民黨暴烈分子群趨於競爭選舉一途或以利誘或以威嚇甚且以手槍炸彈爲脅迫選舉之武器迭據各省選民電呈該黨種種犯法舞弊情形幾至數十百起故本屆選舉如粵如贛如皖如湘等省以及凡有國民黨支部各地方無不爲該黨勢力所左右非由國民公意而爲煽惑也當選以後不知有國家只知有本黨不知有團體只知有個人即如該黨議員張繼王正廷勾結孫文黃興百計破壞五國銀行借款使國家陷破產之禍該黨有煽亂之資中俄協約屢有成議該黨議員極力反對使外交困難坐失較好之機會推其用心非該黨自爲政府即須斷送國家此種莊嚴神聖之立法機關竟爲殘民以逞者所竊據即未公然助亂而常會四閱月一法未經議決僅以有一關係議員一人五千元歲費之議決議院法案遲遲至於九月月終始行議決吾國民日處水深火熱之中延頸企踵以求一保護身命

之舉庶幾國家治安可以維持地方秩序可以恢復本大總統誓當恪依
就任之宣言刷新共和之政治俾我國民咸享幸福特此布告



國民黨之回顧錄第二卷目錄

南京臨時政府總統孫文私與外人訂立國家銀行合同之披露

粵同盟會強迫選舉之駭聞

同盟會與統一共和黨合併

湖南省耶湯沐邑耶

湖南大小元勳之最近動作

工商總長竹槓政策之失敗

孫中山之外國信仰

國民黨之大笑話

叛黨最近駭人之舉動

誌割據江西之李烈鈞

李烈鈞誤國殃民之罪惡種種

國民黨之回顧錄

湘省借款合同披露

胡陳之捲逃官款

追誌黃興在南京謀亂之始末

南京臨時政府總統孫文私與外人訂立國家銀行合同全文之批露

斷送民國財權

特許札以五十年爲期

外股利息六厘

以日人阪谷爲國立銀行總監

國民黨前身之同盟會所組織之南京政府專制腐敗過於前清最著者乃至以漢冶萍抵押日本三井洋行賣礦喪權罪不容誅其確據由本報調查披露乃南京政府之荒悖更有勝於此者查國民黨魁孫文之爲南京政府大總統時曾私與外人訂立國家銀行合同按合同內容實不啻以全國財權送與外人其條件之苛酷過大借款萬倍如設立中央銀行特許札以五十年爲期外股利息六厘以日人阪谷爲銀行總監等等倘使實行則求如大借款之權自我操利只五厘用外人以顧問爲限者

尙可得耶且孫之與外人訂立合同純以私人資格與外人往來並未提交議案於南京參議院責以違法試問何辭以答而顧曉曉於已通過參議院之大借款國民黨其亦自返矣特再錄孫文與外人私立國家銀行合同全文及日人阪谷致孫文書原文如下

阪谷芳郎致孫文書 敬啓者接到貴電及中華民國元年一月初十日貴翰委託阪谷以貴國中央銀行設立之事是係整頓貴國之財政增進國利民福尤重要且緊急故直當爲設立之準備請特許札蓋上正式之印即速送下爲盼然招股分之事貴政府非經列國之承認甚屬困難故各國承認之日即擬爲發表特此謹復孫大總統閣下明治四十五年一月二十日法學博士男爵阪谷芳郎

中華國立中央銀行設立特許札

第一條 今次政府爲認國立銀行設立之緊要以此特許札交付於發

起人

第二條 該特許札之有效期限自交付特許札之日起算以五十年爲限

第三條 該特許札所定之條款非經政府與該銀行協議之後不能改變

第四條 該銀行即集股有限公司其資本金定日幣金一億圓正但因財政及經濟發達之狀態經政府之認許得增加其資本額

第五條 資本金一億圓內金三千萬圓係政府所有之股份政府所有股份即全額交款也交款法於設立銀行之際以常年六釐利息之証券代之

但政府須以相當之官有財產爲此證券抵押

第六條 資本金一億圓內金七千萬圓於國內或外國隨便集股第一

回交款額即資本金十分之一收齊此交款之後始營業

第七條 該銀行即有限責任而對其負債雖歸股東之負責義務以其所有股之金額爲限

第八條 政府除交政府之所有股三千萬圓之利息之外尙擔負於普通股每年七厘利息之責任以十年爲限但政府爲保證支息所支出之金額一年不得過銀行所收股款之七厘利息之譜

第九條 普通股之利益一年若超過七厘之時以此超過額分配政府所有之股然普通股與政府股之利益皆超過七厘之時達到一成之利益平均分給雙方若超過一成之利益之時折半之則以半額交納於政府以半額應分給政府與普通股

第十條 該銀行定款由股東總會議定須經政府認可

第十一條 該銀行總裁副總裁理事及監查員之數並選舉法等須規

定於定款

政府暫任法學博士男爵阪谷芳郎爲總監監督總裁以下之事

第十二條 該銀行有發行紙幣之特權此紙幣係納租稅其他商業等均可通用須預備與紙幣同額之金銀貨幣及金銀塊以便兌換發行紙幣

但準備政府証券五厘以上之發行稅之時則預備政府証券公債證書商業匯票其他確實之証券等得越過五億元之制限得發行紙幣但前記發行稅率有時政府定之關限制外之發行額須先得政府認許

第十三條 該銀行發行紙幣以金銀貨幣兌換

但因政府整理鑄造貨幣及政府發行之紙幣之時則限制其兌換額或以政府之紙幣兌換

第十四條 該銀行發行紙幣之外則中央政府及地方政府發行之紙幣等或他銀行發行紙幣等一切自今嚴禁增加發行額雖既發行額則一定其限處理收回使之消滅

第十五條 該銀行發行紙幣如第十二條規定課稅制限外發行之外不另課稅

第十六條 該銀行第九條所載交納於政府以外所得稅營業稅等概免

第十七條 國庫之歲入及歲出等事皆可託該銀行代理政府須給相當之實費

第十八條 內外國債之整理及新招集國債時可使該銀行辦理政府須給相當實費

第十九條 貨幣之整理及改造可託該銀行代理政府須給相當之實

費

第二十條 政府收回以前所發行紙幣及貨幣等可照會該銀行墊款代辦墊款政府須出相當之利息

第二十一條 政府關於國庫之收支可對該銀行一時貸借若有資金不足時給相當利息與銀行使之墊款但墊款之限制政府須先與銀行協議後定之

第二十二條 管理印花紙出入及販賣等事可託該銀行辦理政府須給相當之實費

第二十三條 該銀行之本店開設於首府或上海支店可置內外樞要之地

第二十四條 政府設立監理官監督銀行之業務

第二十五條 採用外國人爲理事及委員自銀行開辦後限五年爲勸

續之期以後除監要人外漸次用內地人交替

第二十六條 政府自該銀行開業年始滿五年之後於一年內得以時價買收外國人所有股份

但無論如何等情不得以不及股款之金數強買政府於本條期限之間不能買收則本條買收權爲消滅

附則

第二十七條 政府認國立中央銀行監要之設立委任法學博士男爵阪谷芳郎選定發起人設立事務及初次理事及委員等之任免全權阪谷君創設該銀行之間使用相當事務員及支出經費加入創立費均歸銀行負擔

粵同盟會強迫選舉之駭聞

衆議院初選舉爲期不遠各黨運動選舉自屬黨中應有之義乃粵省同

盟會之籌辦選舉其包攬把持出人意外該會近通知各分會云現在選舉籌備期內各分會所應注意者有如左之三事（一）各縣縣長如原爲盟友者應請其注冊並相與接洽如其未列盟籍者亦須極意聯絡邀其來盟（二）縣長所派之各鄉選舉調查員投票監督及一切籌辦選舉人員務使本會會員得充當此項公職如已經派出之鄉紳其間多非同志之時則須擇其中良善而有能力者使列盟籍時時相與周旋一應舉辦事宜又必須時時與議並隨時伸張本會勢力以爲投票時設法制勝之預備（三）凡地方耆民縉紳大農富商巨賈其有聲譽著於一方操行見重於一時者爲一氏一族之領袖者爲一鄉一區之鄉董區董者爲城鎮鄉自治會之議事局議員董事局董事者爲清鄉局員及區董者無論其從前曾入何種會社其會社之宗旨與本盟有無反對其肯脫去不良社會之名籍贊成本會政綱惠然來盟者則胥在包容之列兼收並

蓄寬大是崇至要至要等語粵省自創造同盟政府之後各縣縣長已非同盟會員不用今選舉調查又須必用同盟會員則此回粵省之選舉不必復論矣

同盟會與統一共和黨合併

同盟會與統一共和黨合併已於前晚簽字前報所記之國民協會等因上海本部來電反對皆未加入茲探得兩黨合併之前後種種作用分誌如左

合併之原因 統一共和黨自通過五總長後大爲同盟會所卑視而又無面目再與共和黨聯絡於是極力請求與同盟會合併同盟會雖薄視統一共和之居心行事但因急欲改組又欲於參議院占多數故許與合併以便一舉兩得

合併之目的 兩黨合併在參議院可占大多數其目的所在一方仍欲

乘間蹈隙推倒現內閣一方又注重民政總監之選舉蓋統一共和黨黨員多北省人不知南省選舉長官之弊害故皆素持選舉主義東三省一派即其最著者同盟會則自唐紹儀去後知在中央勢力失墜即大倡地方分權此次與統一共和黨合併直欲恢復其在南京組織統一政府之狀態將來雖不得志於中央亦必求得志於地方也

合併之頓挫 統一共和黨主合併者以吳景濂爲最力吳在南京與同盟會惡感甚深今次實不得已而有此舉前以合併事電商各支部皆得有回電惟雲南無消息而該省長官尤爲該黨黑幕中之重要人物故前晚開會時對此頗有遲疑吳景濂即決然自以代表名義簽名其急欲合併之情形如見

合併之黨名 兩黨合併後定名爲民主黨規約已於昨日付印其政綱仍存在同盟會之民生主義一條而原有之集權一條聞已刪去其暗中

變爲地方分權可想而知矣合併之將來此次與統一共和黨合併者實同盟會中之少數人其黨中大多數黨員尙極力反對故雖合併而同盟會三字仍未消滅已合併者只能看爲脫同盟會未加入者仍不妨樹同盟旗幟也將來此軼葛不清之問題非孫黃到京後不能解決然使同盟會全數黨員一齊加入其行動仍無異於同盟會所改換者僅一黨名耳對於共和黨之態度 自政府成立後兩黨一方屢議合併一方散步謠傳登之報章謂共和黨內訌又共和黨將大破裂又共和黨預備組織政黨內閣又用種種手段離間共和黨之參議員其用心亦良苦矣

湖南省耶湯沐邑耶 (京報)

京報云湖南爲元勳偉人出產之邦故元勳偉人對於其地之政務財務俱享有特別權利儼成一種貴族制度今日之湖南謂之爲諸元勳之湯沐邑殆不誣也前此選派元勳子弟出洋游學及其他種種特別舉動均

已歷紀前報茲更將近日常偉人對於湖南地方政府所要求之款目錄左

(一) 國民黨黨費一百二十萬兩

(二) 黃興氏創辦之大同錫礦公司一百萬兩

(三) 宋教仁氏創辦之廣惠公司五十五萬兩

(四) 李燮和創辦之茶務公司十五萬兩上數款皆有案可稽非傳聞之語也上項款目其黨費等項均須向湖南官銀號提取現銀者該銀行長周砥氏以湖南官銀行濫發紙幣已多一旦兌取如許現款萬不能支持下去已藉游歐美爲名辭去銀行長職任接辦者爲章某現亦被逼將藉故逃去云

黃興宋教仁李燮和諸偉人所設公司名爲官商合辦其實祇各憑其勢力之大小攫得官款百萬及各數十萬作開辦之資其所謂商股者皆係

空股即大元勳與小元勳所享受之紅股也凡爲元勳徒黨以至代爲鼓吹之報館莫不各有所分潤明白公然瓜分公款爲之說者尙得美其名曰振興實業此等巧法真今世大計學家所研求不到者也據深知湖南財政內情者云自去歲革命至今若鹽斤之加價若籌餉局之搜括收入較前清時增加數倍單鹽稅一項收入至七百餘萬報部者祇三百餘萬籌餉局之橫征暴斂收入至六百餘萬其明報歸公者不過百餘萬故湖南地方財政亟爲充裕當局者得以供給各種要求克盡湯沐邑之職分云又近日湖南有一班三四等元勳組織所謂征庫團者向當局要求鉅款譚督旣任湯沐邑宰之職自不能不一爲應付業已籌措欸項分給團中各分自數百兩至數十兩不等云

湖南大小元勳之最近動作

本社昨得湘函述近事二則照錄於左

革命風潮之激烈 湖南光復後其政權爲一班似官非官似民非民之人所得自都督以至各司各局其強橫暴戾雖大有革黨氣象其實皆係昔日直接間接靠官吃飯之輩至湖南革命告成後始臨時加入作元勳偉人者也其真正起義之少年莫不置之閑散以故一班起義少年自命首功之徒大爲不平以爲湖南光復由我輩手造而未嘗預聞革命者乃群擁政權大作威福瓜分公款無所不至因湖南起義爲朔日遂組織所謂朔黨者專與湖南政府爲難其加入者多不得志之將官及任俠少年其宗旨專在用武力推倒湖南政府前此財政司之炸彈及二次革命之布置皆此派之所爲也湖南當局諸公本多直接間接之小官僚出身外雖強橫而內實怯弱對於此派人畏之如虎不敢取強硬之處置現在此派又謀第三次革命其重要分子易棠齡雖被拿獲而當局究未敢置之死地以增此派之怒現在方日夜戒嚴其所謂三次革命者目前雖不得

發作而湖南政府貪橫暴戾民怨已深此派實行少年積極進行又較之前歲之革命分子其勇氣尤加百倍尸居餘氣之湖南政府必不久將作滿政府之續矣茲將此派近日所發出之佈告照錄於下觀此可以知湖南近日之風聲鶴唳矣

爲佈告事照得湘省自前年反正以來我輩死力經營皆爲同胞起見不料政界當道諸人昏闇用事遇事遲疑成此腐敗局面無人敢說今幸革命黨老同志謝介曾劉文錦易棠齡周來蘇各位熱心時事有心建造共和推翻湘軍都督改設各司我等既承教導急需同心協力共起維持屢回商議均有成局奈爲一班利祿昏迷之人從中間阻茲已抱定目的準於日內實行改造湘政府扶助謝劉各位代我同胞作事望我同胞無得警恐如有誤會莫謂無情市面照常貿易不許亂動切切此佈湘政改良會公佈大小元勳又分公款

自黃偉人回鄉以辦鑛爲名提公款二百萬宋教仁李燮和繼之各要求數十萬後於是一班下級元勳俱以辦鑛辦實業爲名向都督要求款項並援黃宋爲例都督當答以黃宋爲一等偉人爾等何得援以爲例要求者皆謂黃爲一等可得百萬我等均爲革命有功之人縱偉人等級居八九位之下亦須得款十萬二十萬何得厚於彼而薄於我乎相率大譁湘督遂不得不一一應付使之各如其願而湘中自黃宋諸偉人瓜分鉅款後庫款漸空祇得在無盡藏財源之紙幣項下再爲設法故近日又增發紙幣四百餘萬分之各元勳計以辦鑛名義分去者三百八十萬以皮革及紡織公司名義分去者七十餘萬云

工商總長竹槓政策之失敗

上海著名竹槓大家陳其美因時竊位一躍而爲滬軍都督再躍而爲工商總長一般竹槓家無不稱羨其能而不知亦有暗中失敗之處其自充

滬軍都督也舉凡前清海關道及機器製造局之款固已平吞矣而於滬上各富商尤多詐索外間傳言不下百萬金於是花天酒地日夜不休有日與吳淞水師統領朱庭燎前浙江勸業道劉某江南第十師師長吳紹麟組織北伐隊司令長龔超此外尙有三人共計主客八人酒敘於四馬路某校書家談及大清銀行總經理宋煥章積聚必豐代爲算計約二百萬若將宋煥章拘留勒令將款項繳出即以此款作三七開以三成充滬軍公費以七成作八人均分豈不旦夕各成鉅富惟宋居外國租界爲人十分防衛難於著手龔超許爲畫策然恐事後陳不能踐言遂立一合同各書名押交龔收執龔策遂出查知宋煥章有密友某有宅一所在華界價值二萬餘金託宋出售於是因劉某稱曉西語僞作南洋之華僑聲言挾鉅資經營商務往訪宋煥章宋極意歡迎置酒接風席間言及欲買一居宅必亭樓花園均完潔者宋即告以其密友之室甚爲合格約明日偕

往驗看劉應時赴約遂命設酒於園中共議價值陳其美知宋已騙到華界即於是時遣僕一人往宋宅傳見宋僕告以出外陳即派多數兵士圍擒宋煥章於其友之室又懼附近之巡捕干涉即派人偽裝乞丐交鬪於市以誘巡捕往爲彈壓宋遂被拘嗣派人調查宋所經手之帳目未得端緒又有伍秩庸依據法理與之抗辯此策遂已無效陳因以二十萬金運動某氏求爲保薦於袁大總統又以二十萬金運動某某得其同意授工商總長之職此時遂揚眉吐氣不以舊時之密友爲意龔超惡其貴而凌賤也即函告陳囑以十萬金易此合同否則即行宣布必取消其工商總長之職陳大懼乃以二萬金贈龔囑其秘密龔仍以爲不足且滬上各報館均知其事聲言將欲登報陳乃四處紛紛運動已費多金而要索者尙不肯休故至今尙不能來京就職云

孫中山之外國信仰

孫中山自廣州失敗即往來南洋羣島及歐美華僑所在地所交接者多各國會黨中人而滿清政府時以非法之行爲待之故其名遂著去年武漢起義中山由粵約胡漢民至南京又適南京財政最困時遂得舉爲總統而組織政府之三千金由中山貸出其餘所携則其自言之共和精神也頃有久於外交界者談及其做總統後之外國信仰特分誌之其未爲總統時之信仰則不必記矣

中山卸總統後由南京赴廣東道過香港該地本中山舊遊昔曾行醫於其地近年又以之爲機關者也孫以前總統資格登岸乃香港政府厚我國人太甚舉滿清時代限制中山不准逗遛香港之案以爲言再三交涉乃改爲逗遛二十四小時某國不信仰中山猶可不信仰抑我國人太甚矣中山來北京路過青島亦有可記之事中山生平未曾遊北方其過青島乃以前大總統資格第一次過該地也某國人禮應特別歡迎乃中山過

青島日吾國學生之欲開會歡迎於高等專門學校者橫被干涉大起風潮各報前已詳誌之其尤可怪者青島之廣幫商人於是日開宴迎之人數本不甚多乃某國之青島警察於將開宴時竟來禁止當時粵商中三次推代表赴總督請其稍留餘地幸該督尙有人情許其開宴惟於中山演說時派警吏五六人伺之中山自知無味說數例語即去

中山之歸上海也本擬赴日本一行日人之爲斡旋者山座氏山座氏來北因受我政府之託屢代中山與日本外交當局約期意以爲同文同種必受特別歡迎也乃日本外交當局意甚淡漠其回電殊無歡迎之意惟云俟該國定期後再來云云

中山在京外出過交民巷頗受外國巡捕之無禮待遇前年袁總統之來京也過交民巷時外國兵士及婦女無不出外爭觀之故中山於將出京時遂發遷都之議又歐人之旅居中國久者近來返國對於中山頗發不

滿之言論其尤可恨者英人樸愛德近在美國芝加哥地方演說痛詆黃克強上將謂黃性質實無異拳匪頭目我國學生之留美者曾憤極質問之因樸氏革去滬甯鐵道總辦遂發此苛論也

國民黨之大笑話

陰謀之可畏

自打自之可笑

日昨本報登載真是可驚可駭之印刷物新聞一則係據前日所聞之情形固早已逆料其此種毫無心肝縉紳難言之印刷物決非共和黨人所爲不意昨日政團聯合會開會時忽有附啓之發現於是國民黨之秘密爲之暴露茲特將其中之原委詳誌於下附啓之發現國民黨接到該黨河南支部所寄印刷物後其黨人張耀曾李肇甫等以爲得到傾陷共和黨之唯一奇貨方自驚喜不及詳察即以國民黨名義通告政團聯合會

請其開會意欲俟開會時將此印刷品宣布以爲誣衊共和黨名譽之計不意開會時於印刷物之末尾發見一附啓內云秘密談話非共和黨之印刷物而以此名名之者避攻揭也祈深藏勿露時時參閱切盼挺密叩十一月三十日云云

是不但證明非共和黨之印刷物適以證明其確爲國民黨之印刷物於是各黨人動色驚異而國民黨人則尤忸怩不堪情態畢露云

國民黨之陰謀 國民黨人既已張皇失措適共和黨本部亦有函致政團聯合會辨明其事措詞極爲直壯且有起訴之意國民黨人見之更覺狼狽乃一變其手段即用政團聯合會之公共名義呈請內務部查辦使共和黨不能與國民黨直接交涉其手段之陰險可謂已極殊不知政黨各有其特別政見各有其特別旗幟而後有黨可言斷不能於各黨之上復設一種特別裁判各黨之機關至於政黨聯合會本因俄蒙事件發生

係取對外一致之意又焉能假手於聯合會以摧殘共和黨之名譽也
印刷物內容之疑點 按該印刷物內容其談話多廣東土語此物可斷
定其爲在粵之該黨人所爲其証據畧舉於下

一蘇星渠大闊蘇大闊爲廣東無賴暴富揮金如土遂得大闊之名他省
人知之者甚鮮他省人亦斷無引及蘇大闊者

(一)街上他省人俱呼路上道上惟南方恒呼街上也

(二)串路替人運動廣東謂之串路他省無此名詞

(三)蓋篷廣東以葦席蓋棚者謂蓋篷如船篷之篷也

(四)抬椅廣東人無呼棹椅者皆呼爲抬椅也

(五)保皇黨廣東凡欲陷害之人皆目爲保皇黨北方則稱宗社黨也

(六)開彩廣東闈姓山票之賭博皆定期開彩

(七)拾籌拈圍之法廣東謂之拾籌

(一)銀毫仙士廣東呼小洋爲毫子銅元爲仙士仙士者香港所常用之名詞而省城沿用者也

一廣東報紙論調與外省多不同此文論調與廣東報紙常用之論調合說者謂據此種之證據觀之當係出自廣東同盟會蓋以前者廣東傳來消息謂接到京中電報請胡都督用政府之力破壞其選出人之非本黨者用科舉時代扛鷄禁蟹之法務使其必不能與選又用種種利誘之法誘人入黨其用費請胡督墊付等語與此次發現之秘密談話如出一轍此項印刷物發現於河南其或爲廣東同盟會所遞寄或爲國民黨之廣東人所手撰殆不出於此二者

共和黨之辦法 共和黨本部日昨開特別會議決對待此事之辦法有二種

(一)通電 通電上海共和黨各支部云選舉競爭政黨公例要以國法

與黨德爲範圍本黨尊重國法於黨德亦極爲注意本黨支部此次對於選舉競爭則有之豈有破壞國法黨德之行動不意近日國民黨本部接有河南該黨支部寄到印刷物題爲秘密談話署共和黨頒行字樣其內容皆違法敗德之語另有附啓云（專啓者秘密談話一件非共和黨之印刷物而以此名名之者避攻揭也祈深藏勿露時時參閱切盼切盼挺密叩云云）此爲極可驚駭之事顯係有人故意誣陷以爲敗壞本黨名譽之計况附啓亦非共和黨之印刷品等語則誣陷更不待言除由本部即日呈請澈究外合亟電聞

（二）起訴 共和黨以此次印刷物大爲誣蔑黨譽擬即日以共和黨名義向檢察廳提起訴訟務須澈底查究一面將國民黨挾意破壞本黨之一切行爲通告全國蓋不欲使吾中華民國最可敬貴之正式國會選舉竟有此等惡劣不堪之秘密運動橫行其間云

外間之輿論 此項印刷物既敗露種種方面皆足證明其國民黨人所爲而乃反以之誣衊他黨其罪惡昭著無可置辨（一）競爭選舉爲政黨之正當辦法乃出以暗箭傷人藥物毒物捏造僞票種種之手段實足擾害治安大傷黨德（二）自黨人造出極卑劣極危險之運動選舉法反嫁他黨之名行之與匿名揭帖之罪相等（三）本黨之秘密文件支部人既貿然以之報告本部本部人復不加察率爾提出荒謬粗鹵既已絕天下之倫又復欲以此誣陷他黨其罪惡尤不可勝數云

叛黨最近駭人之舉動

（京報）

襲攻上海製造局

以滿蒙供犧牲

勾結曹州土匪

叛黨孫文黃興等近日派員四出調停希望和平者以爲該黨有知難悔

禍之意不意昨日忽有極駭人之消息傳來該黨竟於上海實行用武力襲攻而一方又有與某某國訂約及煽動土匪等事乃知派員調停係用緩兵主義而暗中仍圖實力進行其居心亦險狡哉或曰該黨首孫黃等實已決心投誠惟其黨羽衆多一時未能悉受範圍然此不過揣想之言而其實証並不如是也茲將所得最可靠之消息分誌如左

襲取上海製造局之駭聞 昨據上海消息二十八日晚間突有叛黨數十人襲攻製造局旋被守衛軍隊擊退並擒獲四人云

又接上海德文專電二十八日晚滬上大雷雨勢如傾盆突有叛黨一百五十人分二隊襲攻製造局幸局中守衛北軍於日前已有所聞豫爲之備以機關槍極力抵禦叛黨死者七人傷者十五人遂狼狽遁去守衛軍無一受傷者

又同電滬上製造局突被襲擊謠言紛起叛黨播弄是非散布訛言謂襲

攻製造局之一百五十人係由北京政府賄囑已被遣散軍隊偽爲彼黨襲製造局一方面藉口以軍力佔據長江下流各要隘云云蓋叛黨謀襲不成無可掩飾故造此項謠言以圖自脫云

又據路透電此間（上海）數日內謠言紛紛云有大隊匪徒曾籌備攻擊江南製造廠於本日（二十八日）早晨二點鐘竟有經驗是時有小隊匪徒顯係遣散軍兵攻擊該製造廠後經擊退擊斃兩人擒獲四人云

又聞國務院昨十一時接上海警電稱匪徒襲擊製造局該匪徒當被擊斃兩人擒獲四人內有一名自供爲陳其文云

割滿蒙以求外助 叛黨大舉作亂第一受制限者在無餉械近乃奇想天開知某某國久垂涎滿蒙於是思投其所欲言稱某某兩國如肯借與巨款並賣予槍械戰勝之後以南滿東蒙割與某國以北滿外蒙割與某國以爲報酬不成則惹起瓜分甯同歸犧牲亦必不令袁某獨享其成

此事據本社訪員報告云外交界中近日亦多得有此項消息惟皆認爲一種戲譚謂某某等國雖素持侵略主義但萬不肯與一亂黨之個人訂此擾害世界和平之秘密契約彼該亂黨揚言已得有某某國許以助力者蓋猶空言恫嚇吹牛皮之慣技耳

勾結曹州土匪之敗露 叛黨謀亂除運動南北軍隊外更到處勾結土匪昨接魯省訪函稱數日前山東都督忽接有最怪異之函信內係某某首領寄與其同黨某要人令其運動曹州土匪乘機起事牽掣北軍某要人者現在山東政界中頗有聲勢且與曹屬匪徒舊有關係此函誤投都督府致被拆閱敗露故外間知其事者甚多云

誌割據江西之李烈鈞 (京報)

江西都督李烈鈞反抗中央形同割據種種情形迭紀前報茲將各方面對於此事之狀態續誌於下

罪狀之宣布 江西各團體因李烈鈞違法殃民聯合赴京向參議院請求咨請政府查辦計其罪狀十四條節紀於下

(一)陸軍部通令各省非得中央許可不得私向外國購運軍械李烈鈞對於中央心懷叵測違背部令於五月間私向上海泰來洋行定購德國機關槍炮及各種槍彈無算費銀二十八萬兩潛運入江朦稱所運槍械係吳介璋馬毓寶未經部令以前所定其實吳介璋馬毓寶所定購均以器械朽壞曾在上海租界會審公廨與承攬洋行起訴另爲一事泰來洋行所承攬者據駐滬江西民國分銀行報告先後兌銀有案可稽由信昌隆報關行代爲報關裝運亦有確証近又派都督府顧問官余維謙在上海向德商交涉再購八十萬元潛謀不軌跡不可掩

(二)調遣軍隊權操中央黃前留守衛隊林虎所率一混成協前駐南京李烈鈞聽信俞應麓之勾合擅將其軍秘調來贛俞應麓遂恃爲爭都督

之利器暗與旅長歐陽武劉世均戈克安相抗且其軍毫無紀律擾民尤甚上月初九夜之變燬燒民房數十家事後報載即爲該軍謀起事之禍

(三)約束軍人宜有紀律烈鈞信用死黨縱使橫行其護衛軍遊行街市路人莫敢稍撓其鋒所親信之中軍官蔡銳霆十月中旬白日率護兵多人持手槍入高等檢察廳威逼該廳長陳邦燮辭職李烈鈞亦置不問

(四)省城屢次發現匪蹤皆在軍中雖旋起旋滅人民已一夕數驚究其原因實叛都督乃李烈鈞不謀正當解決但日架機關槍如臨大敵已身則囊米爲壘伏處其中司長入見皆須搜檢出入儀衛之衆即專制國官吏亦所罕見甚至在鹽局演劇爲樂左近街衢均以兵扼守禁絕行人清道警蹕有如帝王

(五)江西財政在前清時每年收入七百餘萬兩其支付賠款及解付中央者共五百餘萬兩自光復截留淮鹽稅捐及新添各稅收入共千萬兩

其支用比前清時祇軍費一項稍增（現在軍數不及一鎮係單餉）而李烈鈞尤發強迫公債三百萬對於中央則稱難接濟而個人揮霍則無不取諸官中臨時省議會曾議決有預算案李烈鈞毫不遵守

（六）江西民國銀行毫無資本自徐秀鈞總辦該行妄發紙幣將近千萬吸收市面實銀輸出上海購辦軍器致本省金融愈趨恐慌而徐秀鈞任意將重款撥充黨費至報銷不出者七十餘萬之多李烈鈞寔與爲狼狽

（七）軍民分治爲建設民國之本根省議會亦經議決李烈鈞獨持己見抗電中央與人民意見相反

（八）江西自光復後受洪江會匪擾亂之害洪江會首領黃炎馮寶林殘害人民實爲禍首轉令遠颺且與暗相結納標統方先亮豈真通匪而黑夜派重兵圍拿並冤殺第一營教練官張鳳翼河口商會總理崔思敬本地方望紳知事李建鼎竟誣爲匪廣豐俞良駒王賡心等亦本地望族知

事注南亦誣爲匪均經捕拿在案其他以被誣羈案者尤多各縣知事尤而效之生殺自由忍不堪聞

(九)蹂躪省議會

(十)任用非人

(十一)侵奪人民身體財產之自由

(十二)侵害人民書信秘密自由

(十三)故縱死罪人犯

(十四)妄拿鐵路協理

浙湘都督之來電調停。自李烈鈞逼走民政長興辦國防種種跋扈情形發現之後政府聞之殊爲震怒李督乃一面令蔡銳霆等統率長江水師湖口鎮標五營及內河水師全軍嚴扼湖口等處一面以武力強迫省議會公團發電取消前說一面密電其心腹爪牙向各省都督運動代爲

辯護於是昨日湖南都督譚延闓浙江都督朱瑞均有電致政府皆爲李烈鈞洗刷迴護論者謂二督不責李服從中央命令乃爲之掩飾殆受李之唆使云

鎮撫使之派遣 政府從各面調查知李烈鈞素有江西王之稱桀驁不馴恐非派鎮撫使不能解決現擬於張勳蔣雁行二人中擇一前往鎮撫云

大總統之態度 袁總統對於李烈鈞之舉動大不以爲然謂民國成立一年以來南北溝通意見力謀統一艱難萬端今李督無故反抗中央縱令將校逼逐民政長此等破壞大局之端一開後患何堪設想我做一日總統決不能一日不謀統一若李督不自悔艾我亦不能長此敷衍云云言次甚爲憤慨

外人之評論 近日外人對於中國現勢多抱悲觀主義大抵皆謂中央

權力微弱各省騷亂如英人狄倫氏之瓜分中國論白朗氏在美之演說皆是自江西事發現外人尤引爲口實謂李烈鈞甘心破壞使中國起分裂之朕兆大不直李之所爲並聞某國人對於此事甚爲注意隨時採取消息電告本國云

李烈鈞誤國殃民之罪惡種種

李烈鈞之嗾使蔡銳霆陳廷訓等反對汪瑞闓之詳情迭載本報惟自反對之後其內容各種鬼蜮之歷史未必盡人皆知茲據最確實之通訊詳述一切亟錄如下

自汪瑞闓離贛後李督亦自知事經決裂殊難得圓滿之結果故當時常對人言余之對於汪絕無絲毫之惡感此次反對風潮之起余之意亦祇因袁總統簡任民政長不先電贛咨詢可以勝任之人驟然發布汪氏未免有專制自雄之念故令若輩出而反對亦所以示袁以南方人士未易

與耳詎知風潮既起如穴潰隄崩不可收拾殊出余意料之外要之余之初念僅爲開弓不放箭之行爲今則幾有箭在弦上不得不發之勢矣汪氏既入京不旬日而中央遂有簡派鎮撫使之傳說李督遂派俞應鵬來京運動携帶現銀十二萬元爲運動費其運動之目的則在打消中央派鎮撫使之意思及諷勸汪瑞闈自己辭職爲根本之解決汪既辭職則可另組國民黨員爲贛民政長以便永久把持政局揮霍金錢至其運動之方法則第一求國民黨之協助及津貼國民黨機關報以爲之辯護第二則運動當局者於大總統前疏通解釋第三則以金錢買通前清之贛籍京官以滅殺反對者之勢力並以金錢賄賂方某劉某（皆從前贛省軍官於李督任內獲罪而外逃者）及一切重要人物於是運動之結果鎮撫使已暫緩派出而王芝祥以國民黨之關係挺身而出擔負調停之責任遂於十六日偕俞蔭麓離京赴贛矣俞蔭麓之來京運動也在表面觀

之固純爲李烈鈞之牛馬走而其內容則殊有不然者俞本一狂蕩之徒自去年南昌光復後即借故羈留於甯滬之間胸中鬱鬱不得志李烈鈞之督贛渠實與有力焉李本欲當時置之高位無如功在俞上者不乏其人一時無以爲報遂命其往滬購買槍械蓋不升官即發財二者必得其一俞在滬窮奢極欲冶游聚博無虛夕卒以數千金購所狎妓爲妾當時曾購二妓挈歸南昌以其一歸諸已以其一獻諸李烈鈞李烈鈞既請病假遂保薦俞蔭麓代理俞代督後即出羅朗山案之大風潮俞不能支位李無奈遂銷病假而仍視事焉

李再視事不數日而兵變之事起兵變後李督內愧於本心外迫於大勢於是乃贊成軍民分治乃請簡民政長及中央發布汪氏瑞闓爲民政長李又忽然中悔蓋其左右皆國民黨人恐一旦將民政事交出則大權旁落乃極端慫恿反對之汪遂不得不行而風潮遂愈激愈烈

舊歷臘月二十五日李督接袁總統痛加諭斥之通電中心惱悶無可爲計乃令顧問官陳澤霖於二十六日發起政團聯合會當時共和民主兩黨人均目逆而笑之聯合會卒無效果乃於二十七日遍發傳單定名曰各界各團聯合會當時到會者皆國民黨一部份人李督親臨演說以國民黨爲民權黨日共和黨爲帝王黨云云會既終遂臨時由國民黨人組織各種新團體之會名拍發通電爲李解釋又改名稱爲公民聯合會欲假此爲一省輿論之代表故是時共和民主兩黨人均曾電告各本部以並不預聞其事而商務總會亦有通電以嗣後關於地方各事非該會單銜發電概不發生效力亦所以表明未曾預聞其事之意也

汪既去賀亦知中央與地方將生衝突乃極力求去職並來京運動已之繼汪爲民政長故李督之令賀來京目的在令其疏通雙方隔閡而賀則藉此爲自己謀位置李實爲其所弄也故俞賀來京之內容兩人皆出於

一致賀所圖者在民政長俞所圖者則在繼李爲都督王芝祥之自告憤勇赴贛查辦實出於俞之運動一以同黨的關係以便爲李烈鈞解免一則擬諷李督辭職而令王保俞爲之代也然頗聞王氏亦有取贛督而代之之意其中情形殊類螳螂捕蟬而黃雀又隨其後殊可笑也

賀俞之鬼崇情形既如是李督則尙以實力代彼運動故不惜撥給大宗款項以爲運動之費夫李督亦安得如許金錢皆江西父老兄弟血汗脂膏任其揮霍而無人敢過問詎不哀哉

李烈鈞既遣俞蔭麓以金錢運動於省外又得公民聯合會爲之助聲援於省內似亦可以無憂無懼矣然因京滬兩地反對之中堅既不能以金錢運動而其人又皆一省名譽素著之人其力甚強乃更派彭程萬賀國昌二人爲代表赴鄂謁黎副總統再入京謁總統亦携有巨款來也李之兩次遣代表均賒大宗金錢者其在贛中曾對人宣言京滬同鄉中反對

之人大抵皆前清官僚中人但使每人贈送冰炭敬若干當無不可了結之事其宗旨蓋如是也

彭賀二人之謁黎也其宗旨有二一係運動黎公加入國民黨脫離共和黨該黨即舉黎爲正式總統一係運動黎公調停贛事必達孤注之目的而另易同黨之人至其屢次向黎公纏繞不休之原因一方面固深恐中央之強硬解決一方面則採用岩延政策以冀該省正式省議會成立後國民黨佔多數之議員則可爲強硬之反抗也

彭賀二人入鄂運動黎公脫黨之事已歸無效至調停民政長事黎則深許之故彭賀由鄂入京尙未謁見袁公而王芝祥已奉查辦贛事之命令黎公又委派黃祖徽往贛昨已來電催彭賀二人速返鄂偕黃同赴贛也彭程萬之爲人也訥於語言短於才識然與李督私人感情甚洽故極願爲李盡力其間關於同黨之臭味不多惟賀國昌則純然爲黨之關係賀

當前清時在黔任巡警道極主張捕拿革命黨人經贛省某報宣布故賀與共和黨人感情極惡（在內務司長任時解散廣豐共和黨分部亦一大原因）自入國民黨後一變其本來面目自以爲革命黨人物然稍知其歷史者無不深恥其爲人至贛省國民黨之利用賀國昌也亦自有故緣贛中國國民黨人皆少年浮蕩以及前清時爲鄉里所不齒之人故對於賀國昌特引而近之其意蓋亦自知黨中人物太爲混雜欲以賀國昌之年輩稍長者以爲掩飾彌縫之計此賀國昌所以爲內務司長之原因也汪瑞闈之來贛其中反對最烈者實爲賀氏一切謀畧及電文主稿皆賀任之並親至國民黨機關報編輯詆罵汪氏之新聞其所以悍然出此者亦非有所甚不慊於汪氏特以國民黨中人已允代其組織民政長汪來則於一己之權利上大有所損害此所以反對汪氏爲極烈也

湘省借款合同披露

（京報）

湘省借款情形迭誌本報茲悉此項借款曾由湘督提交該省議會一次經該議會反對遂乃撤回日內聞重行提出勢將通過蓋不可喪失湘省礦權之問題且與此次贛亂大有關係蓋黃興有將此款扣留半數在滬用之說也茲探得合同全文具錄於左

第一條 借款金額定爲日本幣一千萬元以三扣兌手續費四釐即每百元實兌八十九元

第二條 此項借款分作三期交付第一期付金五百萬元第二期付金三百萬元第三期付金二百萬元第一次付款之期以正式合同簽字後一個月內爲限第二次付款之期以正式合同簽字後六個月爲限第三次付款之期以正式合同簽字後十二個月爲限均在上海交兌除前所定折扣外不得再扣匯水用錢等費還款時同

第三條 此項借款用途專爲擴充湖南礦業之用惟暫將五百萬元存

放湖南銀行以平匯水藉維金融以後之款仍存湖南銀行陸續撥付礦用費本另立摺據交存官礦局作爲支款憑証並不挪作別用費本主隨時可以赴局查核

第四條 此項借款按週年六釐行息自現金交付之日起算每年分六月十二月兩次在上海支付倘遇礦利無著時應由湖南財政司歲入鹽款附加稅項下撥付不誤

第五條 此項借款以二十年爲限第一年起至第五年止還息不還本第六年起至第十年止每年除還息外應還本四十萬元第十一年起至二十年止本息攤還均由礦砂售價內扣付如礦砂售價不敷還本息時可照第四條辦理（還款數目期限另行列表）但至十五年後湖南政府願將所欠本金提前償還旭公司不得拒絕

第六條 此項借款以湖南現在官有及將來官礦局推廣開辦各礦所

採之鑛物爲抵押品但常甯水口山鉛鑛不在其內

第七條 此項借款以湖南官鑛局所辦之江華錫鑛平江金鑛及該鑛附屬之房產機器與營業之權利作爲担保品惟在江華錫鑛平江金鑛未經旭公司調查以前應以湖南財政司歲入鹽款附加稅作爲第一之担保品但江華錫鑛平江金鑛及將來所開各鑛每歲所出砂價能達一百萬兩以上時則第二之担保品可以取消

第八條 湖南政府須商由旭公司薦用高等鑛師來湘擔任調查及開鑛事宜以第六條所指定爲限所有鑛師權限及新作旅費另訂合同規定

第九條 動用此項借款所開湖南官有各鑛所得礦砂均歸旭公司包銷以二十年爲限（除常甯水口山鉛鑛在外）按照倫敦商務報所載時價扣算所有銷砂條件另訂議單規定

第十條 旭公司得派代表一人駐湘對於開鑛事宜彼此妥商經營有認爲不合之處可商明官礦局隨時改良以保資本

第十一條 湖南政府欲擴張鑛業須添借外債時須先向旭公司商借如商借至六個月尙不能成立可向他之資本主議借又訂購東西各國開鑛機器材料時旭公司之價格不高於他之商店須先儘旭公司包購以維情誼

第十二條 此項借款正式合同由湖南財政司司長官礦局局長署名簽字呈由湖南都督兼民政長蓋印用華日文繕具四紙湖南都督府駐湘日本領事湖南財政司旭公司各收一紙爲憑但至二十年此項借款本息還清時此合同當然作廢

第十三條 此項借款商定先由湖南都督提交省議會通過簽訂草合同經過二個月再行簽訂華日文正式合同雙方蓋印方生效力如省

議會不能通過或發生他項事故不能如期簽訂正式合同可延期一月如經過延期時間再不能簽訂正式合同及遵照第二條如期付款則此項借款交涉及所立合同完全無效

胡陳之捲逃官款

胡漢民去粵時朋分公款至二百餘萬其情形迭詳前報日來廣州香港等處各界紛紛致電國務院及參眾兩院均主澈底查究情詞憤極茲爲彙誌於左

廣州公民之憤慨 廣州八屬學會暨改職軍人等電云粵督胡漢民濫冒革命運動費私人遊學費強攫鉅款輿情憤甚前孫壽屏設革命分部於廣州灣籌借高雷商民十餘萬高羣英設革命分部於水東立向商民借款五萬元均有單據若准胡支取諸部勢必紛紛索價何能應付聯乞勸繳或飭陳督准予一體給還以均苦樂倘置之不理決議待胡之策乞

即示復八屬學會改職軍人高羣英二千餘員同叩

粵省議會議員之公論 粵省庫款奇絀胡漢民於瓜代時期大施其搜括手段竟借名革命運動費二百萬私人游學等費五十萬硬飭司提撥經黨人否認及省會各團會質問不已一味利令智昏希圖席捲而逃現陳督不敢接事任聽颺颺則軍餉乏市面荒大局危速電促陳督接任並飭扣留胡漢民追還撥款清算舊數以救全粵廣東省議會議員黃逢堯箇叩

香港僑民之呼籲 電一全粵銀荒商窘甚酷口循憲法卸事胡督擅撥巨款革命補給庫款空虛何堪調撥應請截留清算手續明白宣布衆心始服陳君昭常民政已屬請速蒞臨更造民福香港麪粉行同業等叩
電二胡漢民解任藉口償革命運動費二百餘萬又擅撥遊學辦報費數十萬以此擅支庫款罔恤民艱經於 日私逃離省避匿港澳懇大總統

電令陳督飭著漢民返省核算數目以重庫款而儆貪婪並乞電催陳民政長昭常迅速蒞任粵民幸甚港僑番禺工商分所車茂軒黃屏 等叩
敬

陳炯明在廣東獨立時私行捲去公款百餘萬曾畧紀前報茲探得其真相補誌如左

(一)八月三日金庫長余某在管船局內親以金庫之紙幣十五萬元交與陳炯明

(二)七月杪陳炯明出兵援贛領去豫備金銀元四十八萬元又領第一支隊七八兩月份俸給及糧食銀三十七萬七千二百元

(三)都督府軍需課所管之現品中屬於本年度者現存數十萬元於未送交司庫以前爲陳炯明取去

以上數目合計爲百餘萬元有金庫長余某確實之證明余明知其事

實之不正奈當時陳炯明之勢力甚大祇好任之財政部接此電復已着手查辦矣

追誌黃興在南京謀亂之始末（滬報）

黃興潛逃屢誌本報茲悉黃氏有逃赴日本再行捲土重來消息今特追其逃出南京後之詳情如下

前月念八日早晨黃興部下秘書全體忽然不知所往同部大起驚慌莫知所措蓋因秘書掌機要文件今忽全然逸去必有非常變動也霎時間一切人員行李即紛紛遷去全部爲之一空黃興副官長何成濬乃強爲解釋謂諸君不必恐慌黃總司令計畫向來是很好的必不至陷於危險之地各秘書之他往是因蘇州程都督來電不承認獨立現已於蘇垣從新組織都督府但此電亦非程雪老本意不過是應德閎羅良鑑從中舞弊而已現在各處緊要關隘及炮台皆爲我等佔據足以控制北軍昨日

上海陳英士來函謂吳淞炮台擊毀北來兵船一隻奪獲格林炮一尊可以留作攻擊製造局之用至於他處現已停戰無甚危險仍宜寬心照常辦公云云實則全爲粉飾太平之語不值識者一笑

今午後三時上海紳士即紛紛到甯面晤黃興接電後衆即頓足不止曰糟了糟了君既不審慎周詳於先今又不顧成敗於後用意何在誠所不解方衆人與黃興秘密談判時不准旁聽約二時許衆始退即見黃興憂形於色靴聲達達旋繞庭前作搔首抱膝諸狀當聞有人往詢黃興何以憂煩如此並慰之曰金陵爲龍盤虎踞之地足可久守不必深慮黃曰余之計畫尙不在此君言亦甚確當俟商量再說五時各參謀各處長即奉到黃興緊急會議命令時仍大吹牛皮首述江蘇軍隊現已陸續開拔足可抵制南下之北軍無論若何余決不離此地生死聽之方纔滬紳來說勸余即息戰端不可再使滬地生靈塗炭諸君以爲然否衆皆失色無言

可對日本某太郎曰以我觀之今晚宜即出城不必再事留戀現雖尙有百餘萬現銀然不足支持焉有抵抗北方之能力程德全既來電反對此事大爲不妙不容不走一切有吾等保險云請勿多慮衆亦以走爲是黃遂從其請嗚呼羞矣

據知其內容者言即滬紳不來黃亦必走其必走之原因有數端（一）秘書處無人辦公（二）參謀僅四五人不足與謀（三）戰端既開軍費必多而黃則僅有百餘萬毫不足恃（四）軍隊陸續開盡並無後援（五）此次獨立不贊成者居多數以兵燹之後復又遭劫怨聲載道不堪入耳觀以上種種其不能成事也必矣

二十九晚十一時半黃興即傳憲兵四名謂現赴美領事公署商酌公事即回同行者爲何成濬章梓徐少秋等十餘人外日本人四名乘馬車數輛過北極閣蜂擁而去據憲兵回述黃等一至下關在第一樓稍息即坐

公共輪渡登日本兵輪駛滬初輪渡尙不肯裝載徐少秋出手鎗嚇之爾不開船即將爾打死輪夫不得已始允此則黃興去甯之真相也

自黃章去後各機關仍照常辦公各處討袁旗幟一齊收匿都督府秩序亦尙安然旋由監獄長舒學成電請程督返署維持甯垣秩序地方公會各機關亦有公電請程雪老迅速返甯

三十日民政長署及浙甯縣知事已出示宣告取消獨立人民安堵如常惟急盼程雪老早來藉以鎮壓

黃興出亡後第八師長陳之驥即函請甯垣各機關派員會議其大意謂准章梓洪承點冷適等函言現奉都督電以時勢可危取消討袁之議當局諸人亦均離甯遠適並電請都督早日回甯主持一切於都督未臨之前所有地方秩序急應設法維持用特函達即請駕臨敝師面商一切
(下畧)

甯垣各機關請程都督返甯之電約十五通乃得覆電

甯垣晚間八時即閉城門仍由第一第八兩師擔任保護秩序通宵達旦兵警荷鎗逡巡不絕江蘇都督府及民政長縣知事皆有告示勸令居民勿驚徵諸人民口碑咸謂此次亂黨無異草寇方其宣布獨立時識者早視爲搗亂逆料不滿三禮拜必至敗事今果然矣猶憶黃克強誓詞有不滅袁賊誓不生還之語則袁無恙也而偉人已生還矣故甯垣茶坊酒店咸以此爲讌談亦可見人民之心理矣

黃興暴戾性成自爲總司令後舉動橫恣不可勝述瀕行時仍欲令衛隊扼守要道如有他變即以機關鎗擊之且曰余苟死於此地亦必使反對者死盡之而後已幸有何某力勸得無別故發生否則金陵糜爛更不可收拾矣

甯垣復見非國民黨報紙人民爭來購閱非常踴躍幾如久處黑暗而今

始睹光明者然方倡亂時甯垣報館如中華報黃興給洋六百圓民魂報洋千圓皆極力爲之鼓吹至如滬報凡非國民黨之訪員均派人秘密查察今甯垣一般妖報已盡銷滅非國民黨派之訪員居然無驚黃興伎倆不過如是真可笑已



國民黨之回顧錄第三卷

李烈鈞與國民黨本部往來密電

其一

宣武門白廟胡同大同公廨徐君子鴻鑒鴻密現值選舉告竣正式國會成立在邇如憲法問題選舉總統問題組織政黨內閣問題立國大本胥待研究憲法宜取民權主義本黨素抱此旨將來國會必可本此製一完美憲法惟總統問題現聞本黨主張約分三派主張既有紛岐進行恐難一致就鈞個人意見將來正式總統以推黎爲恰適蓋第一次總統本黨不忍爭取惟求得一向無成見能行本黨政策而又於目前握有政權與政府匹者爲之則本黨不居爭代之名而已收實際之效且黎道德高尚南軍將領頗多佩服北方軍隊將校爲黎舊部亦復不少事實上亦不虞不濟惟欲舉黎有不得不爲先予後取之一條件即聲明將來內閣只求

爲真實責任政黨內閣不問其爲誰黨組織是也蓋不如是不足以取信于他派無以見吾黨之大公果其國會吾黨既占優勝大勢所趨吾黨既不欲組織內閣恐亦無受讓者大計所關未可忽視前電詢本部意見迄未得復不識北京一方面輿論如何本黨重要人物意見奚似祈就近爲探詢如遇與鄙見相合者即請鼓吹聯結否則暫守秘密擬不日派員赴滬與克強鍾初溥泉諸公商議一切再行電告至本部在京一派如必欲屬之項城則鄙意以爲須取聯邦制或可挽救萬一卓見如何并盼密示再口已到贛解決未定鈞江

其二

宣武門白廟胡同大同公廨徐君子鴻鑿鴻密本黨議員多已北上重要事件似仍以到京再商爲善免被人算請速與本部接洽商定分電一致進行爲要鈞卅

其三

宣武門白廟胡同大同公廨徐君子鴻鑒鴻密皖湘粵贛爲共圖國是起見各掣全權代表分駐京滬協商皖推汪律口常恒芳湘推歐陽君允夷粵推廬君信葉君夏聲鄙人特推執事與王君有蘭爲駐京代表王已赴皖會議請君在京與各代表接洽再駐滬代表均未推定報載都督團或即指此希秘烈鈞銑

其四

李都督鑒速譯穆密穎亭游移勘日決選議長乞速逕電上斜街止甯館堅囑舉吳干潯宥

其五

宣武門白廟胡同大同公廨徐君子鴻鑒穆密宋案借款兩事發表全國激昂中央悍然不顧可殲現在情形如何望隨時電復鈞光印

其六

宣武門白廟胡同大同公寓徐君子鴻鑒穆密鄂已派員往查潯駐一師已早布置昨并電湘商派一軍進駐岳州以東地區與潯軍成崎角之勢蔡森早擬他調曾電商粵鎮防君可謂法律家而兼軍事學者矣本部需款可撥二萬鈞文西印

其七

宣武門白廟胡同大同公寓徐君子鴻鑒鴻密黎氏請兵必與中央別有計畫殊不可靠已派員赴漢調查今日爲大局計無論世局人心如何變幻總要毅力進行希轉王君鈞真西

其八

白廟胡同大同公寓徐君秀鈞鑒鴻密贛省專治不日實行軍政亟宜統一九江鎮守機關已成駢枝昨已取消並請電調或內用今晨即奉總統

內令據王查辦使稱潯贛兩軍不和調戈面詢事件鎮守使事務由王彙行兼管附近軍隊歸其調遣等語雖云暫局王使即無他志然窺中央用意顯欲於揚子江重要口岸拒我兵權布其勢力且本省軍隊自應歸我指揮中央由王調遣之令將士聞之頗爲勃勃亟應從長籌計請即赴本黨本部趕速設法來電催王赴京俾免鎮守機關長留中央得以利用切盼烈鈞宥

其九

宣武門白廟胡同大同公廨徐君子鴻鑒鴻密速催趙到任以便移駐潯陽鈞沁

其十

白廟胡同大同公廨徐君子鴻鑒鴻密頃接鴻皋來電王鐵老由潯致中央密電有請政府派兵南下某願以死報之語乞注意等語此電是否聞

言抑係果有其事請速就近密探并須與本部重要諸公特別注意詳情如何盼隨時密示烈鈞叩卅

其十一

宣武門白廟胡同大同公廨徐君子鴻鑒鴻密兩號戈克安密派壽儉表來潯勾結軍隊圖謀不軌並約夜間放火爲號十時城內考棚果有奸徒放火各軍深明大義不爲所動當經九江三營兵士拿獲梅貴林一名搜出物件然別無內應由陳總台兜訊明正法現第九師師長已委周璧階接管護衛軍第三及機關炮隊均已判潯人心大靖又貯款須備軍用非萬不得已勿動鈞灰

其十二

宣武門白廟胡同大同公廨徐君子鴻鑒鴻密潯事可望完全解決京各黨態度如何本黨議員是否團結聞本省本黨諸君甚爲融洽遇事均能

一致進行爲各省冠祇深堪慰嗣後仍望努進立全黨模範畚紘已準備一切只候諸君命令也本部經費尙支持否餘已另電照辦矣鈞陽印

其十三

宣武門白廟胡同大同公廨徐君子鴻鑒穆密轉本黨參衆議員潘宗海陳子斌賴慶暉歐陽沂辛際唐鄒繼龍戴書雲曾幹楨彭學浚賀贊元蕭輝錦朱念祖程鐸盧元弼邱冠芬燕善達劉濂王恒羅家衡盧式楷鄧元周澤南黃格鷗湯漪陳鴻鈞王有蘭黃攻素歐陽成文群王點鄒樹聲符鼎升張于潯黃懋釗國會成立瞬逾浹旬伏審勤勞我懷靡已公等大局關懷素昭令譽常山一氣至所服膺方今時局直繫存亡苟無久遠之規必肇分崩之禍各重要問題迭奉函電知已瞭究盡善決定方針深爲前途慶幸但茲方針能否實行收效全視本黨議員團體奚若諸君愛黨愛國不畏強暴不爲利動千望本此精神聯絡各省同志一致進行立萬世

共和之基除少數專制之禍烈鈞不敏謹當勉隨驥尾共圖挽此狂瀾也
臨電神馳盼時賜教烈鈞叩徑

其十四

李都督偉鑒鴻密孫口口云公與某七省聯合對付中央此議已由閩浙
入告中央極爲銜恨又武昌因退伍軍隊謀推翻某師長事洩架害蔡濟
民蔣翊武詹大悲等傳聞俱已被捕但劉一清並蔡等已往申袁氏利用
機會飭李純兵隊移駐武漢扼長江之要區布北兵之勢力此事全誤於
黎氏之請兵故李氏乘間而入本黨對於此舉極爲注意昨已派員赴申
與克強接洽矣秀鈞有蘭青

其十五

宣武門白廟胡同大同公廨徐君子鴻鑒鴻密昨李督電京准覆選舉調
查冊不足憑應以學冊爲准無學冊者則以其他之書類能證明者爲準

等語本日開庭雙方爭執查張益芳所控應以學冊爲憑究無實據刻張益芳要求審判所電請陸軍部查明張惠民江西陸軍小學及第四中學報部學冊年齡覆示以憑解決此案關係軍學司希即商請兩尺蘊誠諸兄轉托軍學司同志預將此項案抽去或收藏電贛會辦抑用別項方法並請商酌辦理時不可緩望速爲之名心叩齊印

其十六

淮鹽總局黃總理穆密財政部呈請任命熊元煌爲本省權運局長但尙未見命令應速由李督保我公充任熊縱到省或不予接任速酌秀鈞元

其十七

宣武門白廟胡同大同公廨徐君子鴻鑒穆密本黨議員曾許每員特別津貼洋五百元茲准王侃諸君電尙短十八人未領等語希查明撥送爲盼鈞照

其十八

李都督偉鑒鴻密京中旅費較繁同鄉各議員云臨行時公已面允各員到京未支歲費以前可由省支付每員每月二百元此事如應辦到即乞電示支款方法以慰旅况秀鈞歌

其十九

李都督偉鑒穆密本黨議員特別津貼共八千元已由本部支發粵已寄本部十萬元我公助款尙餘二萬元張繼囑緩送秀鈞效

其二十

宣武門白廟胡同大同公廨徐君子鴻鑒穆密聞本部需款甚鉅可再撥四萬元轉送接濟烈鈞篠印

其二十一

宣武門白廟胡同大同公廨徐君子鴻並轉孫震斑君鑒鴻密孫弟需款

一千元希由學鴻借給應用烈鈞艷

其二十二

宣武門白廟胡同大同公寓徐君子鴻鑒穆密接羣電安陸需款又接景梅九電國風日報需款希代借二千元各給一千交文景晒君轉交鈞刪印

其二十三

李都督偉鑒穆密徐君元浩在京旅費支絀函囑轉達並乞復准由分銀行撥助六百元以資應用分行事未能完全照顧有負委託近聞該協理擬將金谿館翻造需銀三千餘兩未免過費如何請魏司長酌示秀鈞叩徑

其二十四

宣武門白廟胡同大同公寓徐君子鴻鑒穆密希借撥花楞君洋千元烈

鈞皓

其二十五

宣武門白廟胡同大同公廨徐君子鴻鑒穆密鳴臬兄需款盼急行撥付一千元已行司備案矣鈞支印

其二十六

李都督鑒穆密贛鹽局有任命熊元煌消息參衆兩議長假定張繼吳景濂可望達目的趙從蕃決緩行國風報已照付五百元要素增加如何祈復大同公廨于潯史元

其二十七

李都督偉鑒鴻密李純軍隊逐漸移駐武漢應注意武漢相距甚邇宜派委員駐漢密探粵督宜派兵駐南雄蔡森調往別處或以粵兵就防贛南亦好此間紛傳我公聯合七省攻守同盟中央或有意外舉動公等應預

防也再本部用項支絀粵督已允撥濟十萬可否由公酌撥二三萬元祈電示遵議員補助費已借發秀鈞蒸

天津電

現據在津拿獲破壞黨犯陳康等案內底線報稱該破壞黨前因進步黨議員維持大局傾向中央有衆議院議員鄭人康主謀擬俟政府提交重要案件時進步黨員出席者必多即知照國民黨員概不出席以極暴烈之炸彈賄買旁聽之人携帶混入議場向進步黨員擲放期達其一網打盡之目的鄭人康曾於七月十八號自京赴津與陳康等秘議此事派定李洪範製備炸彈相機實行後經探員等會同天津警廳將陳康等拿獲並由物華銀樓商號起出之銀炸彈壳六枚即係李洪範所訂製欲以炸進步黨議員之物現在陳康等既已被捕該黨所謀仍否照議進行應俟探明再報



國民黨之回顧錄第四卷目錄

參謀陸軍部宣布亂黨罪狀通電

全國商界宣布亂黨五大罪狀

京滬贛人呼籲之通電

胡都督宣布熊克武十大罪狀

華僑代表沈智夫痛哭陳詞

何海鳴之宣言

國民黨之回顧錄



參謀陸軍部宣布亂黨罪狀通電

副總統張將軍都督民政長並轉將軍都統知事營官均鑒據江西李護軍使電稱贛事粗定元惡未誅若不臚陳罪狀布告國人恐公憤不伸外人且疑爲國事犯查僞總司令李烈鈞本一貪殘無賴不齒鄉邦前於光復時假革命名盜竊祿位已屬非分猶復野心勃勃圖謀不軌號召匪徒及攫得江西都督則盤踞把持日謀伸張勢力凡有血氣莫不恨其專橫而怨中央之姑息養奸尤可惡者強迫許醫生之女爲妾拘斃危典商之愛子於監攫取民財達七百萬霸佔民產至二十餘起觸怒輒焚居廬拒姦立戕生命遭此慘毒以吳城德安爲最多八月二號以屢戰皆北復入南昌復向商號勒索比前尤甚江西同鄉聯合會代表藍煒等指爲祿山陷京惟事聲色黃巢入篡大掠資財實非不倫之比擬僞兵站總監俞應麓與李逆同惡相濟威脅鹽商立交現款一百九十餘萬兩復押民國銀

行總理立交二十萬兩警官余瑞麟學生伍炳等於茶肆訾其污暴尋卽槍斃嗣後凡偶語而棄市者必數見黃緝熙黃緣李逆得充淮鹽總局局長捲逃公款七十餘萬兩僞敢死團團長蔡銳霆恣睢暴戾日殺不辜途人奔避未遑卽以槍斃教唆其妹蔡處女於同盟會引誘良家婦女與李逆恣其污淫不甘其辱者輒多自盡賀國昌自稱省長貪鄙橫暴賄賂公行假賑災之名提權運局存銀二十餘萬兩強佔有夫之婦待字之女竟於八月九號携重資美妾以遁魏斯炅職司財政貪酷異常省庫則盜取一空閭閻追咎不已賣官鬻爵分等計值綜其所得不下六十萬金李逆免官且函請議員會議贈銀八萬元由滬行滙交財政司有案司證周希頤身充警察總監竟在公民聯合會倡言獨立奮臂狂呼方聲濤李明揚縱兵劫掠大肆淫威致令十室九空老弱轉於溝壑受者痛心聞者切齒何子奇專以搜殺異己奪取厚資爲事余使大鴻湯使則賢送印至湖口

卽被慘殺棄尸大江林虎同一暴虐殺人放火日以爲常經過地方人民驚走劉世均陰賊險很陽拒匪軍陰圖內應侵吞兵餉賞犒數萬元意在逼變擾亂搶掠九江見我防內甚嚴遂挾多金愛妾夜遁歐陽武首鼠兩端中無所主雖非甘心從逆實有囂叫盲從僞講武堂堂長夏之麒於李逆主張謀叛時組織學生顯志隊爲敢死隊之變相僞電報局總理兼特別電報局長曾伯沅僞特別電報工程局長張魯璠僞守備支隊參謀長陶憲章均李逆腹心携款逃走僞軍需長趙其昌乘李逆去後携軍用鈔票三萬四千餘元而遁僞司令部秘書長任壽祺強迫議員表決獨立夏尙聲鄧撫輝歐陽吳安伯李念適李作舟何文斌均李逆徒黨徐蘇中黃用中張崗均會鐘豫章贛民等報館主筆李逆言論機關通電各省宣布獨立文出自徐黃張三人之手以上各匪甚於漢之赤眉銅馬明之李自成張獻忠溯其致禍原因皆出匪魁孫文黃興岑春煊等嗾使狂愚利用

兇殘遂至民不聊生半壁東南全爲牽動黃逆突入蘇軍全恃三十餘人後見衆怨沸騰深夜遁去孫逆外託調和內多險詐忍以中華領土賄賂他人迹其口蜜腹劍實爲民國第一蝨賊岑逆頑強兇橫婦孺皆知此次希冀非常甘冒不韙確爲黃逆傀儡孫逸虎俛現均逋逃海外坐擁多資酒色自迷逍遙法外尙復多方煽惑希圖再擾中華綜其罪惡滔天雖粉骨碎身不足以快人心而伸國法現被害之區前來伸訴者日數十起或室家盡燬痛風雨之飄搖或杼柚其空嗟饕餮之莫繼其橫遭匪劫者妻子離散墳墓邱墟其輪姦斃命者地下含冤人間飲恨贛省如是他省可知禍患相尋伊於胡底若任元兇漏網死灰復燃恐莽莽神州永無甯日除續查叛逆另密報外惟有哀懇大總統副總統分別宣佈罪狀電飭各省暨通商口岸一體懸賞嚴拏並照會各國公使該逆等爲內亂犯應幫同協緝庶得一併誅戮從此莊嚴燦爛之民國不至再有內訌則贛省幸

甚中華民國幸甚等語該逆等兇暴貪殘至於此極應請副總統會同各省都督民政長官將軍都統辦事長官飭屬一體嚴拿務獲以申法紀參謀部陸軍部文九月十二日

全國商界宣布亂黨五大罪狀

各省商會轉各團體均鑒辛亥義師首起武漢全國嚮應一致同符我商界同人雖材勢薄弱亦曾傾囊倒篋輸助軍需練甲興團發揚義勇致以軍興影響所及破產毀家不可勝數凡所爲茹痛含辛犧牲一切而不悔者誠望建造新邦鞏固國體脫專制黑暗之淫威享永久和平之福利不料建國以還百凡失望統一之局雖成割據之形未改中央則形格勢禁求旦夕之苟安地方則豆剖瓜分供暴民之荼毒偉人政客芻狗生靈權利自由此曹專利比款百萬磅公債數百萬取携等於宮中鐵道念萬里練兵二百萬兒戲何如孤注驕奢淫佚駕貴族而有餘詐術游談欺童豎

且不足摧殘國本敗壞紀綱固已爲政治之罪人國人所厭怨猶復野心不戢嘯聚爲生暗殺陰謀不絕於耳目誅叛討逆實藉爲口禪偶遂結合之私則最不合理之政黨內閣亦戴之若帝天略有怨憤之端則不成名詞之武力解決爲唯一之利器蓋由自始無寶愛國家之思想故無時無事不思破壞亦由自始無建設政府之能力故無一時一事合於規則我商界同人既歷受前朝秕政之厄復遭此橫逆不道之災上念國家前途自顧利害關係用是於國會初開黨見沸騰之日或組織特別團體或特令代表來京考求政局調和各黨於借款內閣問題略相商榷粗有端倪方喁喁待望憲法總統以次確定庶幾生命財產有所保障哀哀請命非敢瀆國會之尊嚴歷歷傷心實迫於同人之呼籲不料討論未終亂機已播李烈鈞舉兵湖口黃興等稱叛南京私通外人散布死黨僭竊土地布告獨立同種相殘斷絕人道塗炭民生擾亂治安中央爲統一國家整飭

綱紀計不能不大張撻伐誅絕叛徒同人等亦不願復有議論惟念戰禍蔓延一日則我商民多受荼毒一日今日之事既非辛亥可比則我商界同人當曉然順逆斷絕叛徒之禍亂庶幾禍亂速平生機有望用是竭誠通告中外商界同人以資採裁蓋叛黨藉口名曰討袁袁公爲國會公舉據約法僅有彈劾去位之文別無武力解決之道且總統另選在卽彼等若有雄才碩望足副國民公意何不靜候選舉若謂恐袁蹂躪國會有名無實則何不待其實以軍警干涉攘奪總統時爭之而遽於今日動此無名之衆在袁公則並無不法之歷證而彼輩之破壞約法破壞國會破壞民國之罪則已萬口難辭是爲順逆之辨一也彼輩動稱政治革命矣論南京政府醜德彰聞歷史具在就令國民善忘但以彼等之跋扈自恣妄誕大言如前所云何足代興况於政治罪惡十有八九彼所造成彼等稍有良知正宜剖腹絕頭以謝民國何得唾面不羞埋掘由已是爲名義之

欺人二也又彼等一部分人動稱此次舉兵係北軍入贛所激變無論彼等藉口政治革命不應自比土寇判兵一激便變民國統一後不應有南北軍之分大總統有統轄軍隊之權徵調指揮非彼軍人及一私人所能干涉卽以事實論之李純之軍係因亂黨在武昌謀逆由黎副總統徵調而往其出九江實因陳廷訓先期告變蛛絲馬跡歷歷可尋諉罪於人尤爲事實之紕繆三也軍勢優劣非吾人所忍言以本國人之心理論則人心厭亂縱有響應不過十數小醜之跳梁決非真正之民意以外國之心理論則歷來各國政治監督之正則不出此途今日事勢非往日滿清無法令機關時代人民不得已而革命者可比則其嚮背不待耆龜縱有某國數輩浪人爲虎作倀然決非其國政府之意若彼黨竟甘心賣國供彼犧牲則一國攘臂誰肯後之瓜裂之禍實爲叛黨所奉遺於我民國者則更無結果可言是爲成敗之數四也况彼等自造亂以來殘殺異黨軍人

毀滅異黨本部人道公敵自不待言其終效所至非造成山嶽黨恐怖時代不止尤宜撲滅亂機涵濡元氣是爲公理所在五也至於列強瞻視動定安危全國瓜分之危縱可幸免財政監督之禍已屆目前若令叛黨囂張肆志禍亂日彰則全國陸沉彼曹固已不恤而我無辜商民焉忍淪胥共盡今但斷絕一切與叛黨之經濟關係及表示我人民社會擁護約法確愛和平之真意副世界各國邦人諸友之屬望燭火熒光不滅自息金甄玉璧碎而復完絕續存亡在此一念掬誠宣告哀感交集伏望鑒察並復玉音北京商務總會全國商界聯合會公叩儉七月二十八日

京滬贛人呼籲之通電

贛自光復後馬毓寶入督南昌縱匪殃民贛人不堪其苦因約李烈鈞以爲代國珍時充臨時省議會議員實主持之李蒞任後治兵懲匪一時地方秩序稍整鄉人非不德之唯李以武夫愚好自用又喜引僉佞凶頑之

徒入居幕中用人行政大率權操彼輩遂至倒行逆施任所欲爲外則反抗政府內則糜爛地方使我贛中父老子弟獨受共和之禍是皆李一人咎也條舉其行厥罪有四各縣知事多其戚友私人其藉端拷詐狗黨舞弊者十居其九廣豐知事汪錕南誣蔣文瀾王賡心俞良駒等爲匪及以兵力解散政黨萬載知事蔡安邦率兵圍毆龍洲小學教員楊子光彭兆榮等上饒知事李建鼎誣崔思敬爲匪及串通王賡謨拷詐河口富商汪饒等其他藉國民捐藉禁烟藉控案索詐者所在皆是朋比爲奸慘無天日鄉民迭控均置不理至徐秀鈞蹂躪商會蔡銳霆率兵在街市槍斃行馬假傳命令拘拿黃金城有梅姓誣人爲竊案經地方審判廳判結徒二年已逾上控法定時間高等檢察廳不受理蔡銳霆以得賄千元持手鎗率護兵威逼該廳長陳邦燮辭職均人證具在事實昭著亦不加處分至派武員住守各電局檢查商電任意壓抑侵害人民書信秘密之自由尤

其小焉者是其橫暴視強盜尤烈此徇私虐民之罪一強逼富伸危 修
認公債十萬不允其請遂下獄又以抗命增罰二十萬危至發毒死獄中
歐陽霖之子周扶九之店夥周麗權均曾以勒認公債下獄鐵路協理羅
朗山經手路款毫無出入竟派兵拿監於獄前雲南知縣胡思義以任內
交代不明不及三千元滇督電李傳胡到滇清理並非令其拿辦李以挾
夙怨命令新昌知事夏士藩拿胡到案嗣因合縣紳耆出保夏准暫釋李
聞大怒立即派軍隊前往抄沒胡家拘其六十餘歲老父及夏知事等迄
今繫獄蔡銳霆生性好殺平日被誣冤死其手者不可勝數臘月初十晚
之變路獲六 餘人概目爲匪不加訊問手殺其頭以自稱快見者謂剃
頭挑菜車夫等亦與戮焉草菅人命視專制魔王尤甚是恃威賊民之罪
一上年冬傳令財政司以由鄂入贛時軍隊所持鎗械皆未付價應撥十
二萬交本省糧餉局其實並無領款之人徐秀鈞總辦民國銀行黃緝熙

督銷淮鹽總局本與狼狽爲奸外間傳言徐黃虧空至百餘萬近觀李謊報該銀行所發紙幣數目希藉中央發款彌補則所傳未必非真江西舊入歲約七百數十萬兩現加截留淮鹽入款合逾千萬兩新發公債三百萬猶在外上年解濟中央不過十餘萬行政費視前清尤減軍數實不過一師以臨時省議會豫算爲無效任意揮霍宮中府中不分歲出至短二百餘萬是營私誤國之罪一贛中軍數本不足兩師近竟增爲兩師部令雖飭緩議李自下命令俞應麓爲第一師師長劉世均爲第二師師長至今名目猶存由滬購辦快鎗七千枝藥彈八百萬粒用黃留守舊護照報關冒稱係馬毓寶督贛時所手購其實馬所購之槍係亞地士洋行三千枝因檢出多係舊鎗由都督府代表余維謙在滬起訴同於臘月二十六晚在滬晤余稱已延律師二人於數日後方訊此次運潯之槍聞係太來洋行於上年九月在滬訂約十一月卽派副官鄒某赴滬押解數既不同

物亦迥異是明明反抗中央之部令林虎所率桂軍本係黃前留守衛隊李私調來贛是侵越大總統帥全國海陸軍之權現於各府設徵兵局命令星火徵調四出其徵兵令登載本省都督府公報命蔡銳霆添練陸師一團亦見之公報現已命率駐湖口是破壞參議院議決之裁兵案九江鎮守使戈克安自奉部令截留軍火後李視爲叛命派其秘書戈乃康卽克安胞兄爲宣慰使說戈投誠緩自儕於小朝廷之列是謀逆叛國之罪又一以上所舉不過其犖犖大者其他視國政如兒戲等法律爲弁髦以人民生命財產爲不足愛惜而私人之富貴權勢則必須保全者又豈可擢髮數光遠等坐見其誤國殃民至於斯極維桑與梓未免有情因於上年十二月初函商旅京同鄉請其電李要求軍民分治竊以爲李所長在治兵所短在治民如能截長補短兩效其用外而大局內而地方均能實受其福時李亦勉應所求電請政府簡任民政長大總統乃有任命汪瑞

閩之令汪之門生舊部徧滿贛中倒屣歡迎自出真情李初似亦無他嗣爲二三敗類所唆聳意乃動蔡銳霆陳廷訓出頭坐鬧民政長行署限汪二十四小時內出境直以敵國使臣相遇李時而使人慰留時而使人送行是非有意招汪則卽不能約束部下二者必居其一汪退入京李藉口冬防派兵駐紮湖口九江建昌吳城等處現蔡率兵四營住湖口於上月三十日內河小輪名飛渡者駛過該處列隊放鎗擊斃該船劉姓二副自三十一日始各船均不敢通行南潯交通爲絕此豈冬防所應爾乎查贛中現在並無大宗土匪况九江湖口既有鎮守使兵共三千以上何須更增重兵廣信袁州向多土匪出沒何不聞派一兵置腹地於不顧獨傾力於門戶一隅司馬之心路人皆見謂爲有意藉禦中央派兵之來夫豈過言黎副總統屢電調停亦悍然不顧查李之部下素本不爲所用故屢次兵變歐陽武劉世均平日皆深明大義恪守法紀者獨以上迫於李之命

令下脅於蔡陳之凶暴至不能不隨波逐流兼旬以來省中謠言四起居民惶恐遷徙頻仍似此內外相持羈時不決小之糜爛地方大之破壞全局爲禍將來甯可思議光遠等自慚誠信未孚不足以感格兇頑切念前途殷憂何極伏維諸大君子崇德碩望舉世所欽日見大局之危地方之苦當繫雅懷未能心安敢乞迅賜援手使國家無分裂之禍贛人解倒懸之厄其功不在禹下矣豈徒一地一時之福哉臨穎神馳不勝迫切待命再光遠等京滬異居此電經函商確定由京譯發合併聲明梅光遠陳三立謝遠涵吳宗慈夏敬觀郭同李國珍謹叩

胡都督宣布熊克武十大罪狀

大總統國務院陸軍部參謀本部參議院衆議院武昌黎副總統各省都督民政長護軍使鎮撫使各軍師旅長省議會瀘州周師長並轉各報館鑒自李逆倡亂湖口荼毒生靈破壞民邦凶國害家普天同憤中央政府

急斯民水火之厄命將出師聲罪致討旌麾所至望風先靡元凶禍首或則捕誅或則逋逃海外妖氛淨掃漸就救平而川省元氣銷沈肇養生息猶虞不給不意熊逆克武豺狼成性陰謀狡險身任師長甘作叛徒竟敢於八月五號在重慶宣布獨立傳檄討袁軍總司並以楊逆庶堪僞稱民政長蹈李逆之覆轍作民國之公敵兩川父老義憤同申茲當誓師之日爰擬列其罪布告全國用張撻伐服從中央軍人天職政府如有失德國有監督職該逆附從亂黨吠影吠聲僞號妄加狂悖實甚失軍人之本分作盜賊之行爲遺羞同胞顯然背叛其罪一官吏命自國家法律自予進退國民本同身分言誼况屬桑鄉乃該逆變叛之始即將重慶高等分廳監督檢察官馬柱首予槍斃重慶警察廳長張經綸川東觀察使趙一德等因不肯附和謀叛均先後遇害並槍斃立功民國之藍炳成劉春發等數十人弁髦國法自戕同種其罪二政黨發生根於國家政見雖有同異

詎能視爲讎仇該逆竟不問是非不辨誰何凡非國民黨籍者悉行捕殺流血伏尸日有數起俊乂遭殘冤氣彌天其罪三該逆既叛搜括官私各款至二百餘萬抑復扃城閉柵按戶勒財不遂其欲卽行槍斃並向商團民團勒繳槍械群情憤激遂致闔埠罷市猶且嘯聚徒黨招納亡命縱其四出剽掠以資盜糧逆跡昭著人皆道路以目其罪四四川省人民素明大義該逆反抗中央誰敢依附縱有迫脅皆非本心乃竟捏稱全川獨立汚辱善類吾川父老天良未盡誰能甘心其罪五自該逆據渝稱亂商旅危害全市騷然貿易停業金融立枯致人民生命財產受無窮痛苦自由幸福埽地無餘其罪六叛跡旣彰猶敢密遣亂徒到處誘惑以社會自由之名行勾結煽亂之寔豪徒橫逞民無寧居其罪七地方官吏任自中央該逆擅以僞命脅使服從守正不屈立遭慘禍壞法亂紀至於此極其罪八報館記載未當自有法律制裁該逆構難之初綜正論日報摘其譎謀立

率亂黨搗毀報館並捕主筆向堅中慘刑治罰摧殘正士累絀幽閉至今
生死未卜其罪九重慶係通商巨埠外人旅居素敦睦誼該逆敢行稱亂
罔顧大局藉爲負忿之計甘逞殘毒之行其罪十景伊待罪蜀疆每以川
省瘡痍未復民困未舒年餘以來不惜委曲求全遇事竭誠相待猶冀該
逆激發天良即時自効保全桑梓鞏固國基殊意狼子野心梟獍難化忍
啓鬩牆之釁竟操同室之戈景伊受中央之倚畀爲七千萬同胞所屬望
胸填義憤誓埽此獠師旅旣陳泣血爲言尙祈垂鑒四川都督兼署民政
長胡景伊叩佳印

華僑代表沈智夫之痛哭陳詞

雪蘭峨膨亨兩屬各埠中華會館中華公所書報社諸公鈞鑒公啓者弟
曩於武漢倡義之後廣東未光復以前與諸公握別東還故國以盡國民
義務迨南北統一地方秩序既有當事諸公擔負其任弟乃卸責於去歲

秋冬之間由粵南渡原欲於省親後再與諸公握手藉聆教益甫一蒞埠正適各埠覆選代表回國充華僑選舉會會員諸公不以弟爲不肖以二十五埠代表之責委諸弟一人之身弟以責任綦重辭謝不敏至再至三不蒙允諾責以代表回國選舉議員事殊重大經衆推舉義不容辭弟自維智識薄弱舉動必虞隕越弟以辭不獲命遂不敢不勉承雅意而力任其難卽於十二月負二十五埠代表名義再與諸公握別東旋及行抵申江而別埠各代表先我而歸者約有三十餘人弟與各人在滬曾應華僑歡迎會之招查悉各人均係以一人而代表一團體未有以一人而兼數團體之代表者蓋按參議院議員選舉法第六章第四十條華僑選舉會由華僑僑居地所設各中華會館公所商會及書報社各選舉人一名組織之又查參議院選舉法第四十三條華僑選舉會會員因故不能到會時得具委託證書委託相當之代理人到會行使其選舉權但代理人以

代理一人爲限按照此等條文是弟以一人代表二十五埠各團體而所投之選舉票不能多於一數以上是弟一人雖充二十五埠代表名義然不啻喪失二十五埠之選舉權况吾二十五埠華僑向以富庶著者統計僑民達八十萬餘之多而吾二十五埠之各團體對於祖國未光復以前奔走運動籌畫軍費幾難悉數民國成立以後對於祖國經濟之籌助各部尙未詳查實數卽就雪蘭峨膨亨二屬而論亦將百萬我二十五埠團體之熱誠愛國厥功甚偉國家予我華僑以選舉及被選舉權而我華僑當之確無愧色烏可以弟一人而代表二十五埠團體而損失無限之選舉權哉是以弟當在滬時經先後寄函發電請各團加派代表迅速來京選舉言之詳矣弟於寄發函電之後卽與膨亨埠代表徐公輔君婆羅洲代表黎海如君武來岸埠代理代表沈遠行君偕行抵京息裝後而工商部派員招待慇懃備至而弟等居京無事惟日盼我二十五埠之各團體

再派代表之來久之又久毫無影響至正月初間始迭接我各團體函電概謂爲時已迫來亦不及委請託人代理弟既一再受我各團之委託自惟戰戰兢兢日求所以副諸公之雅望乃往還於國民黨及華僑俱樂部并北京華僑聯合會事務所磋商多次皆謂可就京委人代理當黎海如君到北京華僑聯合會事務所適有華僑聯合會幹事（李竹舫）蕭天任（嘉應人）（本黨黨員）與接洽由黎君介紹李君與弟互相交談李君極言本黨諸公或謂選舉權之不可放棄遂由李蕭先後介紹其同鄉之在京者各十餘人且云品學皆優足供指臂弟直人也腦筋復甚簡單凡所交際罔不推誠相待以己度人我既以誠待人想人亦必以誠待我兼又選舉期迫如再遲延事機或恐貽誤於是卽急不暇擇故於接到各社之公文證書後卽委李竹舫代理安邦埠安邦書報社代表張彬代理沙叻埠昌民書報社代表夏鐵漢代理雙文丹埠斯文書報社代表李致偉代

理加影埠文華書報社代表何拓菴代理雙溝勿西埠光漢書報社代表
陳友衡代理呀吃山埠民新書報社代表李穉陶代理萬撓埠籲智書報
社代表何 笙代理叨思埠公益書報社代表張國範代理甲洞埠開明
書報社代表余建光代理吧生埠同盟書報社代表何審其代理龍邦埠
龍邦書報社代表蕭隱子代理都 埠啓蒙書報社代表謝寅杰代理加
蕉埠啓明書報社代表王維崧代理嘮叻埠中華書報社代表以上代理
各人經弟電商諸公均蒙各自電覆許可其外各中華會館及公所等雖
有函電請托代理其奈公文證書未到故亦無從爲力至十八號方才接
到而選舉亦告竣矣同時荷屬代表黎海如君亦舉李及代理百舞爐埠
啓新書報社代表梁繼偉代理淡水港埠覺新書報社代表李任代理東
萬律埠擴智書報社代表蕭天任代理百樹下埠羣生書報社代表李典
五代理夾卡罈埠華生書報社代表以上各代理人俱駐京者於工商部

領得文憑後除謝寅杰（湖南人）李任王維崧張智李竹舫余建光何審其等七君誠實忠厚不惑於利外其餘由蕭介紹之人皆以爲奇貨可居者計此次代表一百六十餘人真由各埠選派者查確不滿五十人蕭介紹之代表各人竟有附和駐京僞代表等聯合舞弊怪象百出聞有運動被選者甚不乏人賣票買票奔走不暇以選舉之場變作買賣之地故有既收定金之後復又轉售他人以一票而賣至十餘次者復有三五不肖之徒與駐京僞代表等蛇結一窩以專賣議員爲發財之終南捷徑以金錢多寡爲先後被選之次第甚至最末之候補議員每票價值亦有三十餘元故選舉之日於選舉場上演出掠票及各派心腹督迫填名種種怪劇而第一次選舉本可選出議員兩名以無聯絡及有狡弄爭奪於其間故祇選得美屬代表唐瓊昌一名第一次選舉之後弟與徐黎二君等憤斯怪象無可維持不得不潔身自退同時放棄投票之權事爲馮自由易

次乾兩君所聞卽邀徐黎二君與弟磋商並謂此次華僑選舉宜由國民黨一手辦理以免臨時紛亂生出弊端如以爲然則排弟爲第六當選人等語弟答以被選與否可不必計惟既係出於本黨公意理當絕對贊成詎選舉至於四次忽提出盧信之名爲第六當選徐黎二君聞馮易二君變其前議更爲不平且以盧信君雖爲本黨中之一差強人意者第其既爲臨時參議員不思盡其爲民代表之責因謀正式議員之故竟放棄臨時政府期內應議之案於不理原粵運動至於失敗轉行電京代謀倘將來人人效尤則所謂代表民意之立法機關必成虛設故再堅執不復投票然以弟之眼光觀之似此無價值之議員實類敝屣得之固不爲榮不得亦何足爲辱古云與其無譽於前孰若無毀於後弟自念菲薄蒙諸公不棄推舉爲二十五埠之全體華僑代表而於此次選舉情形豈可不以所目擊者略爲布告迺者選舉告竣凡由弟所電商我二十五埠團體所

委之各代理代表理合將名義取銷以手續而杜假藉如上大略情形俱弟選舉告竣以前所辦之事後此所辦各事如何自當續行報告區區寸衷希爲鑒原順頌公安民國二年二月二十日弟沈智夫謹告

何海鳴之宣言

(前略)予之欲爲此言也久矣顧久隱忍而不發者亦自有故今忍無可忍矣不如及早出之以免人反唇之譏嗟夫閱者諸君乎此中一最大之黑幕予將爲閱者揭出之予先欲爲一言以問閱者予究爲國民黨諸大偉人之黨徒否想閱者必瞠目結舌不知予意之云何也在袁世凱上諭中予之爲逆夫何待言且予固甘爲此逆也然贅以逆首黃興逆黨何海鳴之詞則予意實有未滿雖然此不特袁世凱然也卽一般國民在南京二次三次獨立之時亦莫不曰此國民黨諸大偉人所爲也何海鳴必卽黃興所派往者也其至南京時不知得國民黨許多金錢始克運動至此

其實此中內容國民究知之否予今不能詳爲國民告一言以蔽之則予固單獨之行動也

予是否爲國民黨人此無大關係者國民黨而爲諸大偉人所有則予寧捨此佳號而爲一尋常之人尋常之人亦有耳有口有腦筋袁世凱無狀卽尋常之人亦可討之原不必附和諸大偉人始得謂爲正式之討袁乃諸大偉人不然以爲革命者乃諸大偉人拿手之作其腦筋中殆嵌有包辦革命四字某也昔在某省爲留守則某省非某莫屬某也昔在某處爲偏安之都督則某省亦非某其誰推其究極殆視中華民國二十二行省爲諸大偉人之采邑然諸大偉人果能具大魄力以佔領此采邑則國民亦不得不拱手相讓乃諸大偉人其力又不能至此始也興高采烈決不許不附已者之攙入以謀壟斷繼也曇花一現卽飄然而去國民試思之二次革命之時期中如無予何海鳴金陵一戰者此二次革命之笑話當

尙不止此也

予之謀審事在黃興未決心討袁之前其時固無人信予者及黃興獨立之時司令部袞袞諸公自有彼夾袋中人物予實未履金陵片土爲意外之倖進及其逃也予乃不得不去予之去予敢信國民黨無一人知者予既至甯以函報國民黨中人猶哂予以鼻及爲陳之驥所陷也詆予爲少不更事者益多及再四獨立以至今日而僥倖二字固日日嵌在國民黨諸大偉人之腦筋中也夫事既徼倖矣其易也可知然則力拔山氣蓋世之偉人胡亦不去徼倖逍遙事外冷眼向人使予至今而尙痛心者有二事焉其一予既驅逐陳之驥後金陵始稍發現國民黨中之人而其宣言乃大不滿意予曰此書生也都督司令一席非某大將軍不可非某大偉人不可已勸駕矣行將至矣咄爾何海鳴若不退讓賢路者則汝爲爭權奪利之醜類夫爭權奪利之美譽予烏敢受唯唯諾諾以靜待

某大偉人某大將軍之至乃張勳偏不作美竟刻不容緩以攻予金陵於是某大偉人某大將軍竟不至矣至今思之予之都督司令殆爲張勳所賜如無張勳之逼攻則某大偉人某大將軍必至而予仍將爲主筆矣但某大偉人某大將軍如果早至金陵則張勳之入南京當不至遲至九月二號藍衣辮子之軍人入紅十字會掩埋隊者想無此纍纍若也其二南京自黃興逃走以後財政異常困難據國民黨某君所云黃之捲資當在八十萬以上及予入金陵百無所有飛函告急迄無應者未幾某君以三萬元來適與柏大都督文蔚相遇以四千托柏文蔚交予餘二萬六千竟挾之返滬及予事後調查此三萬元並非某君所私有者予費幾許唇舌向袞袞諸公乞憐承諸公大破慳囊集腋而得此數乃尙以全權與某君靳不予與四千金之犒賞受賜多矣况又爲柏大都督所作保者乎又未幾某君至甯亦携有一萬餘金乃悉數交柏大都督翼日某君去又逾一

日柏大都督乃挾此金而逃綜計之予在金陵苦戰二十晝夜得國民黨諸公之錢先後零星不上一萬而受指摘之處乃不能算其次數予小子雖不知兵然能拚死柏文蔚之來以其能知兵也但其得兵心亦不過如此及其逃也以一函與予曰（金陵困守終非久計弟率八師全部出南門矣）夫八師誰之八師予兼八師師長以不知兵故而讓與柏文蔚且以都督尊之而受其指揮柏乃欲挾八師而逃八師中人與予感情最洽又豈能捨予而去及其終了匪特八師不行卽二百個安徽都督護衛兵亦戀戀不肯去柏都督所謂出南門者惟挾有某君所贈之一萬金耳知兵之柏都督既逃不知兵之何海鳴尙存海上逍遙之客尙指摘予腦筋昏亂不能用人夫程度高聲譽佳之人逃去無遺後無來者予雖腦筋不昏亦無人可擇而用况予所用之人雖無程度無聲譽爲人斥爲流氓土匪尙不至怕死愛錢則雖爲流氓土匪當不稍遜不知予之苦者卽一

般國民黨人亦謂予之近况與諸大偉人同富而多金矣此種心理即國民黨一敗塗地之大原因予此次一嘗試都督司命之滋味對於第一次革命頗有所疑者則諸大偉人胡能得多金而歸予胡窮困猶昔也予之在寧先後不過耗去二十餘萬元軍士困苦極矣苦戰二旬乃未予以分毫之餉此二十餘萬不過發給養耳如無商會十萬之捐助並給養亦將不足予非喪心者豈忍再從中侵蝕若干以促諸軍士之死時予苟喪其天良從中侵蝕其時軍士又豈能容予計予在甯之日予家不可不謀升斗之需予之屬乃爲予先後共寄五百元至予家而中途輾轉受實惠者不過一百餘元天實鑒之此予作南京都督之所得也國民黨人不諒以爲予亦偉人其行逕必無不與偉人同豈有偉人而無多金者乎於是不特坐視予困而不一援手且有多人百方覓予冀爲贓物之分肥冤哉冤哉予真欲死矣革命必作都督作都督必得錢然非革命也括錢耳革命

予所表同括錢予則自愧不能括錢而稱革命之偉人則人雖偉予予亦不敢受故予乃終不能不一言也

國民黨人見予之名與偉人並列亦疑予爲富而且貴者與諸大偉人同受一般同黨予怨恨之敲索予又實無餘資可以匿居外國之旅館又不忍棄祖國而去爲海外之逃犯又向來未曾高攀某國大尉中尉少尉爲朋友得以上外國兵艦求保護予孑然一身四面受敵其結果亦不過是一個死字雖然予豈畏死哉予一無美妾多人二無金銀財寶及銀行存款與未抽出之公債票三無建置之高大洋房四無洋場出風頭之汽車男兒死耳夫何足慮但此趾高氣揚之皇帝與上逍遙之大吹牛家亦未必安穩過得去也（後略）

國民黨之回顧錄



國民黨之回顧錄第五卷目錄

調查第一件 大連函

調查第二件 兗州函

調查第三件 天津警察廳

調查第四件

調查第五件

調查第六件

調查第七件

調查第八件

調查第九件

調查第十件

調查第十一件 亂黨發電密本

國民黨之回顧錄



調查第二件

大連函

黃陳姚三人有聯名密電致柏烈武其內容有李胡解柄公必無倖理宜即日電辭如眷念舊好請速蒞滬共商大計等語此電本日送右任家請其列名聞于昨晚赴甯故此消息由于處透露

于赴甯之原因有謂其以南京追提柳人環之事而往探消息者

張繼于十五日前後有一長函專人送至上海其函中大意謂精衛在時卽有乘此時機主要各人毀去黨籍之語經武實首贊成南方諸君子亦見及此則進行宜速繼當辭去議長南旋組織毀黨以後計畫等語蓋近日國黨鑒于大勢知從前謀畫無一不失敗亦無一可繼續當時彼黨最激烈而最有深心者咸知如此支持必有不能支持之日且黨中有內訌者有趨避者號令不能統一故孫黃陳姚諸人發生一議謂毀滅國民黨實行虛無主義卽純以暗殺爲業是也此派議論在半月以前某卽有所聞日來此議竟日有進步黃意尙慮造端重大一懼事不能行二懼二三

等國黨反對最後有姚勇忱張浦泉之解決謂毀者自毀不願毀者聽但必需國黨一等人物全體贊同二三等黨員可勿論某以此消息觀察彼黨在南方動作頗有合點觀于專聘法人造炸彈兼教製炸彈一也陸惠生赴日本逗留長崎與俄日虛無黨會晤二也（此事詳下條）半月以前國黨頗搜括金錢供北方議員諸費今則半月以後搜括各省滙來之錢存于華俄各銀行三也某謂此事發生造因極大搗亂可以兵力解決至專以暗殺爲事則防不勝防其禍且未有窮而逆度彼黨當此窮蹙之時一二重要人又斷無束手之理或者其竟出此途乎

陸惠生現已知其確赴日本陸赴日之第三日通運公司有一職員南潯人李姓追踪前往聞持有張靜江褚民遺介紹虛無黨機關于陸者此機關聞在長崎蓋動身之第三日晚有一電自長崎發至通運司

在大北公司查出惟

電碼不詳有華林者去年即赴俄國講通社會黨虛無黨現已由俄而法而瑞

士而意大利聞所至各地各地黨人頗有歡迎之者張靜江實供其游費

十五號北四川路發見日人販售炸彈案此案表面由捕房查出（表面案由已見十六十七兩日上海各報如時事民立新聞等報）其實際則另有人秘密通知捕房以事在租界非由捕房經手則窒碍甚多此日人製炸彈事來源甚長蓋自楊篤生等謀炸五大臣時此日人寔爲楊之授業師與孫黃尤有舊而以日人宮崎寅藏爲綫索者先是有忠於中央之人探得北四川路有日人運販炸彈事因悉力偵得有來自安慶之楊郭二人在彼處購買炸彈遂卽作函與捕房密告此事捕房得函卽輾轉設法至三日始以重金覓得一日本掮客與日人製賣炸彈店說合另由一臉生之包探出面向之訂合同購炸彈一日訂定合同卽間中餽以安慶之購炸彈人已成交而去否日人駭然曰君知其事乎對曰知之且舊人

也渠現住何處今日來否明日來否日人亦狡者含糊以應而密以人問自安慶購彈之人曰君等有識孫姓其人否其人亦來定購炸彈者楊郭大驚知事敗露飛至民立報求計于范鴻仙范言無法惟有速逃一面以專電見民立報六月十六日安慶專電爲柏洗刷一面以密電告安慶（但某訪之電局是日無民立遞出密電不知其託何機關拍發也）觀十六日民立安慶專電可以見其遁飾及辯護之苦捕房翌日知假面目已露遂卽刻強硬拘拿（此二人並非製炸彈之人祕而又祕無從索得）該日人松川及另一日人送日領事頗聞日領事別有用意不欲在上海訊辦聞明日卽解長崎訊理此案遂無真面目矣黃興已由長崎登岸

調查第二件

兗州函

黃此行確擬回渠家鄉布置一切再赴兩川此信係出彼死黨王氏兄弟之口諒不誣也上月二十九之會果爲彼黨極重要極有關係之會內容

外表暨夫一切手續均異常嚴密全與前清時同盟會成立後累次秘密開會相同而又參以三合三點防範法到會者約有八十餘人強半知名人物據吳等云就目下本黨現勢而論在租界中開會原可不必如此嚴密惟今日有三點三合青紅兩幫哥老等會領袖代表在座恐爲捕房所悉從旁干涉又恐有奸人混入故一切均遵秘密會章行之將次開會時每門均派有二人把守均懷利器且下令如有人窺探竊聽者可將其人默默拉入從嚴究辦七鐘開會至十鐘散會既開會便將門口綠色燈撤去開會時不用鈴而用留聲機器逢聲浪高暨爭辨時開足大唱速記者甚多坐位之先後則以入同盟會之先後定之非同盟會則均坐兩旁發言則越前散會後該招待等十餘人逼令會員分數門出如係老同盟會而有國民黨之倒換證者無券無口號亦得入內此爲臨時纔曉得不及領券者言惟須有人認得及確指數人爲證到會人員中黃陳輩及彼二三等人物不計外有

汪精衛吳稚暉蔡子民張繼陳家鼎冷適等此外有日人三名一卽大名

鼎鼎之宮崎寅藏一爲平尾井次郎一爲松本義成

寅崎本認得二人係問書記始得者

又有韓

人三名西洋人兩名安南人二名印度人一名均不知其姓名此外便是

哥老三合三點青紅帮之五個代表到場各人大約均携器械首由飯桶

(卽黃也)報告開會宗旨及此次事起之原因暨其失敗之道有數人起

言失敗已失敗過去事不必重提惟目前經濟如何此問題一發黃言經

濟一事將來仍須照從前辦法設立經濟部集合同志中之熱心耐勞有

面子而交際廣闊者現在則除各戰地由主事就地籌措不足則略爲接

濟餉械外其大部分實僅由弟及孫中山二人籌畫孫先生擔任臨時費

大約係指各地已運動成熟起事後臨時之費用不如是則與運動費無別也

弟則任運動費以專責成

言至此復有數人起言如此辦法非但一二人之力量有

限且有偏枯及緩不濟急之弊

黃便接下道尊論甚是所以兄弟言仍須組織經濟部現在孫

先生自起事後迄今所得之款濟粵濟皖濟贛濟甯濟川悉數用罄昨日

來電擬自星洲取道舊金山入美一方捐募一方借外債陸續寄來至兄弟所得除黨事前所用不計外此次携回并舊餘之款實有百六十餘萬這兩星期內除援救同黨之關涉私人款項廿餘萬不計外餘賴以運動浙江蘇州四川東三省北京等處所費已屬不貲現在所餘實已不滿六十萬尙有目前最要緊之用途卽鄂湘二萬兄弟當一面致電孫先生屬其不計多少陸續滙來一面當趕速成部派人出外募集兄弟亦自不必說則經濟一項大約倒可無慮惟我黨此後進行方法究如何者請衆討論

以下均記議案無次序矣

一議決本老同盟會基礎將現在之國民黨改組一大黨內中分子如係怯懦脆薄狡黠者盡淘汰之而對於他黨及各界之同志與吾黨宗旨不悖者亦盡吸收之自今日議決之彼從速組合至舊有國民黨之存

廢聽其自然此黨宗旨以討袁爲結底

此語出後汪精衛吳稚暉云此黨宗旨現固討袁然袁倒後繼之者仍如袁則仍應繼續進行

總之此黨宗旨爲平民政治的革命爲求正真之共和不宜拘拘於討袁也

黨名另擬

一議決此黨內容略如前同盟會其有與現在時勢牴牾者變通之不足者擴張而增益之務使底於完備而後已所有內容之區分暨分部擬章草約撰規等均限一月內成立歲事撰據則暫舉張汪等

一議定對於本國出有之各秘密黨如三點三合哥老大刀青紅等會苟其宗旨不悖於本黨暨其行爲不至謬妄者均一律聯絡相助以成大事茲各黨各代表均在座如以爲可者請起簽名再報告各領袖允准後以便磋商條件締結合同

言畢五代表均起上擡簽名

一議對於各國志士視其對各該國宗旨與本黨之對本國相同而願互相扶助者亦如之

當時各案議決毫無爭執故均甚迅速此案却費半小時以各該國人除宮崎外均須繙譯也印度人繙譯尤難在坐有蘇子毅始得通過蘇卽曼殊頭陀一

博學家也會遊印度數年然僅熟北印語而在座中均南印人言語猶格格不通

一議武漢爲全國之中心北京爲全國之元首魯豫晉三省實爲腰膂吾

黨苟不欲作事則已必欲作事則以上數處勢在必爭倘不先爭上列

數省則必至失敗辛亥之成此番之敗其明鑑也然欲爭上列數處必

先有良基礎而後可查沿海省分如粵如閩如蘇如浙如魯如奉

直隸渤海灣雖

佳然與京城太近實逼處此決難做事

等省均內面中原外憑大海且均有洋人租借地與我

掩護之所進可以取退可以守下亦可以遁且該數省咸屬宏富之區

一有大事百萬之餉可以立集今後宜以此等處爲吾黨基本地而注

全力於京漢分餘勇於三晉魯豫苟有事於晉豫等處而可望在京漢

一爭者則沿海各處無論其土地之已得與否必與合力陰助之而其

基本之基本則以上海爲歸結蓋上海當兩洋之衝爲全國之咽喉對

於上開各處實有脈絡貫串指揮全體之能力苟不能於此立大本則

以上所謂閩粵諸省之基礎仍屬空談而武漢晉魯亦決不能爭

說至此又到辛

亥春間未在上海立基本粵省因之失敗暨秋天在上海設立內地總機關故武漢得以成事爲證

故今後上海一地同人應格外重視

經之營之務祈可以立足得以發展吾力而後已萬不可再毀信用致

失此命根

此暗指彼黨之招搖及不慎密者言

茲擬在上海設立總機關一處爲全國之老本更設分機關六處或七處至各處之分部則可竟設於分機關中惟武漢京津等大埠則不妨多設分機關以免危險此外如閩粵蘇浙魯奉等處咸設分機關多或四五所少亦兩三所此外各省會及名鎮大府一律設支部各州縣苟勢力已及者亦趕緊設立一遇有事總機關分派於分機關分機關分派於支部如身之使指臂莫不靈通惟上海一處須另立一運輸機關凡餉糈軍械服裝等件均得於此採辦轉運以與外洋通聲氣除閩粵外其餘捐募之款項亦當於是經理滙劃之此組織機關之大概

說到此間衆意如何贊成者起立一時滿場一致起立

右係汪精衛講演規劃當時衆人無不翕服

一議黨魁由推舉各機關長由選舉各總部由選舉各分部由委任惟暗殺經濟二部長員當令各本人自認此外交際部中之運動一科亦由自認

調查第三件

天津警察廳

十月一號得上海探報何海鳴於九月中派胡俠魂攜帶炸彈到京希圖擾亂議場阻撓選舉並有詐用政府軍隊名義挑逗英俄日各國意在惹起外交牽動政府各節當派員搜索胡俠魂尙在天津日界至六號早晨探員在天津日界佐伯洋行見胡俠魂雇人力車携有醬菜簍子皮包等件赴新車站又見胡俠魂將車上號碼鈔下令車夫將物件先送至車站本人又回佐伯洋行彼時探員僅有一人當即先隨人力車走入華界將該車扣住交與巡警即時回日界而胡俠魂已逃去不在該行祇得先將車物交天津警備司令官驗出炸彈四枚信三件

調查第四件

八月四號夜十一點胡經武殷汝驪季雨霖夏述唐向海潛杜扶東方潛汪兆銘劉藝舟偕十人共商於靜安寺路滄州別墅八號之樓上首由季君提議謂此次起事兵力不足與北方抗加之南方商人亦多離心日來各處戰殊失利湖南雖新募退伍之兵共有四師然器械不足襄陽一帶雖有動作之說究屬如何因電局密信不通未敢必其已勝是此時已暫歸失敗吾等倘對於永遠不有一穩練計畫則一經失敗之後民黨足迹恐絕於中國再起實難吾意吾民黨中人當分配三部一實行部二繼續部三暗殺部實行部專掌此次軍事繼續部擇吾黨表面平和稍有政治上之能力者不十分與聞此次之事且陽與袁黨聯絡實則佈置民黨實力萬一此次失敗此等人尚可留在中國作後起之備暗殺部擇最有毅力決心者亦陽與袁黨聯絡便實行暗殺經大家討論數次均經認可然

三部主持之人尙未規定俟後再陳

精衛發言謂此次之事終須調停南方兵力固不足言戰到底北方邊患正在眉急度之袁氏決不欲一戰到底意在得數個勝仗以殺民黨之氣但主張袁氏卽刻退位者表面上固如此說實際上袁決不讓法律上正式總統未經國會選出而臨時總統果從何說以退位乎銘意要求總統選舉會移至上海使袁之力量不能干涉則正式總統之選出定非袁氏吾等此次起事卽算有結果矣衆皆然其說博泉中山克強刻赴香港其餘諸人亦多有去者彼黨此刻最注意河南之事刻正設法組織

調查第五件

(甲)當六月內程家榿赴上海與黃興晤面說其與共和黨議員聯合以厚勢力興已首肯續爲人極力破壞謂必須用武力解決黃遂幡然變計自此次失敗後仍決從原議

(乙)胡漢民張繼等遁往日本與黃興及日人大養毅頭山滿等密商後并通告其黨人曰吾黨此次形式上雖形退步精神上反促進行此後正式選舉必操勝算無疑

(丙)主持此事最力者議員中爲谷鍾秀張耀曾林森徐象先等并有章炳麟爲之籌畫一切

右列種種情形確爲該黨黑幕中秘密決定者因亂事已平人多以爲該黨首要奔逃此後或不足慮不知該黨卽趁此時間竭力進行現已將次成熟矣

調查第六件

十一月二十七晚九時三十分黨人聚集於生活日報館開議事會凡與會之人欲至議事室者均有一符券由室外招待之湯振常驗明方許入內至一時許始陸續散去輾轉調查約得所議之事實如下

一此會主席爲姚勇忱速記爲邵力子

一所議之事最關緊要者十日以前戴天仇自奉天來一函三日以前白狼派心腹二人來訪周佩箴白狼派人來申之內容未詳戴天仇在奉天聞因馬賊與日人接洽之事與駐在大連之李書城略有意見請日本上海兩處黨人討論其事

一姚勇忱報告陳英士沈縵雲赴南洋與岑春煊赴汪精衛會晤事

英士赴南洋約在十日之前同往者共有五六人中有閩籍華僑黃姓聞彭壽松在香港候陳到同往南洋

一是晚之會有南滿鐵道執業之日本上村彥之助亦在座

聞此日人住在虹口南滿鐵道棧房

但另詢他人則言虹口并無南滿鐵道棧房此說待查

該日人係爲清理三井洋行與陳其美居正債項

之代表此日人著華服操北京語甚佳

一鄧家彥

即中華民國報主任現禁錮西牢者

之弟報告法租界破獲私藏印花稅票事件并請

願幫助其兄在獄用度

此次會議之結果凡討論之內容及決議之要點一時無從飴得但知關於戴天仇事件有請周仲材未知是否周洪潘補愚二人即日赴大連上村彥之助一案請日人以陳英士前在滬軍都督向日人借債案向北京政府積極索取取得之後提出十五萬元交回該黨但須由姚勇忱張鎮江邵力子三人中之二人以上簽字手收

按上村彥之助一案事迹離奇似不可解然告某者則斤斤然再三言之但言者從前未預聞此一重公案故未悉其中內容據另一人所言則謂陳其美在都督任本由三井洋行經手借有款項（不詳其數）在陳交卸時此款早已料理但未正式存案註銷其後陳於宋案後謀亂上海與三井串通仍認三井此項借款并未償還可向中央索取取得之後彼此平分

調查第七件

日來柏烈武已潛至滬上由渠主張將上海旅居亂黨人數調查確實仍竭力進行陳其美亦在滬渠等計畫于蘇于浙均從運動土匪入手刻下在浙運動最力之炸彈隊長方濟清日昨由滬運炸彈四十餘枚至董家渡即被鄭鎮守使拿獲預舉之浙都督雷鐵生亦於一號在滬被捕

調查第八件

黃胡汪李等佳月宥日在門司又開秘密會議一次黨人五十餘有汪精衛演說一節言簡意摯其大意謂吾黨自辛亥以還由秘密團體而改進正大政黨一時黨勢逐漸澎漲其中分暴烈與穩健兩派純初在政治上具敏活手腕思有以淘汰而振刷之忽遭異己暗算於是吾黨之中流砥柱倒矣黨勢亦因之一落千丈黨中不穩健分子遂窮思竭慮日謀推倒袁系政府吾嘗忝告諸同志在幼穉時代萌芽初生只宜蓄銳養精事事

退步而觀其成敗不宜以盲人騎瞎馬與他人爭競袁氏勢力方盛若以蜉蝣撼泰山實自不量力耳今夏贛甯起義吾實未敢贊同嗣因在座諸同志逼迫勉以時局艱鉅膺此仔肩吾意以兵力財力與袁氏爭雌雄卽愚夫愚婦亦知其必敗惟視民氣憤激爲勝負而已使袁氏悔悟依吾黨要求條件而行東南諸行省亦不致若是之糜爛而吾黨得以勵行其政策五年之中不費兵力財力使彼顛預官僚之政府不戰自敗自茲以往吾黨橫行國中直莫敢與爭而事乃大謬不然吾黨今在國中政治上已無活動能力完全失敗復歸於秘密此足爲吾人喪心而切齒也今日中國大勢同盟派固已無復待有置喙地其最令吾人注意者則公民黨出現於新產熊內閣時代官僚與戊戌啓衅公民思完全回復官僚勢燄永奉袁氏爲總統而儕梁士詒於內閣鞏固其羽翼進步在擴張戊戌人才推黎氏爲第二屆總統張騫爲第三屆總統使梁氏爲內閣實行其政策

然中國在此二十年中所攫得總統者非有兵權不能佔勝位且觀此一年中公民與進步在議院報紙必有惡劇戰吾黨須於此時出其沉著慢撥爭鬪視氣運爲轉移享收漁人之利庶可恢復我元氣想在座諸同志必不以吾言爲無謂之談也嗣黃李等均多數反對志在急謀復仇仍取決以粵閩湘浙入手刻遣聳動川滇勁旅同時起事以掣中央之肘先籌集三十萬元由胡經武李書城携回國中分散運動派鍾德貽携款十萬潛回香港搜羅粵省退伍軍官給予鉅資使混入省城運動內應又大連灣設通信總機關上海立一國內會議所遇事用東文密電遞至大連再轉發東京各要人

調查第九件

張勳慄悍輕疾善於用兵素爲叛徒所深嫉日本民黨及無賴輩本貌附叛徒陰攫厚利張之克復南京大爲渠等所不便加以軍隊進城不無疎

放故特加以搶掠燒殺惡名又因誤傷日僑事大起風潮必欲推倒張勳自便其私而後快夫藍衣雖張軍裝束然叛徒多有假之者張亦以此輩不法有壞軍人名譽當就地正法者二百餘人矧被殺者確係日僑與否殺人者確係張軍與否微特張不自承即日人亦無敢硬指者

叛徒因屢次失敗仍復力謀進行現已決定乘我各處平靖防堵稍疎之時南北紛擾牽掣我軍一面由陳其美王金發鈕永建等竄擾湖州甯波各處一面戴天仇劉藝舟潛赴大連組織機關部聯絡日本無賴及東三省馬賊並阿城伊通雙城長春一帶黃天教匪進窺奉吉各處一面由李烈鈞林虎等潛入湖南連合該省青紅兩幫並運動軍隊謀二次獨立

調查第十件

一南京自張督到日領事館後人心稍形安靜唯民間元氣大傷市面難復而城鄉荒僻處仍時有姦掠事皆叛黨爲之又乘隙造謠煽惑人心

並於中外官商間時用反間以圖破壞

日有人具無名函與上海領事言陳其美結合張督謀獨如前立又有具無名函與南京日領言張督欲劫領事館又有言張督是宗社黨仍欲恢復清制諸如此類

二現亂黨中有一秘密結會此會發議於日俄戰後至此次中國謀亂失敗益謀實行其大旨係聯給俄日印度中國等社會黨人彼此互助在日俄推翻帝制在印度驅逐英人已在各要處設立機關

三孫黃等在日日本暗中懸賞金十萬元或四五萬元募人暗殺政府要人
調查第十一件
亂黨發電密本

一代字之法不外重大要事如兵變炸彈及焚教堂傷教士之類如一電之中語言未能貫通不妨分作兩電拍發尤爲明白其餘能發者請仍發新聞電

二此項代字之法不過草創大略而於各處情形不同殊難合用請將尊處政界軍界大員重大問題電局不允發者請另編代字來信約定校正函復再行備用

趙	北京	錢	南京	孫	蘇州	李	山東	周	四川	吳	開封	鄭	雲南
王	陝西	馮	奉天	陳	吉林	褚	黑龍江	衛	山西	蔣	長沙	沈	武昌
韓	廣東	楊	桂林	朱	南甯	秦	福州	尤	滁州	許	安慶	何	南昌
呂	天津	施	漢口	張	蘭州	孔	貴州	曹	杭州	嚴	新疆	華	彰德府
金	蕪湖	魏	揚州	陶	宜昌	姜	重慶	戚	寧波	謝	張家口	鄒	常州
喻	廈門	柏	通州	水	清江	竇	湖北	章	嘉興	雲	馮國璋	蘇	宣統
潘	袁	葛	攝政王	奚	一鎮	范	二鎮	彭	三鎮	郎	四鎮	魯	六鎮
章	拱衛	昌	毅軍	馬	騎兵	苗	總理	鳳	議長	花	議員	方	劉揆一
俞	段祺瑞	任	周學熙	袁	朱啓鈞	柳	梁士詒	鮑	趙秉鈞	史	程德全	唐	陳振先

費	陸徵祥	廉	許世英	岑	教民	薛	總統	雷	孫文	賀	黃興	倪	張繼
湯	王芝祥	滕	陳其美	殷	湯化龍	羅	汪兆銘	畢	譚人鳳	郝	慶王	鄔	倫貝子
安	溥良	常	恭王	樂	肅王	于	洵貝勒	時	澤公	傅	振貝子	皮	禮王
卞	睿王	齊	濤貝勒	唐	端王	伍	大阿哥	余	鐵良	元	瀾公	卜	蔭昌
顧	錫良	孟	長庚	平	升允	黃	薩鎮冰	和	姜桂題	穆	段芝貴	蕭	倪嗣冲
尹	馬龍標	姚	曹錕	邵	何宗蓮	湛	靳云鵬	汪	馮麟閣	祁	王士珍	毛	張懷芝
禹	藍天蔚	狄	張紹曾	米	張勳	貝	張作霖	明	黎元洪	臧	李烈鈞	計	柏文蔚
伏	張錫鑾	成	王天縱	戴	全城罷市	談	土匪	第	師長	龐	掠搶		
大哥	總統府	二哥	參議院	三哥	衆議院	四弟	國務院	五弟	財政部				
六弟	陸軍部	伯	耶蘇教堂	七弟	交通部	八弟	工商部	大姊	都督府				
二姊	民政府	表弟	都督	姨丈	民政長	動身	被焚	四哥	教堂				
大妹	洋教士	不起	傷數十人	略痊	死數百人	已愈	死數十人	病	炸彈				

死故

速來

被刺被害

行兵變

疾

被焚手槍

危

死數人

歸

佔城

到逃

愈傷

回

不知下落

去

使館

嫂

洋商

叔

天主教堂

國民黨之回顧錄第六卷目錄

論同盟會無組織內閣之資格

論約法上總統之任命權及同盟會不宜再組織內閣

告亂暴專制之國民黨

黃克強專爲要錢來乎

亂事溯源

戡亂當清亂源

揭國民黨反對大借款之裏面普告國民

再揭國民黨反對大借款之裏面普告國民

斥徐謙布告國民之妖言

宋案之過去歷史

黃克強利用宋案之真相

刺宋案證據之研究

李烈鈞通電書後

論亂黨之罪狀

滬警痛言

論滬亂聲中宋案之真相

各省都督對於贛亂之態度觀

讀誅逆命令感言

岑黃之後來觀


論岑春煊之結果

爲亂黨與外人祕密事哀告國民

湘事豈猶可再誤耶

論孫文賣國之罪狀

論孫文致某國要人函之狂悖
駁孫文致某國人書



論同盟會無組織內閣之資格

(京報)

唐紹儀遁後邦本漂搖大總統鑒於黨爭劇烈各政黨慌於國步之岌危皆以超然總理爲救亡上策同盟會初亦無異辭而熟知野心勃勃陽示平和陰施運動欲攫取第二期之內閣以遂爭權奪利之思想吾敢當頭一棒大聲疾呼爲國民告曰同盟會無組織內閣之資格今列舉其要點如下

一同盟會之政策 同盟會之政策實倒行逆施之政策也就其已發見者觀之則謀各省都督謀兵權謀財政權謀以各省都督爲後盾而中央財政復歸其掌握必使民國政權一切歸其支配而後快就其未發見者觀則社會主義者實爲挑撥下等社會使爲爆裂之預備綜言之同盟會之政策不外乎一方壟斷國內政權一方博愚氓之心使其効力故同盟會之政策若行中國必變爲暴民之專制政治無可疑也

二同盟會之人物 同盟會之人物其純潔精明不爲權利思想者實最少數其餘則居大位者貪婪而武斷在野者則愍不畏死以恫喝敲詐爲長技其脫口之詞不外乎危言謬論厚誣長官以挑撥國民惡感故同盟會人物瑕多於瑜幾至十倍此輩而握政權不至舉國人而魚肉砧俎之不止

三同盟會內閣之影響 南京三月之政府同盟會之政府也其賣礦抵款營私吞餉種種虛偽情形可以欺國人而不能欺外人故同盟會對外信用已一敗塗地同盟會雖自稱政黨自外人觀之殆尙爲秘密結社之革命黨新加入官僚黨之一種社會况今日中國財政維掘俱窮同盟會所提倡之國民捐明屬欺人之語勢不能不終於借債夫以無法揆無信用之黨人宰制全國謂他日外交財政上不生何等影響此雖至愚之人亦不謂然外侮旣深內患自亟而國運隨之矣此皆同盟

會不能組織內閣之要點也而一般無識之同盟會中人乃云民國由同盟會手造而來此語殊不值一噓同盟會之鼻祖無外孫黃中山海外歸來十七票而爲總統試問有何德澤及我烝民至於義幟之張乃在鄂州黎孫諸傑克強一戰而失漢陽遁逃滬濱未有寸功若云南京光復斯乃程氏視師林述慶黎天才用命孫黃何功之有至各省次第光復是由於滿清失德故人心瓦解武昌舉義望風景隨亦非同盟會人所得矜伐一姓之興必有終訖微同盟會清豈不亡匪特此也革命者剝喪元氣死中求活之事豈可置於齒牙以自矜詡夫孫黃且不得居功况夫依草附木之流而欲乘時組織內閣深植根蒂吾見其多行不義必自斃也同盟會組織內閣影響於政黨者至微於民國之生死存亡則關係甚大故詳述其害使國人共憬之

論約法上總統之任命權及同盟會不宜再組織內閣（京報）

唐紹儀在政府爲毫無價值之人物其去也故於政治上亦絕不有幾微之影響外間對於其去而非笑之者固爲多事卽反而爲辯護之者亦同歸無謂惟其人雖無價值而地位固儼儼然國務總理也而其關係則又同盟會黨員也如棄婦下堂惡聲猶及於翁姑而中饋無主絃續仍不免於爭論故唐紹儀去而我政界亦發生兩個之問題

第一約法上大總統與國務總理之權限問題 約法上任官與副署雖各有專條而負責任者則總理故總統只有畫諾之權限其一切政治方針總理應有完全自由否則總統而拘束總理是約法上設國務總理之作用盡失而總統卽陷於消極的違法之地位

第二繼唐而爲總理者應取純粹的政黨主義 唐紹儀既非由政黨的
作用而去位則唐之所屬黨仍可再接再厲推其本黨之人爲總理直接維持約法上共和之精神並間接暗消南方之惡感

前說卽近日所傳政府強迫唐紹儀辭職之說後者則同盟會再組織內閣之說也二說爲相因的非無關的爲一個的非各別的非吾今欲從事批評而預下一概括之斷語曰此等主張無非同盟會不願國家圖謀霸占政權以徹行其惡劣政策暴民政治耳曰約法曰共和曰政黨內閣皆其欺人之語也夫謂總統種種不信任總理總理至於出走此語果出自誰氏之口在議會內閣政治總理對於議會負完全責任議會不信任總理應向總統提出辭表反之總統不信任使總理不得暢行其政策則爲破壞約法應向議會陳述其理由如議會而表示信任則雖百總統其奈總理何今乃議會不知總統無聞國務院相驚以總理失蹤將以潛遁爲要挾何如以議會爲後援出國門而散布謠言何如至參議院宣示其政策唐氏之違約法壞官規其罪尙容於誅乎其謂總統不信任乃掩羞飾醜以激怒本黨之感情搖亂國民之眼光以自圖脫身計耳借曰爲總統不

信任而去則總統爲違法參議院爲維持約法之機關以如此搖動國本之大問題參議院何不置一詞則參議院亦在破壞約法之列然以此責參議院試問參議院承認之乎再讓一步謂唐氏與總統有私交不願至參議院揚總統之惡參議院反對黨居多故對總統違法不復過問此二語已不值一笑但吾於此益得証唐氏誤國之罪同盟會政策之非而不見有大總統之過夫據唐氏所說此次出走原因甚多而決裂則在王芝祥督直一事夫所謂原因甚多者實不外都南京要求陸軍總長參謀長植兵北省等此數着皆經失敗其得達目的者則中央設總理而經營進行則者北省置都督彼蓋知都督不行則中央無所挾以自固乃借口於調和南北感情假名爲鞏固共和基礎吾試問調和感情何以所荐之人無不出於同盟會鞏固共和何以不舉非同盟會中人都督湖南廣東是感情必要調和者莫如同盟會中人知共和者亦莫如同盟會中人一不

用同盟會中人爲都督感情卽不調和共和卽不鞏固其母乃欺人太甚而藐視我北方太無人乎雖然此猶不足爲同盟會累爲唐紹儀怪苟利於國曷避親故乃數月以來其各地方都督爭權奪位召兵構械衣租食稅割據分崩兵圍議會抗拒政府任貪使詐勒捐害兵以措大而陡發數萬金携流氓之手而坐之堂上建牙樹纛威若王侯者比比皆是傾中央政府之力借債以供給之有不足且仰其鼻息而不敢一動稍有議裁抑之者則目爲不諳共和有妨民主吾試問世界萬國有此國家乎有此政府乎有此民主共和乎乃猶洋洋自喜朝拍一電曰抗借債夕倡一說曰國民捐論省制則地方分權論政治則軍民合治吾試問世界萬國有此政治家乎有此無理之政策乎轉更不知省悟欲置其同黨之都督於北省以便黨勢瀾漫流毒全國一有不遂則目爲違法夫各國政黨政治固多直接謀一部之利益而以循環分配及於他一部之利益但其利益必

以及於一般社會爲歸着而非以本黨爲目的以社會供犧牲更以國家爲兒戲者今同盟會之政策爲社會謀利益乎則已糜爛之省府州縣是也數月以來未聞其總理有一紙之訓示一令之申飭爲國家謀利益乎則自相瓜分妨害統一與外人以口實亦未聞其總理有強硬之主張集權之政策而惟於青黃不接法律不完之時於北省置都督爲同盟會增勢力總統不許則力爭力爭不得則潛逃潛逃而後則散布謠言謂總統違背約法吾今正言以告之曰約法上總統之任官權非盡虛文也使國家制度大定政黨識大體總理有責任輿論有批評議會有把握則總統任官權誠爲虛設否則法律無所據政黨專營私總理不負責輿論不敢言議會不暇過問而欲乘機竊取植黨攬權使通國化爲暴民政治陷國家於割裂分崩萬劫不能統一之危境則約法上總統之任官權正爲此而設亦正可於此而行使之故吾今得從而斷之曰不願國家圖謀霸占

政權以徹行其惡劣政策暴民政治者同盟會之政見也唐紹儀而持此政見以誤國害民吾敢斷除同盟會外皆吾大多數國民所死力反對者也約法上大總統之任命權及此次大總統之行使不任命權卽爲此誤國害民政策之設備而適用之救濟良法也故謂爲違法者乃因不信任同盟會之亡國政策可謂違同盟會之法同盟會借口以搖惑觀聽其他大多數國民則方慶爲幸免於難也夫吾之爲此言者非謂共和可毀專制可復總理可以取消約法可以作廢但使唐紹儀主借款主國家統一主恢復收入總統而妨碍其進行則唐去而吾必視總統爲仇讐卽不然使唐主張有限的地方分權或爲同盟會置都督於北省而對於南方各省必有統一之策裁制之力卽爲爭直督而去吾亦必爲唐抱不平爲民國防其漸而今實無可爲唐辯大總統之行使不任命權實根於約法上最後之不得已行爲亦正當行爲合法行爲違法云乎哉嗚呼吾對同盟

會無私仇宿怨惟於其政策則絕對的不相容對於其組織政府亦非絕對不贊成惟不爲政策之變更則同盟會之第二期總理卽難得吾人之同意違法一語及所持外交南省各危險話頭請向無知者試其恐嚇吾人不受其欺

告亂暴專制之國民黨

一年以來國民黨人之攻詆政府嫁罪他黨者動加以恢復專制反對共和之罪平心論之天下之恢復專制反對共和者孰有如國民黨者哉讀者疑吾言乎吾請舉例以證之

南京政府草率成立財源奇絀羅握俱窮欲以滬甯鐵道抵押外債而交涉不成欲以湖南礦山借押德人而所謀不遂乃至以設立中央銀行之大權以一紙之特許札委之於日人南方以土地作抵而求借款則相率不言北方以鹽務作抵而借債則詆爲亡國事非出於己手則萬事皆非

此其專制者一也

借款之議本是挖肉醫瘡苟爲可已之圖自以不借爲善乃唐紹儀主借比款以供南京政府之揮霍則國民黨贊成之熊希齡辦理借款以供裁兵之用則黃興倡爲國民捐不換政策論以反對之其故何也以唐爲國民黨人而熊非國民黨人也此其專制二也

宋教仁案波瀾大起宣布罪名捕拿袁趙不信任北京之審判要求設特別之法庭然陳其美槍斃陶駿保一案僅以交稽勳局議叙了局而陶煥章一案至今冤沈海底無人過問他人遭國民黨之冤殺則置之不理國民黨遭他人之暗刺則據意報仇不惜糜爛生靈供其暴動揆之情理豈可謂平此其專制三也

此猶就其對於政治上之專制言之也若其對於社會上之專制則尤更僕難數試舉其最著者而言之

如信教自由保護財產載在臨時約法尤國民黨人所奉爲金科玉律者也而柏文蔚都督安徽則命令警監驅逐僧尼譚心休招撫常德則督率兵丁侵奪寺產使彼等轉旋溝壑窮老無歸其他名山古刹之被摧殘前人祠廟之歸侵占以及抄家充公逼死人命究其主動莫不爲國民黨人之所爲試問今之世界有如是之共和國民乎此其專制四也

江西廣東湖南安徽四省世所稱國民黨之地盤湖南一省則非國民黨人絕對無爲官吏之權利廣東此次之選舉非國民黨人亦絕無當選之希望稍不如意動則宣布罪狀宣告死刑粵贛之土地不啻國民黨之土地粵贛之人民不啻國民黨之人民今日廣東匯銀十萬供國民黨本部之需明日湖南匯十萬備國民黨運動之用至於應解之中央經費則一文不交不得已之大借款則聯名反對暗無天日割據一方此其專制者五也

言論自由共和精神稍有知識皆明此義乃國黨機關各報之言論咄咄逼人順我者則字之爲偉人逆我者則謚之爲妖賊張牙拍掌率獸食人乃至挾三數之暴徒尋一字之冤獄白晝大都毆擊同人有識怵心旁觀太息謂干戈起於同業暴動出乎儒流哀今之人莫肯念亂此其專制者六也

告國民黨及其報紙

惡劣之手段

亡國之心理

自秘密談話發現本報鑑空衡平不忍於民國光天化日之下而卑劣橫暴之政黨如鬼如蜮之手段之發現乃略加詮釋以警兇頑証據昭彰人心稱快此實社會心理所同而本報同人所不憚犯衆難以發其覆者也國民黨各機關報乃不顧是非不察事理轟然以本報爲的一則曰做賊

心虛再則曰信口狂狀此等村嫗小兒之口角本無反唇之價值既而念國民黨成立以來牛溲馬勃雜然並陳蕭艾之中不無芳草此等有辯別知識之黨員或能受納善言反躬自懟約束其蠻野之報章而爲自怨自艾之舉動故不憚瑣屑姑爲一言以忠告之

民國初立無所謂政黨也唯有同盟會中之一二黠猾起而攬取大權耳其貪詐橫暴之風遂大播於天下循是不返則中國早邱墟矣公道未亡人心未死於是有共和黨出而與之抗待共和黨者遏制暴民政治以穩健之政策維持全國之秩序者也自共和黨出國中之賢達睿智上流士夫莫不躬力扶翼而彼暴亂鹵莽欺詐之輩乃羣以彼黨爲逋逃藪夫曩所謂同盟會者革命時代之秘密結社也其間雖多可議者而尙有狷潔勇烈之特性足以使社會爲之起敬無如破壞已過建設方殷而同盟中之猾者更變相爲國民黨其外觀爛然儼政黨也攷其內容則其腐敗惡

劣殆又甚於同盟會黨員中賢者潔身遠引暴烈野蠻者把持焉巧猾卑鄙者加入焉綜一年以來之流氓貪官劣紳土棍皆舉而託於國民黨幟之下而皆以曩昔之同盟會革命黨自詡更計其近日所發現者運動內閣運動國務員運動都督運動鐵路礦山事業用其陰險詭詐之手段以結納人使入黨施其諂媚阿附之習慣以逢迎政府之罪惡今日政界要津及夫膏腴之地罔不爲其把持盤踞一言以蔽之新貴族與官僚黨美名實爲國民黨唯一之招牌暴民政治實國民黨唯一之手段耳秘密談話之發現又爲該黨狠毒手段表現之一端不謂天道未亡使之失喜過度心亂意瞽印刷品未附啓竟未及撤去而即使該黨陰謀暴露於天下不能復掩吾知此時必有扼腕爲該黨該報惜者又必有努目切齒爲該黨該報怒者雖然公等勿爾也該黨之計畫周匝縝密決不致因而無遁辭之餘地彼方貌爲不知佯示其慈愛之態度彼方以忽嗔忽罵之狀

態以間接毀傷共和黨之名譽謂予不信則此印刷品何以不先不後不發現於他黨而郵役更不誤投於他處而封面既書投共和黨何以逆知其爲秘密談話而發折之何以國民黨得此後逕卽提問政團聯合會附啟內既聲明非共和黨印刷品何以某報竟斷定爲出自共和黨凡此種種糾繆書不勝書一言蔽之曰彼欲壟斷全國選舉以貫澈其暴民政治故不惜出其狠辣手段以破壞反對黨之名譽也

嗚呼此等惡劣之反陷的政策雖至狠毒然以吾觀之乃祇覺其拙笨可哀蓋彼曹最後之目的不過欲得政權與選舉勝利而已夫以彼黨之金錢勢力何求不得又何必出以狠毒手段以使反對黨無噍類而後快然而彼黨必出此者乃真所謂積習難忘故態復作者也嗚呼吾純潔穩健之共和黨汝速絕念此政權汝速放棄國會之選舉權傳云國家將亡必有妖孽今日之國家已成一黑闇的地獄無光明可言無心理可據含血

嚙人沙蟲射影我共和黨其速束手屏息以觀此窮凶極惡之社會之結果其速低首下心以聽此卑劣橫暴之黨人之亡國蓋此等劣惡的手段狠毒的心理滅國滅種理所宜然嗚呼已哉已哉公理已亡人心盡死吾不能復惜詞矣世有不甘爲亡國奴者盍執吾言而熟思之

黃克強專爲要錢來乎

黃克強來京社會事業爲孫中山所占政黨優勢又爲宋教仁所奪乃碌碌無所表現日以要錢聞聯日費須四十萬也拓殖協會又須百萬也夫國當財政艱窘安有如許閒錢應公之求卽云聯日爲必要政策拓殖爲當急事業雖之鄰而與亦不爲過然聯日與拓殖二事關於國家政策須有良密之計畫方能決定不能以一二大主之而卽據此字爲索款之題目也吾今試就二個題目以質之克強先生

一我國有無聯日之必要公何所見而聯日聯日之方法如何聯日之

效果如何何所見而必須款四十萬

二拓殖之目的在何方向拓殖之方策爲調查的抑實行的調查可幾年完工實行有無期限協會向有經費若干此百萬爲開辦費抑爲補助費

以上二者克強先生來京無一字之發表惟云聯日四十萬拓殖協會百萬先生雖富於自信力國民雖十分信任先生然恐在法律上國家公款不能任先生之予取予携而好利之徒亦恐不原先生聯日拓殖之用心而惟見有百四十萬將借聯英聯德聯美屯墾實邊殖民各題日起而援例請款吾不知使先生當局其將何法以應付之

亂事溯源

(希真)

方徐寶山之遇刺於揚州也調停之聲滿天下而記者竊以爲禍猶未已當時卽草一議以爲徐軍長雖起身椎埋然慷慨任事隱爲南方保障設

以是南方不靖政府必任其咎兼軍政者以其言之過激恐傷南北之感抑而未宣事至今日誠不敢自幸其言之果中回溯從前要有不能忘情者矣

論者徒知今日之裂裂由宋案大借款鬱結而來不知當南京政府下台之時早已預備今日孫文之辭總統黃興之辭留守初非其心所甘徒以環顧四周內疚一身知此位終有不克久踞之勢故外示退讓陰待再舉袁氏亦知南北睽離終非國家之福又震於功首之名不欲輕事開罪是以忍棄國家之公帑累數十百萬而不敢一呻迨後孫黃連袂北上袁又力與交歡與以總理鐵路總理礦務之名月贖三萬金一萬金有差使無揮霍告竭之虞孫黃出京亦極口譽袁以爲總統非袁不辦謔者笑新客遇老妓忠厚之士則以爲兩齋庶幾連歡國家庶幾無事而不知彼固未嘗一日忽然於總統留守也即日孫黃自無此心要其趨龍附鳳之輩亦

必不能一日忽然於總統留守也是以孫氏既拜總理鐵路之命卽假考察爲由乘輪東渡訂借日債一千萬之約遂喧然於海內各報當時固以爲其心無他築路無費借債亦常事耳然揆之今日固有以工商總長之名義爲其黨私借外債千萬元者固有以巴拿瑪賽會監督之名義爲其黨私借外債三百萬元者則當日舉動正是可疑徒以國家無事國務員既掛名彼黨所操縱贛皖粵湘四督又募兵購械隱爲聲勢慨然有七鬯不驚控御全局之概若袁者直可蹴而去之故隱忍而未發耳及後武昌數驚詞連彼黨政府知攘權奪利之心終非此區區者所能饜飫交歡之迹亦稍衰矣衆議院議長一席竟爲進黨所得進黨之較接近於政府天下人所公認也彼黨既失利用袁氏之機又乏控御全院之力謀亂之心遂以益急不意天禍華夏宋案猝起宋主政黨內閣在彼黨自成一派與孫黃本如風馬牛不相及也特是旣死之後樂得假此爲名以爲搗

亂之資偉人之通電黨報之論調痛哭陳詞無減孝子仁孫論者謂如宋江之哭晁大哥真可絕倒政府不知黃興與應夔臣之關係殆較深於應夔臣之與洪述祖過聽一面之辭遽令黃興會閱証據程雪樓應季中雖以都督省長名義亦皆列席然雪老圓融應筭默黃興遂得主持電稿自隱其奸黃興確曾隱囑應夔臣煽惑軍隊宣布證據未及者職是之故而彼黨陰謀煽亂之跡亦以是大白於天下當時都督省長駢集滬都南京一夕數驚人心浮動連電回轅迄無音信甯軍數師長名義上盡列彼黨誠能會皖贛之師直到金陵一鼓之方也黃興非不欲爲此徒以其心目中年記前年故技以武昌爲四戰之區非此不足以號召天下且有徐寶山坐鎮維揚隱躡其後徐師強不足一軍勇悍任戰固非招集市井無賴倉卒成軍者可比故武昌失機程氏亦得從容歸鎮適大借款事起彼黨遂居爲奇貨假與政府搗亂大借款曾通過於前參議院政府按約履行

無所謂違法彼黨人知之卽曰違法亦當靜待國會解決彼黨人亦知之以今日財政之窘不得不藉外資以爲灌溉彼黨人亦知之知之而必爲此者自知羽毛未豐不敢輕於一舉特以此迷天下之耳目耳是以調停之使冠蓋相望而徐寶山猝死於維揚血光團破獲於幽燕萬目瞶瞶疑在一人彼黨所持意見不難窺見袁氏亦知調停之終于無功和平之終不可期於是毅然剝奪黃興之上將以示決心卽彼黨中人亦有不以暴動爲然議削孫黃黨籍以謝天下者惜多心懾於黨人之威望目注於後日之榮華此議竟不克實行也迄贛皖粵三督相繼排斥三督受命卽行絕無依戀天下人皆謂三督之光明磊落不失爲彼黨健者而不知彼固藉退讓之名以飾天下之觀聽隱爲悉索敝賦之計以充彼黨之軍實某督索賠償革命軍費若干萬某督虧空若干萬某督贖金若干萬報章所傳未可盡誣孫黃離甯時之情形吾人耳鼓尙新也特彼黨之意終不能

忘情於武昌最近武昌之變季雨霖實爲主動損失幾及百萬在彼黨幾以此爲孤注乃天厭亂黨先事破裂嘆恨痛惜之餘而李烈鈞遂投戈起矣不意人心厭亂應者寥寥前年九月之盛舉竟不可得而復觀黃興遂振其故留守之餘威強程雪樓獨立獨惜黃興儼然以開國元勳自命竟甘受一都督之委任則其委屈甯可想耶今者以大勢卜之解決之期會當不遠此後吾儕之所憂正不在亂事之無已而在亂黨之收拾近日以來又有以調停之說進者政府既養昔日之癰以貽今日之禍誠勿再養今日之癰以肇後日之憂則吾儕小民拜日於無窮矣

戡亂當清亂源

(何山)

蛇蝎豺狼不盡人而吞螫也然而見者必搜其種類而殲除之豈不違害生理而顧不嫌其忍者何也巨匪劇盜不盡人而戕賊也然而國家必悉其徒黨而剪滅之豈不摧傷人道而顧不嫌其酷者何也保存一惡物則

人類之死傷苦痛將無已時以是言忍乃真忍耳姑息一惡人則同類之生命財產日瀕危殆以是言酷乃真酷乎明乎此則政府今日所以處分贛亂之手續當無待再計決矣

天禍中華偉人如鯽羣凶遘會若蟻附羶一時攀龍鱗附鳳翼以奔走於獨立旗幟之下者強半爲巨匪劇盜之匹儔而富於蛇蝎豺狼之性質者也自沙河宣戰以來南北兩方之士卒接觸戰綫以罹於死傷者合贛皖江甯三省計之當不第以萬數至若兵事影響及於無罪之平民其重者折肢體洞胸腹往往而死者相藉也其輕者流離轉徙蕩產傾家老羸婦孺呼號宛轉若此之屬豈復可以更僕數哉不甯唯是紳嗜之忤意者殺商民之抗捐者殺軍官之守正者殺中央之奉使者殺進步之黨員而亦殺嗚呼窮山極惡一至此耶前年張方之案逆跡昭彰若輩尙嘒嘒然指摘政府坐以違背約法專制殺人吾抑不知若輩之寃殺無辜至不可以

僂指計果爲暴民專制否也古來以善殺名者莫烈於黃巢莫慘於闖獻今茲偉人之行徑直合黃巢闖獻爲一手耳且黃巢爲單獨之橫行闖獻爲並生之梟傑足跡所至便足以糜爛生命使無噍類況我中華民國有幾許偉人卽得幾許黃巢幾許闖獻也豈不殆哉

間者政府有見於一般偉人之行動不殄絕我中華民族不止也始一改其平日敷衍之政策宣布罪狀決計用兵雖然政府用兵之始念固仍以偉人視偉人而未嘗以黃巢闖獻視偉人也不然戡亂懲凶兵尙神速今試從江西戰事發生而後歷考北軍方面之態度沙河之役是爲亂人挑釁之起點此顯著者也其他劇烈戰事若徐州韓莊之役若上海製造局迭次之兵爭何在非主張防禦而不主張攻擊揣中央之意旨蓋深不欲開殘殺之端貽偉人以口實毋甯俟彼一般亡命日暮途窮倒行逆施天人共憤然後出雷霆精銳之手段一舉而蕩平之兵家勝算固無逾於此

者惜乎釜底游魂猶自夢然罔覺耳否則以北方節制之師當彼游手烏合之衆沸湯沃雪疾風振稿勝敗之數當不待交綏而定矣而任令戰事延長相持於溽暑炎威之下夫何爲也哉

今者偉人之面具重重揭破亂人之真相各各披露矣魍魎魑魅檣杪窮奇萬態千形同時出現而考其究竟實無一不在中央成算之中是以戡亂之師謀定後動雖復利用武力而勿庸過涉於張皇然已足制偉人之死命而有餘矣雖然吾人不患此次亂事之不平而患不能殲除戎首杜塞亂源則吾民生命財產之前途尙日投於危險之旋渦而無能自拔也論著多謂叛黨聲勢浸成弩末雖有少數負隅之悍黨苟使彼中首領鼠竄狼奔則餉立窮而援立絕若非匍匐投降亦必紛紛作鳥獸散耳夫何患死灰復然斯說也蓋猶未悉彼中之情勢也夫今日之亂機甯惟獨立之三數行省確有見端哉宗社餘孽則潛伏於邊疆變兵流寇則蔓延於

腹地凡此之屬一一爲偉人所利用首尾相應呼吸互通偉人亡其機關或有破除之望偉人存則若輩斷無剪滅之期吾國內亂伊胡底乎况吾國國力方在幼稚時代卽此次興師戡亂其損失固已多矣善後借款有限之金錢既耗以大宗之戰費政府臨期之組織復誤於旁午之軍書一之已甚謂可任其兵連禍結以蹙國家之命脈歟書曰殲厥渠魁脅從罔治所願軍政當局者積極圖之

獨是五萬十萬之懸賞政府對於諸偉人已表示其除惡務盡之決心復何待吾人之颯颯過慮顧記者尙患一紙之空文將不能發生効力也何則偉人之實行造叛獨特有外人爲之護符此則中外人士洞若觀火而無可容其諱飾者自湖口發難以至海上鑿兵在在有日本民黨爲之運籌帷幄有日本浪人與之出入行間以及餉械之資給船艦之轉輸無往不假東鄰之助力似此規畫周詳宜必有最後逋逃之豫備可斷言也諸

偉人以失敗餘生仰賴外人之保護雖有健者亦將氣沮於臨時之交涉熟視巨魚之漏網而莫可如何記者竊以爲誤矣世界縱尙強權豈謂戰時遂無公法日本人士與亂事之關係全球萬國皆知其出於民黨之陰謀而無與於政府對華之舉動日前駐漢日領有商民助亂政府有保護之宣言其鐵證也日民助亂不能得自國之保護甯復有保護他國亂人之資格乎謂宜持此問題先事與該國政府嚴重交涉請毋破壞局外中立之例庇我禍首以碍邦交其有違法干預至受生命之摧傷與船艦之轟燬者中華民國絕對不任其咎以是訴之外交團孰謂非正當之理由哉從此進行乃不致畏尾以餒其氣而諸偉人庶無逃死所矣不然我民國豈復有甯宇哉

揭國民黨反對大借款簽押之裏面普告國民

國民黨此次對於借款簽押院內外行動異常曖昧國人程度不齊傳聞

不一不知國家財政困窘之實況去年參議院議決之詳情據風聞所得聽一偏煽惑但知有所謂借款借款違法違法政府賣國當道專橫感情一動耳塞目盲手忙脚亂而不知純爲他人所利用吾人若不辭而闢之不知我國民受欺至於幾時而遺害於國家更不知伊於胡底也吾今大聲疾呼敢爲我國民告曰我國借款今日萬無可逃借款不始今日去歲一年政府四次出席悉得參議院許可院內議員現皆未死未亡不妨起而問之其未成立者特以外人有異議耳若款不當借去年參議院當早已反對通電各省各省都督亦必齊電中央何待今日豈臨時參議院及各省都督之愛國不如今日之國會今日之都督乎吾有以知其必不然也我國民既知借款萬無可逃卽知借款成立萬不可取消以取消後無論誰何爲政不能不再借款卽令國民黨當局亦必仍出於借款曰爲政府違法也此固爲政府之非但政府既得臨時參議院許可而借款則借

欸不違法借款不違法即借款應確固成立若政府有過失可指則彈劾
 之推倒之皆可而不能破壞及於借款以借款爲萬無可逃政府曾受國
 民代表之委託而有此權故也國民乎試平爾心靜爾氣洗爾耳拭爾目
 看國民黨今日究爲監督政府抑爲破毀借款孫黃之電胡李之電譚柏
 之電張王及彼議員之電各省國民黨支部之電再觀報紙若民主民國
 國光中央其措詞命意有一不主張取消合同乎有一不曰賣國誤國亡
 國大借款萬不可認爲有效乎我國民試一檢查各電各報憑據俱在非
 吾造謠要知今日欲破毀借款者非他人皆國民黨國民黨何爲獨欲破
 毀借款彼因近日該黨首領有種種陰謀希圖二次革命恐政府借款成
 立軍實充足彼輩不能肆無忌憚爲所欲爲我國民思之我國民其深長
 思之若果今日打消已成之借款彼黨當作如何舉動我國民之身家性
 命將何所依託而贊成其主張甘受其欺騙不其慎乎不其 乎在彼輩

數日來亦知此說萬難鼓惑人心漸變爲承認借款不承認其違法簽押不知合同條款去年本經參議院議決今日簽押並無違法卽曰手續不完亦只令政府負手續不完之責任而止彈劾之推倒之無所不可但必先明白表示認借款爲完全成立簽押亦可承認有效手續不完不能免除責任而後可否則如彼所主張簽押違法應作無效吾試問簽押無效是否卽合同無效合同無效借款是否根本取消蓋仍一打消借款之日的不過以簽押違法爲其手段耳若依吾人所見簽押手續不完借款已完全有效政府只負簽押手續不完之責任若謂簽押無效是以反對借款爲目的必先打消借款更令政府負重大責任二者根本不同國民黨此等手腕不能欺三歲兒童而謂可欺侮我國民乎須知吾人與國民黨無私仇宿怨非欲事事與伊作急激之反對更須知此無賴無聊之政府吾人久已厭之惡之無維持擁護之私心不過公是公非不能不表曰於

天下而國之存亡民之安危關係於此借款者既重且大尤不能不再告吾國民

再揭國民黨反對大借款籤押之裏面普告國民

大借款違法問題之解剖

國民大注意

大借款簽押問題國民黨怒罵叫囂通電全國人心搖動吾人觀其院內議員之勇氣讀其院外函電之激越實心佩服惟對於該黨主張細心推釋始終不得要領昨報所謂國民黨此次舉動究爲反對借款耶抑反對簽押手續不完而爲根本上推翻借款耶吾人愚不解事竊謂國民黨態度不免曖昧當此國是未定人心惶惑誠恐此案之公是公非不得表白於天下而該黨神經錯亂之主張或至蔓延於全國事關大局安危係之本報於此誠不能不揭明此案之真象爲全國國民告本報對於此案所

認爲論點者有三

第一對於大借款應否贊同也政府不法借款國會本不可贊同借款條件苛虐理論上亦不應同意而革命後財政困窘達於極點無論誰何當局目前不能不利用外資以紓急難而急圖恢復整理爲根本上之計畫此一年以來國人所茹苦含痛而又不能不希望借款迅速成立此於前參議院內數次表決政府已得國民許可並無絲毫違法之可指今日反對實無理由若果取消簽押打翻借款無論現政府不能支持卽令國民黨當局亦不能不先借款借款亦不能不屈就嚴苛之條件則此次借款成立根本上萬無不贊同之理由理無可逃事有必至吾人認此說爲決無疑義者也

第二簽押手續之是否合法也今之謂簽押手續不合法者有二一在臨時參議院政府未用正式提案二參議院並未完全表決前者政府誠有

疏略惟吾人所見政府既不合法臨時參議院應不承認既爲之正式開議又爲之逐條討論逐條表決卽應與正式提案有同等之效力若反對之是國會與前參議院宣戰後者考議事錄合同中特別五款逐款討論表決皆得多數普通之十六款開議時議員提議無庸表決五款通過後議長諮詢無須表決衆皆贊同有案可稽夫無庸無須究作何解吾人認爲無庸表決當然與表決者有同等之效力蓋議會議事本有無異議不付表決之例故也至最後則有未經三讀會之疑問然詢諸舊參議員皆云當日政府係要求本日通過翌日卽行簽押簽押後再將全案交院爲形式的通過衆皆贊同可見當日若果簽押則前議院必不反對是今日謂簽押違法僅爲新機關與舊機關意思之不投耳以新機關反對舊機關謂爲故意爲難則可謂爲盡職則不可如不謂然去年屢次墊款政府皆未正式提案亦未經三讀手續谷力斯浦小借款自商借以至簽押參

嗚呼國家將興必有禎祥國家將亡必有妖孽禎祥妖孽者何在人材邪正真偽之分而已閱光華報五月二十日登徐謙布告國民一段且有該記者附識之詞而稱之曰吾國文毫法學巨子意將必有一篇大文供人研究也誰知不然開首數語已足令人不解夫所謂文毫法學者乃若是之慎也其文曰（嗚呼吾國民何不幸而有此謀殺之政府吾國民何不幸而有此主使盜賊以殺人之政府吾國民何不幸而有此紊亂財政以恣其賄買他人殺人之政府吾國民何不幸而有此暗殺民黨陰謀不軌之政府）之四語也是於法律之範圍公私之界限毫未明白而曰文豪法學嗚呼吾國何不幸而有此文豪法學也夫政府名稱原非一二人之私有任行政者到其時其地以辦公則爲政府及其退也一切行爲則純屬個人私事矣今以宋案牽涉袁趙姑勿論其事之虛實就使袁趙果主謀殺宋亦屬個人問題於政府乎何與此等界限在歐洲各國雖三尺童

子亦能明之何物法學巨子乃欲以一二人嫌疑之事混誣四萬萬人之政府是不啻把吾公共之政府奉獻袁趙以爲己物由是推之則此後袁趙用膳可云政府食飯矣袁趙敦倫可云政府行樂矣袁趙出恭可云政府大便矣吾國有此法學人物前途大堪痛哭也但不知徐氏其果菽麥不辨耶抑患神經病耶抑居心叵測故意混言政府以愚煽國人而謀不軌耶觀其行文於混誣政府之下而直接之曰（不排除之無以重人道不排除之無以保民權不排除之無以伸國法不排除之無以固邦基又曰惟吾國民共棄之）其以個人私事借爲破壞政府之心居然發露嗚呼改革幾時風潮倏起黨利是圖國艱奚恤獨不思吾國現狀危如懸絲苟有未善理宜正當誘導匡扶乃尋瑕摘隙事無巨細動牽全局以同胞之赤血作若輩之孤注行險小人豺虎不食吾不知其是何種類也該報記者乃附識揄揚之則一班之敗類不問可知矣吾願當世明眼人共灼

其隱也抑吾猶有不能已於言者前清以專制淫威迫人太甚天怒民怨故武昌一舉而天下響應今若輩竟以報館筆墨先法庭而定人罪是較諸專制皇帝之淫威猶有過之吾民輸無數血汗以求共和使不嚴爲甄別一聽若輩之狂吠就令政黨內閣得以成立而一般牛鬼蛇神分據要津吾恐君主之專制方除而暴民之專制更甚殊非吾四萬萬人之所希望也故特揭之

宋案之過去歷史

(京報)

自宋案發生後南方人士因此案真相未易顯露頗多疑慮國民黨人則欲利用此機會以爲政治上之運用卽彼總統失敗投身實業界之孫中山近日亦復野心勃勃在上海宣言帶兵北上現在此案中吳應二要犯以及種種證據均已移交中國法庭聞應夔丞之最要證據均貯一大鐵櫃中其間有應與政府交涉之函件亦有應與國民黨要人交涉之函件

聞現在保管此櫃者乃爲黃克強陳其美王寵惠伍廷芳等此諸人皆隸名黨籍則將來此案果能成爲信讞與否尙屬難言本社茲特切實調查洪述祖應夔丞二人與政府及與宋教仁過去之種種關係具揭真相以供世人之研究

應夔丞既屢以共進會名義恫嚇政府適黎副總統通緝飭拿而南方人來羣謂江浙之共進會民不安枕政府正無術乃有洪述祖自告奮勇謂有世誼往滬勸其投誠洪至甯見程督程謂正法重案不能赦洪乃回上海請陳英士電致程督緩頰程許之以詢黎黎據程督請政府赦罪觀其後效此爲洪應牽合以援入政界之始事在上年十月以後是應與陳之交情及其南京政府庶務長兵站長滬都督謀報科之歷史其爲深淺不言而喻應既到南京索每月三千元界全省稽查長名目程知應之不可恃但爲陳洪所黜因以駐滬稽查長羈縻之自出千元一月請政府月予

二千元故應每月必派人到京取二千元內務部有領狀稽勳局有應之
自敘履歷蘇都督府有商請京鄂及復陳英士之電文皆可查也應嫌三
千元之少謂其部下太多須與五萬元乃可全散其解散辦法有文在內
務部業已登報或云洪應瓜分此五萬元不知確否然洪挾應以訛詐政
府不正一端正月間適上海有歡迎國會團之組織項城主張不理而法
律家謂如蘇督來詢宜預備能解決之法而洪述祖乘此又南下調查其
實該團與應通氣洪亦知之故洪與應電謂須有激烈文章乃能索價按
其月日正歡迎團宣言書發表前後之時也又洪聞應言宋在東造假銀
元票騙錢日本政府曾出提票拘之洪欲以此訛政府取其憑據政府知
洪爲騙錢計未置可否而洪意則謂卽不能騙政府錢亦必能要宋而騙
其巨大之代價故謬告應謂政府欲得此據嗣後此據究得與否記者不
知下文然彼不能得政府之錢則必要宋取贖宋不允則應必痛恨宋又

追及宋組國民黨不收共進會而棄之之宿憾遂起殺心亦未可知也然殺宋之後彼如欲脫罪則必拉入政府以爲減罪之地而又合國民黨平日推翻現政府之心理其證據中趙總理之與應親署姓者只有致其電碼一本云如發電則徑寄國務院趙云蓋趙固知洪之招搖故不欲其轉曰寄國務院趙而不欲其寄私宅可見趙與應之秘密仍爲共進會與歡迎團等事也

黃克強利用宋案之真相

袁總統之被騙

黃上將之陰險

宋案證據經程督爲斷章取義之披露愈使此案真相隱晦陷全國視聽於糢糊影響之中連日經記者詳細調查始知此案實別有偉人利用以爲推倒政府之武器當此案初發生時適梁士詒由粵返京路過上海卽

與黃克強共談此案辦法其時黃持論頗爲平和堅託梁轉達總統謂此案可以交其專辦斷不牽入政治問題卽或有人搗亂伊亦與之搗亂云云梁既遠京具以此語達之總統總統平日見黃貌似誠篤以爲可恃且此次設詞又有維持大局之意遂諾之於是一切證據遂盡於彼黨之手中任其隨意牽扯而有昨程督宣布之通電矣此爲宋案袁大總統被騙之真相其實就此次宣布之證據而論其中可資研究者甚多乃一概抹煞專就構陷政府一方著手誠不可知該黨是何居心如二月一日洪述祖致應犯一函總以做一片激烈文章方有價值等語之後尙有一段文字極爲緊要而程督電中竟與漏載以掩飾該黨之罪惡而裝成政府主使疑竇該函原文略云近日國民黨亦有以解散歡迎國會團爲辭來與政府交涉者其目的不過同爲牟利我輩卽稍延亦無妨云云觀此數語用意則所謂激烈文章不過欲其發布一激烈宣言書以恐赫政府而卽

以此遂其敲詐之手段耳至國民黨以堂堂政黨乃不惜出此劣等流氓之行動甯不可痛又如三月十三日應犯致洪述祖之函若不去宋非特生出無竊是非恐大局必爲擾亂等語之後亦有一段尤足究出應犯所以殺宋之動機該函原文略云近由黃克強介紹與宋接頭代其抵押南京政府發行之公債票六十萬於義豐洋行計得洋五十萬已本分十萬後又由宋取回二萬五千爲運動甯鄂軍隊之用云云據以上數語推究則應之殺宋乃由於分派贓款不勻而起初與政府無關惟將此段抹煞而後可以與疑問於國人至宋取款運動甯鄂軍隊此爲何意吾人更可以不言而喻總之合上兩節以推察程督所宣布之證據可以斷知其非此案之真相程督現方被黃克強軟禁於上海其不死自由通國皆知以一方面之主張卽欲據以斷決殺人之重案謂非立意構陷誰得而信之又據政界連日傳聞該黨中暴亂分子竟欲於皖贛湘粵四省企圖獨立

並由黃克強派遣親信陳強回湘練兵兩鎮此消息若確則黃克強一面以甘言聒政府一面又利用宋案以激動天下之人心而卽以逞其好亂不已之天性其陰險至此誠今世所罕見本報前謂其漸近和平殆與袁總統同一被騙矣

刺宋案證據之研究

自宋案發現國民黨人奔走號呼日以攻擊政府爲事或鼓吹報帑著爲激烈之論文或秘密結團誓爲推翻之運動於時舉國囂然殆哉岌岌然其藉以號召一黨人以此案搜出之書證牽連應洪而應洪之地位又牽連政府於是含沙射影將以波及于袁趙近日公堂搜獲之文電證據頗非一件該黨常藉之爲攻詰之具而吾輩旁觀者循環討究覺其中珠絲馬跡不無可供研究之點茲就四月二十六日程都督應民政長來電依法理事實一一考校而評論之以供留心此事者之參考

一月十四日趙致應函密碼送請檢收以後有電直寄國務院可也
案應曾受有巡查差使發給密電本在事實上亦尋常事趙令其直寄國
務院足見洪應往來電函非趙所許且趙如早與聞洪應事則發給密電
本尤不宜令其直寄國務院就法律上判之洪應計策與趙寄密碼截然
兩事可知也

又記者曾聞諸趙總理云自給應密電本後凡應來電均由洪經手自始
至終並非未呈閱所言果信是發縱指使者皆洪之鬼蜮而已

一月二十六日應寄趙總理應密徑電國會旨爭真象已得洪回面詳
按此卽歡迎國會團起點應洪一面發起歡迎國會團一面又以解散自
任故有此電之報告

一月一日應寄趙總理應密東電憲法起草以文字鼓吹金錢聯絡主張
兩綱一除總理外不投票一解散國會此外何海鳴戴天仇等已另籌對

待

按此電下半所謂對待何戴亦係解散國會團題中應有之文上半專言憲法起草此事主張者甚多不止政府一方面與宋案不相涉可斷言也
二月一日洪致應函大題目總以做一篇激烈文章方有價值

二月二日洪致應函要緊文章已略露一句說必有激烈舉動弟須於題前逕密電老趙索一數目

按此二電同爲二月初日以此時計之正歡迎國會團發生於滬上之時也方是團之發生曾以團中名單及宣言書逕致國務院是政府警其虛聲咸以該團影響統一甚大聽之不可干涉之又不能面應洪輩乃時以解散之責自任然以記者所聞是團之發生乃正應洪輩所利用陽以恫喝政府而陰則假以詐錢財政府不察其術中亦已偵矣觀電文中做激烈文章方有價值及密電索一數目等語卽指歡迎國會團宣言書及要

索之解散費蓋已昭然可覩矣

二月二日應寄程經世轉趙總理應密冬四電孫黃黎宋運動極烈民黨忽主舉宋任總理已由日本購孫黃劣史警廳供鈔宋犯騙案刑事提票用照輯印十萬冊擬送橫濱發行

按此電乃洪應勾結謀挾制宋黨乃覓種種證據其意蓋欲獻媚政府爲索款地步以實行敲詐伎倆耳聽時政府成立以來袁氏曲意敷衍民黨不獨袁黎沆瀣一氣無民黨可言卽彼孫黃宋諸人政府亦復供應不暇若使意見差池亦豈必藉欺騙証據始於控馭此電在法律上事實上皆爲洪應二人自動之意思不能指爲政府之發動也

二月四日洪致應電冬電到趙處卽交兄手面呈總統閱後色頗喜說弟頗有本事既有把握卽望進行云云兄又略提款事渠說將來宋騙案情及照出之提票式寄來以爲徵信望弟以後用川密與兄

按此電文上節語意似爲解散事而言但爲解散共進會抑爲解散國會團則不可知下節語意卽指宋曾有騙案經官解票提洪應謀照出原件以挾宋賣價宋之騙案如何不可查見考其意殆洪應曾以宋騙劣迹一方獻於政府以取利一方又藉以挾制宋歟且末文中旣云謀照宋提票事是此時洪應不過欲挾以取利耳如謂殺意卽生於此時又何必多有此舉足証此時卽洪應亦無殺宋意安得卽以提款餌應乎且前此均用應密此忽囑其用川密豈非洪恐與應招搖情事恐爲政府所知歟且總統色喜云云皆洪所自述安知非洪妄以虛語炫示於應歟此在法律上事實上皆不能指爲殺宋之證據也

二月八日洪致應函宋輩有無覓處中央對此似頗注意也（輩字又似案字）

按輩字必係案字之誤卽指謀印提票之事文云中央似頗注意純係洪

之主觀所謂書吏撞木鐘技倆也

二月十一日宋件到手即來索款

按此電乃專指謀買宋騙案提票事別無他義宋件二字斷非指取其性命而言洪則假政府以嗾應應則制宋以要洪皆洪應之詭計政府正墮霧中未知也如謂政府早有殺宋宗旨則欲殺竟殺耳焉用先得宋件後再言殺乎

二月十八日洪致應電寒電應即照辦倘空言爲忌者所笑

按此似亦爲解散共進會或歡迎國會團之事否則爲謀照宋案提票而向政府索款事電文爲忌者所笑則斷爲極密之事可知如謂單指殺宋事則除洪應等外誰復能知之 而謂尙有忌之者察視其旁耶

二月二十二日洪致應函來函已面呈總統閱過以後勿通電國務院因智老已將應電本交來恐程君不機密純令歸兄手經理請款總要在物

件到後爲數不可過三十萬

按讀此函即知洪與應勾結非政府所允洪又恐因應之通電爲趙所見又慮此機爲應所窺破故稱趙已交應密電本歸其一手經理令其不必通電國務院揆其情實似洪已早攫得舞弊密查矣用款三十萬物件皆指宋騙史提票無疑如謂殺宋案請款則前電請款者屢矣更無所謂物件到後也

三月初十日應致洪川秘蒸電八釐公債在上海指定銀行交足六六二拆買三百五十萬請轉呈當日復

按公債一事以記者所聞前由財政部查明分毫全無并聞政府曾於四月七號已電滬轉查若有此事則財政部發票之印記時日必可在滬查出待辨也

三月十三日應致洪函民立實記遜初在寧之說讀之即知其近來之勢

力及趨向所在矣事關大計欲爲釜底抽薪法若不去宋非特生無窮是非恐大局必爲擾亂

按文中若不去宋四字極當研究去字解法頗多雖非指定謀殺然距宋死不遠或者應於此始動殺意若不二字出自應口是應純爲主動的如謂政府前有此主使則此時應何尙有自商口吻果宋案發生於此則應爲謀殺造意者難逃主使之罪而非政府造意主使可証

三月十三日洪致應川密蒸電已交財政總長核辦債止六厘恐折扣大通不過爲宋酬勛位相度機宜妥籌辦理

按自宋案發生後就記者所知政府已電滬上孫黃兩人密查公債究由何處交發有無部中記印時日如果有此事則孫黃必能查出發報詳言然至今孫黃無明白回復其無確據可証也至授勛位一層臨時政府勛位之濫記者固屢議之至其辦法記者雖愚亦知多由各機關請授其勛

績不甚顯著者由政府開評勳會討論取決公議由銓叙局擬文製勳位證書由大總統授予卽由中央特授之勳位亦須評決非由政府擅授如謂燬宋酬勳則試問將來由何機關請授以事實上言之政府卽欲殺人亦不爲此拙計也

三月十四日應致洪應密寒電梁山匪魁又四處擾亂危險實甚已發緊急命令設法勦捕乞轉呈候示

按此似指宋發緊急命令勦捕又發自應是應爲造意者又謂轉呈候示是以己意先殺人而後請示以遺禍政府耳

三月十七日洪致應密統電寒電到債票特別准何日繳燬領票另電潤我若干今日復

債票之事記者詢之財政部確無其事至潤我若干四字就法律上觀之不過洪應勾結爲利而已

三月十八日洪致應川密電寒電應卽照辦三月十九日又致應電事可速行三月二十日應致洪川密號電二十四十分鐘所發急令已達到請先呈報三月二十一日應致洪川密個電諒悉匪魁已滅我軍一無傷亡堪慰望轉呈

按以上四電以意推之似指殺然不用應密而用川密則純爲洪應二人私電可知而乃云呈報轉呈等語稍爲可異然亦安知非預爲卸罪於政府地步乎記者近曾見趙詢及洪改川密之由乃有無呈報轉呈据趙云自始至終洪皆未使與聞是則殺宋一案洪應實爲造意犯無疑矣

以上各節皆就程應通電關於本案緊要各證據一一加以評論而不涉意氣感情之作用也夫洪應之出身若何其生平所交際者何人政府貿然不察乃畀以解散歡迎國會團共進會之重任此等無知人之明之政府固爲可責然使洪應函電往來謀殺一而遽指爲政府謀殺則今之人

一面與政府有關係一面又殺殺人者多矣皆諉其罪於政府天下豈有此理乎嗟乎藉端破壞之心不息則悠悠之口不止故述對於宋案證據之研究使國民各以良心鞠之

李烈鈞通電書後

(寓庸)

嗟夫自古桀黠不逞之徒欲達其擁兵負固之目的未有不託辭於大義矯飾爲恭順者也李懷光拒命於河中則以指斥盧杞爲辭劉從諫雄據於昭義則以保全宗族爲解聆其所言何莫非仁人君子之辭而其存心叵測有不恤言之相戾者今觀贛督李烈鈞致總統暨各都督通電情詞愷切肫然若掬誠以相示誰復敢謂其有他志者庸知其處心積慮乃有大謬不然者在袒護李督者方以此電爲藉口而力白其無他然試問梅光遠等呼籲之辭李國珍等質問之語豈皆市虎杯蛇以莫須有爲萋菲者耶汪瑞闔之抵贛而不敢收藉謂其爲贛民全體所反對雖然反對汪

瑞闔者固明明出自蔡銳霆陳延訓而並非贛民之公意夫蔡陳兩人能謂非李督麾下之將校乎以武人而干預長官之去留固已大悖憲法試問綰帥符者所司何事卽非陰謀授意而卽此不能制馭羣下固已背贛民公舉之初心倘他日更有重大於此舉者亦將委爲力不能制而付諸不覩不聞也耶若然則贛民何需此都督而李督又何辭以對我贛民他省軍隊而公然私自調遣增廣兵額爲參議院所否決而悍然抗違部令擅發徵兵私購軍械假託冬防屯兵要隘而通電之辭顧曰意在對外夫江西非邊省九江非海口對外之文將何國而發就令先事預防綢繆未雨而斷絕水陸交通又胡爲者以承平無事之時而忽然有丸泥塞關之舉動此熙來攘往之商旅豈皆潛師越境之軍人而防之乃如此其嚴耶反己自思應亦有啞然失笑者已不特此也凡贛人來往之電函至今尙一一加以詰察此徵諸虜滬贛人之報告蓋無不疾首而蹙頞者此豈盡

皆虛構之辭衛巫監謗秦禁偶語此惟周厲羸政之無道乃敢悍然出此稍重人道之專制君相決不敢行此苛律李烈鈞苟非別有用意何致如此周防誠不意號稱共和民政時代乃有此褫奪民間自由之酷法左袒者其能一一加之辯護也耶要之贛民之水深火熱蓋未有甚於斯時者政府而不亟圖援手哀我贛人其不難無遺育矣李烈鈞之外他省之大吏怙權恃虐其罪狀尙有倍蓰於李烈鈞者特其人能於表面上恭順政府政府亦易視之以爲其心無他故罪狀尙未發覺然此輩實視政府措置贛事之緩急以爲進退政府苟能揚赫怒之威討不庭而誅後至平一贛亂而天下之欲效尤者皆有所懾而不敢縱統一之績固不難日暮致之若堅持一相忍爲國之見而竟至惑彼甘言一李烈鈞獲售其欺而天下之李烈鈞皆將乘之而起子遺餘黎益復靡所控告亂事之勢乃真不可嚮邇也已嗚呼「美以南北猜嫌卒興戰禍德以南北聯結遂造雄邦」

聆其所言豈不廓然大公實獲我心而無如色取行違者流特工爲巧言以自文於人則欲其化去呀哇於己則無事不分畛域觀其通電之文前後千餘言而皆避實擊虛之語隴首清晨羌無故實於梅光遠李國珍所列舉者始終無一字之辨駁觀其遁辭所窮可知其無心悔禍矣政府猶不亟振國權吾不知亂象之所屆也

論亂黨之罪狀

(京報)

天禍中國發生亂黨釀成古今未有之奇變使我國商民顛連困苦不知所終往者已矣後患方長極黨亂之居心非犧牲全國以快其私不止滔天之禍將無已時願爲四萬萬國民垂涕而道之我國民亦知革命之何自起乎所謂偉人鉅子者大都貪暴之資非被斥於官吏卽見惡於鄉人窮無聊賴遁迹外洋習聞平等自由之說初未能窺其真諦假竊名義以愚惑國民思想簡單之青年易爲所動故和之者多時值清政不綱親貴

用事疑忌漢人政權歧出賄賂公行民怨其上故一聞革命之舉靡然從風辛亥八月武昌起事初非黨人之力而黨人輒攘以爲功彼時我商民之欣助黨人者以爲易專制爲共和則國利民福確有可信故茹痛一時捐棄生命財產而不惜詎知黨人得志惟以競爭權利爲陰賊險狠之圖集合議會運動選舉所費多至萬萬無一非爲把持政權實行專制之計而香港房屋上海地皮偉人資產之鉅遠過著名之豪富驕奢淫佚揮霍無度滴滴歸源何一非全國商民之膏血我商民因亂損失不可勝計全國破產比戶蕭然富者驟貧貧者垂斃以商民無窮之困苦易黨人無窮之權利彼此相形天下事之不平等不自由有如此哉中國多數人民喜靜惡擾使黨人貪天之功長享富貴我商民從此安居不聞兵革則亦吞聲忍受尙復何言詎知蛇蝎之心曾無饜足黨魁孫文當革命事起歸自海外以十七票舉得之臨時總統在南京組織政府號令不行顛倒錯亂

兵渙財匱岌岌不支幸而北方贊成共和清廷遜位孫文自知實力不足人心不附總統非袁莫屬於是陽盜甘讓之名陰爲徐圖之計故草定臨時約法束縛嚴酷務使行政方面失其能力遂得假法律以濟其姦藉國會以肆其毒牽掣政府遇事搗亂實則目的所在全爲覬覦正式總統因出全力以爭焉宋教仁平日輕視陳其美斥爲流氓其美憾之教仁自湘入京以組織政黨內閣自命其美於其過滬時令應夔丞買囑武士英暗殺教仁而反噬政府以激衆怒黃興李烈鈞柏文蔚等吠影吠聲同惡相濟遂爲二次革命之舉以重禍生靈商民困苦已達極點喘息未定何能堪此用是仇視亂黨恨入骨髓較諸辛亥年情形迥不相同亂黨失敗倉皇奔竄固由北軍之力而商民抵制萬衆一心實有氣吞亂黨之勢然而經此擾亂贛甯皖粵商民之損失又何可勝計此言之可爲痛心者也亂黨設計之最險毒者則爲勾結外人圖南北之分裂雖亡國滅種亦所不

顧自二次革命失敗以後各捲重貲鬻聚異域而密謀起事再圖擾亂之聲不絕於耳哀我商民日處危險之中各愛身家同具知識詎可任其蹂躪不自爲計惟有戮力同心對待亂黨父詔其子兄勉其弟使知正式政府成立各國一律承認建設時代正在今日休養生息民困可蘇惟有亂黨一日不除商民一日不安人人視亂黨爲仇敵爲虎狼凡有可以懲創者各致其力務使亂黨無容身中國之地即我商民今日應盡之義務亂黨利用知識未定之青年使之不顧家人不惜性命以爲流血之資料而彼則從未一經險境孫文以大言著黃興以善走稱受其愚者枉爲之死我商民亦知之否二次革命死亡無算而亂黨轉因以爲利席捲鉅資優游海外以廣東一省而論經亂黨豪奪巧取之款計達一萬閭閻生計剝削殆盡我商民亦知之否成則彼享其利敗則我罹其殃而彼仍不失其利彼因自巧我因自愚僕一商民之一所以力發其覆爲此嘵嘵者願我

四萬萬國民之勿再墮奸謀也

滬警痛言

(春華)

以千五百官兵防守之製造局率四五倍於官兵之亂黨以攻之至三四晝夜而不下夫亦不可以已乎初戰之夕炮聲隆隆居民從睡夢中驚起倉皇奔命爲炮火流彈所中傷者不知凡幾上海城內則遷徙一空潰匪時時剽竊之嗚呼吾輩何負於亂黨而必欲使我至於此乎

夫大亂之起也其始也由於一二人之陰謀之所積其繼也由於二二三宵小之乘機竅弄而禍患遂猝發而不可究詰矣然身受其痛苦者則惟我民如今茲上海一役其明徵矣違反民意以逞而必曰代表民意三四晝夜之惡戰驅無罪良民以殉其二三亂黨之意見曾是鄭重民意者而如是乎爲三數人之私利而使多數人民罹其禍患雖有大聲疾呼以人心之向背大勢之順逆警覺之而彼則怙惡自若悍然不顧又自若也嗚呼

共和奠定以來歲紀一週而暗潮往復接觸至今而益厲者在我國民亦何嘗不心識其人而乃欲託之民意以圖一逞也

此次之戰發難於贛蔓延於蘇而本埠之製造局則尤爲亂黨之所注意然當夫戰事之起也在官兵固有彼不加兵我不先繫之宣言官兵之所以爲此宣言者深知上海非戰地又雅不欲迫上海之居民於戰禍又未嘗不爲彼亂黨開一線之生路觀於二十一二之戰官兵則一意作守計即亂黨敗退亦不窮追非至無可如何之際不欲回擊惟彼亂黨則俱不之計必欲任情一逞至再至三之不已甚者且欲擾亂中外之公安以期同歸於盡其居心尤不可問矣

夫製造局官兵之所以必出於戰也謂防守之天職使然耳亂黨何仇於滬而必欲任情一逞至於如此乎故是役也假使亂黨不妄逞則官兵必不輕發官兵不輕發而此場戰禍可以免而滬地百萬生靈之財產又何

致遭此種之損失驚魂甫定還念數日來目之所見耳之所聞其痛苦之切於吾生與彼諸衆生者其慘狀爲何如願我國民其勿或忘也

嗚呼亂黨之毒我衆生亦甚矣武昌一隅騷動十餘次幸副總統戡亂未萌故禍雖屢發不致猖獗至中州白狼之禍已蔓延汝甯一帶聞亦係彼黨所主使下至湖南及河南等省火藥局之炸裂爲血光團等之所陷害者已見之官軍之文告矣跡彼等之所爲無非欲陷全國人民於恐慌之域而其勢有不造成中華匪國不止至此之謀則更毒焉東則煽動外蒙宗社黨以牽制官軍南下並勾結外人許以厚利以資助力故今茲上海之戰有某國軍艦擬駛入戰綫經英法兵艦發令阻止及亂兵潰敗檢有某國人屍數具（見本報一十六號滬警欄內）之舉由是言之不爲無因况衆口一詞言之鑿鑿也彼輩何德於外人而何仇於我國人如此耶且不佞更有說焉彼輩固託言討袁者也然試問袁果有罪袁果宜討是

有四萬萬之公意與四萬萬人公意組織之國會且即用兵力以聲討亦何致勾引外人下此種之毒手是則非討袁也直討我國人耳
中華民國之造成乃我四萬萬人公意之所構成而彼輩乃竊據之以爲己力有是理乎而一二不明事理之士夫猶不惜以其學問才智爲彼黨說詞焉記者誠不知死所敢以之告國人

論滬亂聲中宋案之真相

(觀棠)

滬上自宋案發現政客喧呶黨報羅織上自元首下及部員橫被嫌疑無以自剖當時記者自監腦靈推究事理於是發一問題爲(記者腦筋中漁父之刺客)篇中即武斷之曰刺宋者黃陳之陰謀而與政府無涉也斯論一出雖爲有識者所歆動而冥冥汶汶之徒與一般暴烈分子心有偏倚者或目笑存之且深訾議之心肝滿紙固尙無何等之價值也及記者省視兄疾羈連滬濱適值前年光復聲中轟轟姓字如陳黃李王偉大

新人物復連騎結駟出沒於奢場華界儼然前年九月十三之第二也曾不數日而城闔報紙間竟見有滬上討袁軍總司令之佈告矣意者軍稱討袁必聲厥罪罪惡之尤無過暗殺然則刺宋一案當然列入佈告之首斷斷無疑及取佈告熟而復之僅以北軍南下袁太逼人爲辭而宋案云云竟無一字記者此時已深幸政府之冤白而前言之微中矣然尙未知應犯之命運爲何若也不圖又越一日亟以此事詢之軍警中人叩其狀況則曰業由陳其美派人往釋縱之使去嗚呼噫嘻刺宋者果何人斯尙待再計耶記者回溯前論若以宗教家觀之蓋儼然預知者矣不然袁總統趙總理而果刺宋之主動也者則黃陳與宋號稱患難與共素有異姓骨肉之歡一旦因政治猜嫌猝遭繫刺割腹湔腸慘不忍覩雖罪人既得而顯戮猶延黃陳諸人方將太息痛恨於司法之委靡而英魂之抑塞也茲既號召黨徒推盪現局上海區域已在勢力範圍之內生殺予奪何求

不得應犯譬猶政府之鷹犬漁父譬猶同類之雉兔一旦悲雉兔之既死幸鷹犬之成擒報怨復仇難延寸晷乃一般羽毛儔輩對於殘暴之鷹犬曾不搏而殺之反縱而逸之可知昔日雉兔殺之者鷹犬而指縱鷹犬者仍雉兔中之雉兔而非豢養鷹犬者所主張也然則滬亂聲中之縱釋應犯一事政府之奇冤於以白而黃陳之陰謀亦於以破矣豈非不幸中之一大幸也哉

各省都督對於贛亂之態度觀

(何山)

頃者參議員韓玉辰輩本少數人之意思提出總統辭職平亂之議案其大旨謂贛省獨立皖甯粵閩相繼響應徒用武力則兵連禍結塗炭生靈南中興師問罪專在總統總統辭職即師出無名不待撻伐而自歸銷滅云云記者對於項城退位之問題前已著爲專論陳述理由力闢其主張之繆今茲建議之根據未有以超出前論之範圍自無再供討論之價值

吾人但當明認此宗議案不代表國民而代表國民黨相與一嘆置之耳獨其不辨順逆不計是非不明向背貧貧焉挾四省響應之聲勢謂即足以恫喝中央嗚呼名義則近似矣然其如事實之失真何吾人於此姑置辭職問題以待最後之解決獨先就其相繼響應之一語爲之力破餘地使不得高張黑幕以號召群醜而搖撼人心是則本論之宗旨也

夫南北戰事之結果從兩方面現狀斷之其優劣勝敗之數雖至愚者亦能言之彼議員者任其堅持黨見譁曲爲直轉敗爲功顛倒玄黃以爲亂人游說究何能以一手掩盡國人之耳目乎各省響應之動機發於該省之都督今試就二十三行省都督之態度言之謂贊成江西之獨立者占大多數乎抑反對江西之獨力者占大多數乎

道路傳聞有謂其將拆而附於宗社黨者相約以排去袁氏雖復帝政亦所甘心遊說之士方往來於南北其機已將成熟此等風說雖不能斷爲

實事然亦未敢信其必無何則叛徒之所爲保障共和本純屬欺人之語其目的惟在私黨之權利而已始之推倒清廷非求達其共和主義也爲攘奪權利計也今附和滿族非犧牲其共和主義也亦爲攘奪權利計也叛徒知二次革命不成苟政體如故則彼輩永無託足之所不若回復帝制以市恩於滿族猶有彼輩活動之餘地窮而出此夫又奚足怪耶吾今所欲正告於彼輩者辛亥之役吾民旣共建此共和民國於大地之上則極其全力以擁護之實爲獨一無二之天職吾民雖以喪亂之洊臻未嘗須臾蒙共和之幸福然其所以致亂者皆叛徒之罪而決非共和政體之罪吾民固不容二次革命之發生亦斷不容專制政體之復活有敢以動搖國本之議進者即爲吾四萬萬人之公敵人得而討之咄爾叛徒其勿輕於嘗試也

讀誅逆命令感言

(國民)

讀七月念二念三四等日命令將黃興陳其美李烈鈞柏文蔚陳炯明諸人之榮典職官一律褫奪並宣布罪狀懸賞緝拿逃聽之餘舉國稱快蓋彼等狼狽爲奸殘民以逞一般國民積恨已深今幸天褫其魄自賈罪戾大總統毅然討亂翦除民害故欣欣然喜色相告以爲豺虎已去吾儕小民將得安枕而臥也然陳黃柏李雖經褫緝而亂首孫文除撤退鐵路差委外罪名未得動職未銷漏網吞舟逍遙法外雖已爲民請命猶嫌除惡未周此吾人所以不能無憾於政府也在政府之意必以爲陳黃柏李叛逆昭然亂魁孫文實據未獲在彼則罪無可追在此則情尙可原律以古人罪疑唯輕之義吾人未嘗不爲政府諒然已使孫文笑汝拙矣夫此次叛亂柏文蔚陳其美李烈鈞陳炯明等之爲被動誰不知之黃興之爲主動孫文又爲主動之主動又誰不知之主動者與被動者之黃陳柏李旣已褫革通緝而主動中主動之孫文獨付缺如甯非輕重失衡乎夫叛亂

未起之數月前孫文已聯絡外人組織某公司約以接濟金錢（借一還三合同訂以一千萬元以湖南江西兩省路礦及諸種實業作報酬）供給軍餉而許以將來之厚報酬直欲使吾國步印度後塵以亡於英人印度公司之手比之張邦昌李克用之通外賣國罪實過之其罪一作亂伊始陳炯明尙存觀望而孫乃星馳回粵極力慫恿廣東獨立遂以宣告其罪二開辦鐵路未逾一載以辦路公司爲謀亂機關日聚叛徒以圖傾覆一事未辦浮支已達八十餘萬以吾民膏血之金錢爲亂黨運動之消費其罪三數月以前奔走海外大事聯絡并在哈爾濱購買戰械以爲今日之準備其罪四近聞湖南借外債巨款一千萬以資叛亂實由孫文爲之媒介其罪五叛黨今雖失敗各烏獸散而孫文猶函電交馳誣詆政府誑餌鄰邦蒙誘海外華僑煽惑國中人士力圖再舉務以傾覆國家而後已其罪六追原禍始爲罪之魁大總統不欲殲渠魁以奠國本肅亂源以蘇

民命斯亦已耳如其不然則叛逆顯著之孫文斷不能稍事姑容也夫對於黃興陳其美李烈鈞陳炯明柏文蔚諸人既用除惡務盡之手段而對於孫文獨事柔疑使得逍遙以從事於運動是欲除蔓而留其根欲止火而加以薪也甯有濟乎諺曰射人先射馬擒賊先擒王孫文不去則一陳其美李烈鈞陳炯明柏文蔚去而千百之陳其美李烈鈞陳炯明柏文蔚復來他日死灰復燃其爲禍更不堪設想矣故爲國本計爲民生計爲邦交計非將孫文罪狀宣布天下與國人共棄之不可

岑黃之後來觀

(陸海)

人之不以義合而以勢利合者其後每因勢利至於訾之怨之仇之嫉之自相殘殺之望其能知大義而得以善終也難矣頃聞江西叛軍奉岑春煊爲大元帥黃興爲總司令記者嘆曰岑素以知兵諫於世又性嗜殺以爲叛軍大元帥固宜黃之嗜殺與岑同而其兵事之經驗亦曾在陽夏時

小試其鋒以爲叛軍總司令非不稱職所惜者不能裁之以義而將來則決無良好結果耳今黃惟欲利用岑岑亦欲利用黃各因其勢利所在有不得不如此者故黃甘讓岑爲大元帥自爲總司令而不以爲嫌岑亦見黃以大元帥奉已故深自得意而不以爲疑稍間則勢利或有所變易而跋扈如黃者豈能久居岑下受其節制哉剛愎如岑者豈能降心從黃任其自爲哉語曰小人見利則爭見害則避吾不敢謂彼二人者與市俗小人同而其爭利避害之見蓋較小人更甚焉不然前次民軍起義黃率湘軍來鄂黎旣以總司令任之何以漢陽一失即奔往上海而以危如累卵之武昌委諸黎氏乎繼又何以謀鄂督故而思推倒黎氏以謀總統故而思推倒袁氏乎至不能推倒袁黎而思倡亂以洩其忿僥倖以遂其私又自恐資望太淺不足號召人衆乃借岑出而爲大元帥以助其燄而假其威此固不待智者而知也而岑顧不知者蓋因貪戀總統之狂熱至於心

昏頭暈目眩耳聾爲黃所愚耳岑之狂熱亦既至於此極則舍大總統一席外別無可以位置岑處其又何以處黃哉異日者黃果以此讓之岑而甘心焉則今者又何獨不可讓於袁而甘心焉且就前此革命之成績言微特岑不如袁而實並不如黃焉就現在總統之資格言微特岑不如袁而黃又實不如袁焉以此不度德不量力者復欲犧牲無數人民之財產生命拋擲無數人民之頭顱頸血爲彼爭得一大總統其得與不得甚未可必而其心之險且毒貪且殘也尙堪問哉心旣如此其險且毒貪且殘則彼二人者又安保其爾無我詐我無爾虞而不啓嫌疑哉况黃之於岑向非同盟亦非同志比之孫中山宋遜初兩人其親疎新舊之間蓋猶不可同日語也岑黃與孫與宋卒因意見不合致使一黨分爲二派今獨崇拜岑也如是則尤見其狡也詐也無非勢利之所見也天下豈有勢利之人對於勢利之人以勢力始而能不以勢力終者遙望金陵洪陽之故蹟

猶存劫灰未盡由過去而觀現在由現在而覩將來岑黃之必不能以善終也當在轉瞬間矣黃不足惜岑何其愚

論岑春煊之結果

(澄支)

贛亂發生倡之者李烈鈞主之者黃興也興以不得總統之故借題洩忿擅起叛師恐驟居元首未足掩國人之目服政黨之心故不惜屈已徇人舉岑三以自代而岑三亦遂龐然自大居之不疑一若亂黨之擁戴真附鳳攀龍不復有螳螂捕蟬雀捕螳螂之後慮者則亦有說蓋岑三項城均係滿清世胄其賦閒復爲欽差與項城被黜復升內閣出處歷史前後相符顧項城因革命成功隆隆日上岑三以君主推倒鬱鬱久居相形見絀因愧生忿因忿思逞迨亂黨觸其機關益勃勃然懷清失其鹿與項城共逐野心此爲總統積極之原因也法國革命七次拿破崙勳業獨高南北美血戰八年華盛頓名位始顯岑三當過渡時代附先進國驥尾爲北代

軍龍頭幸則如南北朝分立反抗中央不幸則借兵外人如石晉之稱兒皇帝孫皇帝雖辱沒國體荼毒國民亦在所不惜此爲總統消極之主義也且岑三好亂樂禍成第二天性陰知黃興以劉盆子韓林兒相待然自負前清時歷任封疆積有威望固無難收幕府舊人聯爲心腹餌軍中健將潛作爪牙俟團體健全勢力澎漲徐徐焉反客體爲主體玩弄黃興輩於股掌之上爲所欲爲直指顧問事耳詎料岑三事機未發項城先已預防官軍雲興賊勢風靡韓莊湖口先後失敗而兵單餉竭望湘粵各省之援濟呼應不靈恃參衆議員之調停運動無效未幾僞林師長冷師長俱敗矣未幾上海僞陳司令而逃矣即暴徒之黃興亦遁跡銷聲棄總司令而不顧矣想岑三悲觀滿目熱念冰消計惟有三十六着潛走香港如袁術行至壽春搥牀大叫嘔血數升耳昔北漢主劉崇哭謂僚佐曰孤自視是何天子汝等是何節度使今岑三被黃李捉鼻事敗名裂試捫心自問

是何大總統黃興是何總司令乎雖然岑三個人之成敗固無足研究獨怪夫甯粵各機關反對獨立後而湖南少數暴烈份子近且拾黃李殘局獨立不移是猶揚死盡之灰而復然蹈前覆之轍而不戒也詎不謬乎嗟嗟軍界同胞雖籍分南北統屬國民汝等或受賊迫脅或誤入牢籠胡不倒戈相向殲厥渠魁仗劍投誠共禦外侮去逆效順孰利孰害必有能辨之者不然岑三被舉爲大總統其旗旄導前衛卒擁後左顧問而右參謀固一時之雄也而今安在哉前事可師迷途未遠岑大總統結果猶如此然則爲總統以下之將校官僚亦胡爲始終從賊而不悔耶

爲亂黨與外人秘約事哀告國民

革命之事不得已而一行之國已不勝其敝若狃於往轍一而再再而三雖在安常無事之時猶將大傷國家之元氣歷數十百年而莫克回復若外憂方急羣雄方耽耽旁睨一味主張破壞者又開門揖盜引而嫖之舉

數千年相傳之國土悉拱手而讓之他人冀借其力以快一時之私憤此非病狂喪心別有肺腸者烏忍出此洶洶盛氣一往不復者尙靦然向人曰吾之所爲以救國也嗚呼全國國民何仇於彼乃必欲衆人所託命之國家一舉而斷送之以爲快乎贛事起旬有餘日矣其所揭褻之宗旨曰討袁袁之當討與否天下自有公論非可以一黨派少數人之意見擅自主張且國體既改共和一切重要問題自有正當機關爲之解決國法具在妄自與戎者內亂之罪萬無可逃一二野心之徒爲權利熱心所驅乘正式政府未及組織之初急發難端以求滿其獵富貴享尊榮之慾望不及旬日各地人民轉徙流離委填溝壑者已不可以數計此後盜賊蠶起軍隊專橫前年以來國民所飽嘗之慘劇又將一一重演即無外禍國且不國况據前日新聞報專電所載此次亂黨顯有引外援傾祖國情事電文簡畧內容無從深知但觀此寥寥數條則亂黨之蓄意賣國雖有儀秦

之辯亦不能爲之解免矣其一二三三條係求日助以餉械及認爲交戰團體據日政府之宣言彼之目的恐未必達第四條則引虎自噬此後滿蒙方面所受之損失皆彼之所主使凡愛護國土之國民均宜急起而聲討彼輩之罪也觀第五條則鼯鼠之技不過爾爾事不成外艦已泊港口往外一跑逍遙自在內地所受之苦痛當之者自有我良善之窮民耳僥倖事成滿蒙割讓與日俄兩國湘鄂贛粵租稅抵償戰費全國鐵道歸日俄二國指定建設嗚呼國民聽者以上三條副約其利害如何國民非盡盲目此而能忍則預備爲奴隸爲牛馬以俟他人之宰制鬻割而已矣而不然者盍且將此條約一詳審其利害憬然一謀所以自救之道也我國近年以來國事陵夷內患迭起瓜分之說屢經騰說而未即見諸事實者非有所憚於我也均勢之局定連雞之勢莫能俱飛莫爲之先憚爲戎首得不肖之徒引一二野心國與以特別利益滿蒙去二十二省之版宇隨

之俱去湘鄂贛粵租稅可以押抵各省租稅安能獨存全國鐵路授之外人其他利權亦豈能保我國民試瞑目一思此時中國成何等之國家彼輩之有身不知有國知有今日之快意不知有明日之痛苦吾不屑與之言豈全國之人其眼光之短腦筋之粗皆與彼輩等乎家必自毀而後人毀之國必自亡而後人亡之專制時代國之存亡繫於執政之少數人共和時代國之存亡繫於多數之國民殆哉岌岌乎其今日之時局乎我國民其醒乎否

附七月二十日新聞報專電

昨(十八)駐日汪代表來電探得亂黨與日密約如下

(一)求日協助軍餉子彈(二)求日兵輪餉入長江(三)求日向同盟聯盟認李軍爲交戰團(四)求日與俄進兵滿蒙以爲牽制(五)求日事敗派輪迎候事成報酬如下(一)以滿蒙割讓與二國(二)以湘鄂贛粵租

稅償還戰費（二二九二國建設指定之鐵路

湘事豈猶可再誤耶

（京報）

京報云湘中自前年反正所謂臨時政府皆暴民自行竊據或少數暴民迫脅譚督委任一班尸位鮮恥之徒其目的不外升官發財其手段無非攘奪敲詐其苞苴賄賂以多數入私囊以少數供奉偉人準偉人以鞏固其祿位分肥主義盛行而湘民不聊生矣此次作亂所謂多行不義必自斃也中央政府宜乘此機會掃蕩廓清乃忽聞國民黨中人竭力運動熊總理保全湘政府急在保留譚延闓作彼黨之傀儡以爲將來利用之地故於日前由長沙各界公舉代表赴鄂謁見黎副總統提出請願事項四端一湘省自獨立取消後叛徒均已遠颺請免查辦二湘省目前秩序安常請毋庸派駐軍隊轉滋驚擾三省議會對於此次獨立並非真意贊同請從寬免其解散四譚督維持秩序備費苦心輿情均爲悅服請暫免撤

換聞以上各項黎副總統頗有允許之意代向政府力言其各界代表係省議會代表賀學海教育會代表張登壽農業總會代表龔傳藻工商總會代表曾玉琴商會代表王聘莘云

又昨接湘函近日湘中各暴烈分子已紛紛逃去而盤踞湘城者類多該黨之羽翼日內四處運動挽留譚延闓冀保全舊政府希圖三次圖謀并聞國稅廳有仍用陳炳煥教育司仍用陳潤霖之說果爾則湘人永墮地獄矣特揭破二人穢史於次

陳炳煥當湘省反正時自命爲財政司徧布姻戚鄉人包辦全省釐局予取予求任陳之使怨聲載道疾首痛心湘人屢以炸彈賞之而彼重錢輕命盤據不去譚督明知其不勝任而不罷去之者一迫於勢（陳司財政供給黃興不啻黃之會計員也）一牽於情也（譚督與陳爲兒女親家）後陳見中央有組織國稅廳之令大施擇肥而食之手沒辭司長而謀廳

長史黃興迫譚督保薦果得是職未幾故態復萌現恐淘汰復賄人至京運動保全廳長真所謂患得患失無所不至也

陳潤霖借興學漁利以起家者也辦一楚怡小學每年撥公款至萬餘金猶名爲私立曾無絲毫報告可核吾不知世界各國有此年撥萬餘金之私立小學校否反正時陳自命爲教育司長率其楚怡小學之教職員全體移入教育司命爲科員陳學識淺陋性情褊急任事數月徒位置二三私人敗壞學風教育界全體反對迫彼辭職其庶務科員何某係陳私人侵蝕公款分肥與陳後經司中同事揭破現任教育司長唐君聯璧秉公查辦撤差追款司長分肥之發現蓋自陳始現陳聞唐將去職運動復任甚力夫其品行貪鄙固不足責但教育爲救國之本熊總理萬不可任此小人以污學界也

論孫文賣國之罪狀

(京報)

近日各西報有孫文致某國人書發現其大旨在求某國幫助破壞中國並開放市場以惠某國全國工商嗚乎此種謬妄之談是直欲奴我人民覆我邦國墟我土地滅我種族也吾同胞其亟起正告全國以共誅此賣國賊

孫文書中一則曰民黨再則曰民黨其實此兩字在吾國實無根據世界所謂民黨乃對政府黨言之謂爲平民謀權利也吾國古昔上下一體天視民視天聽民聽有虐民者覆亡隨之數千年來久成公例晚清時代孫文撫拾民黨名詞揭發譁衆又值清政不綱人心已去因訛襲謬一倡百和沿至辛亥遂告成功然一按彼輩之實際則攘奪權利也沒收人民財產也濫發公債票以爲私蓄也以江西廣東各省人民脂膏千百萬供黨用也發兌不換紙幣也黃興以寡人子而有數百萬之存儲孫文以一無賴而騙用華僑之款數千萬陳其美以長江巨竊而洋房大廈出入汽車

淫樂無度享用過於秦政楊廣而起視一般平民則因亂破產者比比也商業阻滯也死傷流徙寄生租界者日接於道也富者貧貧者或且爲盜匪自民國元年以至去年贛亂未平以前凡所有國民困苦瀕死之狀何一非彼孫文輩所賜也而猶曰民黨民黨其將誰欺不特此也吾國自封建世卿制度廢後平民政治實發生於歐西各國之先白徒卿相絕無限制故四民之中優秀者爲士下則爲農工商士之高者爲僚爲學生議員政客或鄉里之紳董皆不得以平民論若真正平民則其所持主義要不外求安靜求保守求不擾亂而已即間有貧而狠者雖甚至流爲盜匪然絕無所謂民黨故去年國民黨之口頭禪日日以代表民意爲辭須知吾國平民之意並非彼等之意蒙馬虎皮欺人自欺莫此爲甚而况自辛亥革命至去年贛甯大亂以後彼等盜賊真面昭然若揭再如今日之求助外人自亡宗國凡屬國民誰不共棄而猶曰民黨民黨是真無恥之尤矣

昔者魯公山不狃有言曰君子違不適仇國所託也則隱又曰人之行也不以所惡廢鄉彼時所謂國者不過封建時代各私其土地人民耳同是中國也然其界限之嚴已若此而孫文乃欲請某國協力破壞中國並許開放商場惠其全國工商是直陷我工商於死地而進人之工商於天堂也愛國者固如是乎人有怒於同室者謂其鄉隣曰吾家財產豐富昆季衆多吾有所不慊於彼等汝其入我室奪我財產殺我昆弟以泄我忿如是者非瘋狂即無心肝者耳乃孫文書中所言一則曰英區區三島其國力日加者以得印度大陸爲母國也再則曰某國地方發展已盡支那地大物博未經發展使某國得大市場於支那利且倍之云云充其用心所至是非直截了當請某國入主中國不可嗚呼亂中國者汝孫文也亂之不足必欲亡之自亡之不足而又欲貢獻之於人抉汝之心剖汝之腦吾不知秉有何種戾氣乃至於此語曰多行不義必自斃又曰千人所指無

病而死國法縱不汝及汝豈能自免耶吾國歷史上之漢奸如中行說之於匈奴劉整之於元趙全之於俺答喜寧之於也先千秋萬世皆唾罵之今孫文之於某國殆亦此類然其實際則其禍中國也要不能如昔日之烈蓋現在列強競峙凡所謂國際交涉莫不有一定方針一國發難則全球震動此牽彼掣絕無可以自由行動之理况孫文所持政策多屬夢想如二十萬里之鐵道五百萬之練兵大言無恥也非一日某國而欲資爲高麗之李完用也則發端本不自彼而度德量力恐非其時某國而力主維持世界平和也則自有一定之政策彼孫文又何能爲然則孫文此書適足爲自殺之具並以召天下人共殺之而已矣

論孫文致某國要人函之狂悖

(京報)

孫文之歷史世人固有目共見之矣或譏其圓滑或斥其誑騙或詳述其戕賊同黨脅取多金及在南洋種種穢迹顧此猶小節之不足論者也至

共和告成而借宋案以搖政府破借款以壞大局計無所逞則鼓吹二次革命不惜犧牲全國掬取一黨之權利黃興陳其美輩皆其鷹犬而發縱指示則孫文也顧謀逆不成則上書袁大總統聲明並不預謀其險滑狡詐誠不愧若輩之黨魁其擾亂吾民國之罪擢髮難數其人格實不足以污吾之筆墨吾意孫文且竄居荒島洗心滌慮以蓋前愆或慚對吾中華民國之父老而蹈海以死未始非良心之未盡漸滅乃至今而忽有孫文賣國之書發現於字林西報則雖不欲污吾筆墨而不可得何也孫文固口口聲聲以保全中國號召同黨者也而其蛇蠍之心至賣國而無所顧忌則不得不將其紕繆之言辭而闢之以告吾海內外愛國志士夫孫文函中之言字林西報斥爲幻想之奇文在日本定付之一笑無疑云云則固無駁斥之價值可知也雖然孫文向以愛國自命者也其要結黨徒誑詐南洋羣島及各國之華僑無不以此二字爲金字招牌今則以日日言

此真喪心病狂之瘦狗而已矣

又其函中大意將出賣其國以冀鄰國之援助其畔亂畔亂不可以爲名也而飾其詞曰重興革命又共和政體無革命之可言也於是架其辭於袁總統以謂控制全國之威信視前清爲遠遜又謂不諳遠東大勢夫自項城就任正式總統內地之秩序較之前年如何外交之信用較之前年如何各國報紙之評論與各國游歷來華瞻謁袁總統者其景仰贊美又如何而顧可以譎語寢詞以重欺天下之耳目竊恐三尺童子亦將笑其荒謬而已矣此又不足論者也雖然孫文之賣國也爲掬取其權利之計畫一函之中累累數千百言而其最注意者不過日中政府非操於民黨之手則中國永無甯日又重言之曰民黨苟不得志則中國必無安靖之日所謂民黨者亂黨也所謂不得志者中政府不操於亂黨之手則亂黨不能掬其權利於是乎遣派黨徒接濟白匪暗運軍火勾結盜賊以實其

必無安靖之言而又與中華全國爲公敵萬萬無戰勝之理則掬取權利之計畫終成幻泡遂不得已而出此賣國之策謂國可賣權利不可不掬取此其心肺之狼毒狗彘將不食之矣

惟是孫文以愛國之言牢籠同黨而且出其賣國之新主張平日假面目盡行揭露則同黨之受其欺或不免反唇以相譏觀其黨中鉅子發表孫文之函而加以評論謂觀孫文致某要人書而不禁大詫實與予懷抱絕對相反此後不能復追逐之矣云云是今後之亂黨或如東風解凍有一旦冰消之勢亦未始非吾中華民國之福然而孫文恃其詭譎之手段必且表白於伊亂黨機關報上而大書特書曰此函假使非孫某之函此必誣陷孫某發出之函將再售其奸於同黨以爲聯絡之計孫文孫文凶毒甚於虎狼奸猾甚於狐狸昔人謂王何之罪浮於桀紂吾謂孫文之罪浮於李自成張憲忠是又烏可以不言願海內外愛國之志士同鑒諸

駁孫文致某國人書

(京報)

孫文一廣東無賴子也海內外鼓惑煽亂近二十年嘗謂其種族革命主義不過借爲倡亂之導線其伎倆直同盜賊豈解共和豈知愛國近觀字林西報所載致某國人書其肺腸已路人皆見茲即其書分條痛駁並揭其前此罪狀以告我國人

書中所列數端意在假借外力爲亂國中先舉現政府之非以聳觀聽其言曰袁氏藉共和之名行暴君之政人民咨嗟怨望無術自雪專制且過於前清云云現在人民對於政府之設施自上年亂定始漸樂觀憂時志士慮紀綱之不振政權之當一者則有之未聞以整飭內政爲非者也其見於外論者如公論西報述英勃雷斯子爵之言曰民國議院時代政治直如兒戲袁總統重組政治悉合共和本旨譬如築欄護初栽之樹袁總統亦以之護少年中國耳察之內情既如彼徵諸外論復如此彼所謂專

制者直狂吠耳去歲南方亂起滬商會痛心疾首力倡維持卒驅叛賊於境外留一片乾淨土以還我國民各省商民莫不深明大義分地方官吏之責共保治安所謂咨嗟怨苦者果對政府抑屬亂黨公論具在豈容誣我良民又謂二年以來盜賊蠡起外報有袁氏無勦匪平亂之能力云云二年來匪亂之原因何在孫文果不自明其故耶自叛亡之後到處煽亂去冬大理之變叛兵皆奉孫黃等通電舉事並張貼偽示妄云獨立榆城繼之連陷十餘縣並分散新同盟會金牌今春豫皖匪亂凌鉞劉天猛劉承烈熊灌香奉孫黃命令授白狼以都督徽號竄憲民代表孫文賫書白匪介紹私購軍火民在溝壑城社爲墟誰之罪耶同時宜昌高惠之變誰實爲之謀反叛逆且設籌備處矣且大發偽印布告矣近來林西運動炸營之事洋字紅黑黨單何來分往津京招兵何人所使上海閘北拿獲亂黨之案並有孫文命令地圖前後亂事莫不及時戡定未聞重煩大軍稍

延歲月即白匪現亦勢窮力蹙授首在即政府果無平亂之能力乎孫文亂首偏曰盜賊蠡起政府無力平之亦乖絕矣茲更就外報徵之字林西報曰謀叛者國法所存惟有痛懲回視中國之危險始服袁總統堅忍智敏得出危而即安袁總統非不願寬大爲政蓋不如是反足阻太平之望孫文亦稍通英文字母者曾取此報一讀之乎

書中最要者在開放全國各部分之商業中心點以延納某國之工商界使之專利等語復引英得印度爲商場以證之此亡國奴所不忍出之言而孫文公然言之並云師旅之編制教育之振興實業之倡辦司法制度之改良皆將仰恃先進國法律教育軍隊非全國命脈之所繫耶斷送工商業之不足並斯三者亦讓與之印度之亡一公司而有餘希臘之亡文教尙存於世土爾其之將亡軍權尙爲本國人所柄推孫文之心視中國直印度希臘土爾其之不若矣使其祖宗墳墓供外人公園游讌之地妻

子孫仍儕外人奴斯狗馬之羣在孫文固所快心其如四萬萬神明之胃何哉

書中語尤險惡意存挑撥者有袁氏對於某國實懷仇敵之心某國政府毫無信任中國之意其言不僅中國人之所深惡亦各友邦之所痛絕者也法總統近以袁大總統秉國之勤交鄰之篤贈以大勳章國誼敦睦實爲全球所共見而日本加藤外相屢宣言對華政策維持和平澀澤男爵來華日本各報且頌揚袁總統之竭誠相待增進兩國之交親孫文爲此譏言徒自取辱於外人耳

余知此賣國書發現後舉國人民已盡欲滅此賊而朝食矣然或有都長之士引其奔走流亡之往事以相怨者余尙不能無餘言以告我國人孫文之爲叛逆固不自今日始其爲賣國賊亦不自今日始也當去歲亂事未起時孫文即倡言担任廣東方面和平解決之不成將起十萬匪徒橫

行天下陳胡之叛實服從之其死黨在蘇滬間佯言中國絕無真民主不如延外國政治大家入主中國之足以一勞永逸聞者駭之莫不曰三桂復生韓昌再世是時孫文且約集某國三數浪人欲定密約彼黨中且有默示反對者其天良漸滅非自有生以俱來蓋無此竊凶極惡者也孫文聽之加汝賊名尙爲人類恐誣我筆名汝禽獸則義禽仁獸代有所聞恐滋吾過汝直禽獸中所棄之敗羣者耳滅亡將不旋踵汝其待之



國民黨之回顧錄第七卷之目錄

盜名誑世之孫逸仙

外報論孫中山之千變萬化

日人之責國民黨

論黃興爲川粵漢鐵路總理

外人之國黨觀

英報論亂黨事之一

英報論亂黨事之二

陰謀與道德

西報闢南北之謬說

法報對於二次革命之評論

西報對於贛亂之評論一

西報對於贛亂之評論二

西報對於贛亂之評論三

贛亂觀

上海西人戰事觀

西報論亂黨之人物

英人之上海治安論

英報對於孫文函件之批評

盜名誑世之孫逸仙譯上海泰晤士報社論

邇來變化蟬蛻之種種事迹表暴赫赫偉人孫逸仙之真面目已無餘蘊所謂彼之真面目者卽如陽則指天誓日效忠輸誠於袁而陰實爲袁之死敵是也口是心非言行不相顧孫氏在今日誠可謂盜名誑世之大家矣試列舉之武昌革命起義孫氏自居爲發縱指示之人然據後來宣露之一切事實則知義旗之揭實出於偶然事前並無組織僥倖成功而孫逸仙則第利用此不期而值之機會廣吹法螺播其口說乘時崛起號於人曰吾固告汝如是矣今觀吾之所爲也一般以耳爲目之公衆遽受其欺以其自許之聲價許之卽記者當時亦不能免焉此無庸諱者也迨後就任金陵種種謬舉尤以賣唐紹儀之一事堪以垂世萬禩而吾人始恍然大悟其他多數之人亦恍然大悟蓋彼時始覺此次之命令不能措國家於自由之域轉將使國家受一般貪夫暴徒之蹂躪而爲彼曹爭

權逐利之場芸芸之衆脫離專制欣欣向榮乃觀於孫氏及其黨人所設施之法令制度則其專擅跋扈強取豪奪之狀較諸滿清不啻倍蓰也

孫氏自居爲老練之建設家世人亦共信其有此資格迨夫實地試驗則其腹中空空並無實際行政經畫之才調其底蘊乃赫然畢露矣蓋彼不過爲一般胆大氣粗之野心家之傀儡舉之升天欲乘風共起耳而孫氏至此亦自知材力不逮竊位之念不敢復萌彼既自問全無秉國之材乃又思攫一偉大而又溫和之愛國家之榮譽彼竊此隆名之法則舍棄彼所自知不能勝任之職位而以讓德高風動天下之觀聽是也退位之後則又假作熱誠謁力贊助彼爲時勢所驅卓然立於萬事之表之一人然彼之此項態度於其發軔之初卽顯其虛僞之真相蓋彼一面爲口頭之歌頌一面則於上海開辦一英字報紙該報開宗明義卽以攻擊傾陷袁之威權爲事一方則勸告孫氏與其國民黨之黨人再爲第二次救國之

偉業也

孫氏自居爲滿清之死敵又爲推倒清廷之功首然其往北京也則與滿洲王公大吏從容酬酢親睦逾恒甚至假託爲彼曹最摯愛之暱友

孫氏自居爲社會之主義之領袖以生活平均之義到處演說然彼則自受中央政府一種尸位素餐之俸給每月至三萬元之多孫氏又自居爲可以擔負全國鐵道計畫之一人然彼所繪畫之中國鐵路圖則異想天開其縱橫參互者全爲出於幻想而不能實行之路綫所有地理上之高山大河及在他人權利下之物或其他實質上之須研究者悉置諸不問不議之列

孫氏自居爲外國人民堅確不撓之摯友當有事時彼竭力爲外人謀保護然自彼返中國以來則時時密謀擯斥外國人之居中國重要位置者今國民黨中奔走疏附於孫氏之徒莫不限外人切齒其所以然之故則

但因外人張其巨眼炯察孫逸仙之大言無實耳孫氏今又自居爲對於五國借款憤憤不平之人且一面自稱爲和平之友一面則彼與彼之黨人正在準備一可怖之內亂忙迫異常所謂可怖之內亂者卽彼以潑辣之大胆通告各國謂大借款一結束卽將不免者也

總之孫逸仙者乃少年中國一完全盜名誑世之人今正播弄於世人之前彼之所作所爲斷然足以構造無窮之禍患非遏沮之不可也

外報論孫中山之千變萬化

日昨某西報有論孫中山文一篇題爲解剖孫逸仙文詞極有趣味特譯登之以供國人一粲蓋嘗遍覽當代人物至孫逸仙而欲觀止若黃興以無賴著若陳其美以陰險著若李烈鈞以狠悍著若胡漢民以潑辣著之數子者各自有所著可以表見獨至孫逸仙藏頭露尾鬼鬼祟祟忽而醫師忽而學士忽而譚兵忽而論道忽而鐵路銀行忽而手槍炸彈忽而

低心下氣忽而橫眉豎目忽而做總統忽而充強盜真如孫大聖一日萬變一變萬狀南天北斗五花八門光怪陸離不可測度外人諡之曰博士（言其萬能）國民尊之曰先生吾乃取博士之心先生之舌和以藥物爲之解剖

孫逸仙以往事績不足紀紀之徒污吾紙吾第取其最近在上海言行爲解剖材料五月二十三日下午孫逸仙先生在中英美三國協會演說國民黨五大宗旨由代表宣讀如下（一）南北統一不願第二次革命（二）地方自治而不反對中央集權（三）化除種族意見（四）增高國民生活程度開辦路礦實業爲救貧之計（五）維持國際和局與夫獎勵外國協資

以上所言如將孫氏前半歷史概行割去徒視此段文章儔不曰孫先生明達哉而無如前此言行既不可掩翻手爲雲覆手雨試就先生前後行

狀互相印證必有瞿然自失者先生自醫師起家以至革命成功二十餘年中先生之變化態度如孫悟空拔毫毛不可以數計始自去年歸後以迄今茲僅此一年六閱月中先生之態度言行吾人屈指計之蓋已六變方先生異域竄荒不復作生還想一旦武漢起義全國響應急遽歸來以十七票得伯理璽天德此時得意可想而知不料黃陳用事同黨相殘祭由寡人政則甯氏百僚莫予從也三軍莫予信也益以軍隊之複雜度支之奇絀日處窮鄉罔所爲計方知總統一席原不易做始幡然改計不如卸責求去既落得美名又博取鉅利且將臨時難局讓諸他人一俟正式就緒捲土重來蓋先生之計工先生之心苦矣是爲第一變迨夫項城受職百度維新另有一種尊嚴氣象與當時小朝廷假政府不同則又憬然悔悵然慕因悔生恨因慕生忌於是嗾使黃興陳其美王芝祥輩以軍界名義爲挾制地步多方煽動百計留難人徒見當時黃陳輩跋扈而不知黑幕

中有先生在也是爲第二變迨南軍挾制無效黃陳紛紛解職先生不得已輦金歸里以一窮光蛋驟作富家翁慰情聊勝於無當時京電屢促北上先生毅然勿理蓋未免有情誰能遺此胸中氣憤正自難消不料革命弟兄又來囉擾咸歸咎先生自甘退屈先生不得已捐所得中之三十五萬金濟之仍嘵嘵不休克強部下尤盛氣相侵謂吾儕出死入生才有今日汝一窮乞相海外竄逃毫無功績讓汝攬政僅僅三月功送程却吾儕飯碗因而攻擊不已先生亦憤然作色乃公革命元祖徒子徒孫敢猖狂乃爾於是意見日深水火愈甚因又幡然改計思借北方自重會京電又來張方案作先生力排羣議首先北上與卸職當時神情迥然大異是爲第三變入京後目覩北方勢盛項城雄才一時未易下手乃易其仇視之心爲媚事之計促膝譚心深相結納一面宣告自己不入政界十年以內總統非袁莫屬聞者咸疑先生慷當以慨一變曩時患得患失之神情

而不知先生處處設謀面面想到蓋深知自己境遇之孤不得不因勢利導內藉退讓之美名以攬人心外結政府之信用以博鉅款果哉中外報章爭頌先生讓德曾幾何時而籌辦鐵路全權之命下矣曾幾何時而月撥開辦費三萬兩之命下矣先生設計之工有如此者是爲第四變於是先生有錢有勢乃命駕東游樹國際上奧援會宋案出黨人大喜視爲奇貨先生星夕馳歸暫駐滬上初猶觀望繼漸強硬終乃攘臂而起自願帶兵北伐飛電馳檄促各省獨立復出其外交手腕馳電與丁義華與五國團與英國政府議會與歐洲各國君民報紙等歷數政府罪狀發揚蹈厲不可一世幾與前此判若兩人此一月以前事去今未久閱者諸君當能記憶今祇錄其一電以見梗概（卽五月二日致英國政府報館之電阻止各銀團交款）以上電文荒謬顛倒各國嗤之以鼻姑不置論而計算先生態度至此蓋五變矣變化至此技能俱窮將疑先生可以止矣而孰知

又有不然者一月以前南方藉宋案借款挾屍訛詐聲勢洶洶一月以來官民反對外人排斥政府亦赫然震怒叛黨內潰如鳥獸散先生大恐乃急電訴政府卸罪黨人自願出爲調人一面請少川西林鐵珊等作說客一面在上海宣布五大宗旨爲悔過投誠地步曰不願第二次革命曰不返對中央集權悔過耶欺人耶誰爲爲之孰令致之既有今日何必當初耶曰開辦路鑛實業先生十年鐵路計畫言之已久以十年二十萬里計今已半載當成萬里何以渺無影迹豈月領三萬兩尙不知足將另藉路鑛名目爲搜括羅掘計耶第五曰獎勵外國協資與一月以前反對借款背道而馳自欺欺人抑何顏厚昔非今是先生儼然又是一人矣是爲第六變嗚呼吾未見善變如先生者先生其胡蝶化身歟殆真得悟空衣鉢者諺云女子十八變先生偉人其變正未有艾吾人請得載筆以俟其後

日人之責國民黨

譯上海週報

國民黨對於宋案與借款二問題至爲憤慨非爲國家而然實由藉此以推倒袁氏而逞其自握政權之野心此彰彰然在人耳目間矣然吾人平日所望於該黨者誠厚間有風說每以爲齊東野人之語未敢盡信今觀該黨之態度頗令人疑其曖昧始知前說之不誣也先就借款言該黨藉以爲口實者略有三點一曰監督用途貽害國家二曰利息甚高三曰非經國會協贊有違約法以此之故該黨人羣起抗爭以爲此係亡國借款當必誓死破棄然今試舉此三點論之其一其二殆不成問題何也蓋財政紊亂與官吏貪婪本爲中國巨患而今日猶承其遺毒耶華人動輒以締造民國百政維新自誇若改良其民性終非一旦夕之故卽以近事例之昨年所借入之白耳義巨款消耗殆盡而不能說明其用途者非耶此銀團貸與巨款所以躊躇延宕又所以要求監督用途者也次論利息表面縱云五釐實收額不過八十四則其利率或甚高乃反對民國財政匪

特入不敷出乃並國庫空乏如洗外債積欠如山以若是之民國烏得望
低利於銀團哉且銀團投資民國斷非以其固有之資金惟將民國政府
所發行之債券售諸市場以其所得之價轉交中國而銀團於斯間牟其
剩餘之利耳世界資本家之對於民國既不置信於財政地位獨銀團又
焉能蔑視世界評價應以損己之條件歟藉曰萬事必持消極主義亟宜
勿借巨款如反對者所言然賠款之已過期者將何以償還乎軍餉之已
乏絕者又將何以措置乎故國民黨之反對借款其行爲殆有無意識但
其簽押果如該黨所云而政府不得參議院同意擅行借入似爲違法然
按其實際當時衆議院正副議長并未選定其於法律上兩院制之民國
議會尙未成立故政府行爲與約法固無所觸或謂延期數月待其國會
完成未必甚晚然借款承迭經失敗之餘障害續出若復延期數月又不
知有何阻碍橫生於其間故以急急勿失之手腕所以乘機簽押者固不

可深究也國民黨指借款爲買國券誇張言辭惑亂聽聞無他恐袁氏擁此巨款將以壓制該黨雖然據約法規定國家豫算與決算均須議會協贊此外更有審計院每當預算之中途必厲行檢查其適法與否若袁氏以借款充其違法費用此等機關當必依法攻擊至今日毫無何等事實之憑但由厲烈推想的杞憂妄爲痛叱煽亂構釁不已未免爲卑劣行動耳更就宋案言據一經宣佈之證據事類犯跡確鑿當認爲罪人者惟洪應一人耳至袁趙未嘗有何等之證據然國民黨機關報直指袁趙爲其主使極口讒謗無所底止孫黃二人雖未公然謾詈已默許黨報之言爲是是則孫黃亦以袁趙爲主使者也凡尊重他人之名譽士人之義務并有人焉已經豫審受有罪判決猶有上告餘地不可謂爲罪人况復袁趙迄未接法院之傳票而遽自爲殺人犯公載報紙嗚呼所謂政治家之行為乃若是之無行乎讒謗謾詈雖快於心其奈自戕黨德以致失人之同

情嗚呼何不思之甚竟至斯歟（下略）

論黃興爲川粵漢鐵路總理

譯英文楚報

局外者微觀之公言

粵漢鐵路經營於茲已三年矣而工程尙未及三分之一頗孤負同人向來之期望

政府今以川粵漢鐵路總理之職任命上將黃興夫爲鐵路總理者必深諳鐵路學及路工理財方能勝任快愉黃興豈其人哉吾聞黃興於鐵路學術實爲隔膜向不贊成借用外債而以善理財能勸捐爲已任其以公益向衆募捐從未惹起衝突黃氏旣非真實財政家又非鐵路熟手其能力但善於排難解紛持身謙抑而爲不知者所信仰耳數年前在西方稍提倡革命爲滿政府所疾視廣州之役以籌畫未能周密而致失敗同志皆死而被獨能保全及大革命之際統率民軍鎮守漢陽披其熱誠宣

言以死決戰然當事勢危急竟陰乘商輪逃赴滬上脫險而圖幸生冀享未來之富貴當時衆人以為彼果爲國捐軀也將覓忠骸於戰地而厚葬焉乃竟若此是手段欺詐已可知矣

黃之爲人如此在南京時何爲而尊重之在北京時又何以而尊重之其在湖南胡爲仍從而尊重之吾人思之蓋亦有故黃固湘人也民軍起義時初據長沙繼鎮漢陽迨夫危殆力不能支乃逃而之他衆人於是目爲英雄是迨彼具有殊特之能力也

袁大總統之負大才肩鉅任中外人士當然欽佩而黃氏行蹤所至亦歷受無識者歡迎其事實不可解此亦足覘中國人之程度矣孫逸仙博士熱心爲國孫武亦頗踴躍於國事政府授以重任實應爾爾黃氏果係鐵路熟手政府任爲總理亦固其所無如黃氏終非其人也袁黎二公所爲向未受衆反對而獨於此事吾人終未能贊同

夫以鐵路總理之如斯重要位置竟以授諸黃興實鐵路之不幸也意者黃氏其能辭絕萬國銀行借款耶方今蒙疆不靖黃氏嘗自請出征政府不許則重違其意許之又恐蹈廣州漢陽失敗之覆轍故於此時令其總理鐵路以免貽誤國耳

外人之國黨觀

譯中國公論西報

(景題)

共和國中最難解決之問題卽少數屈服於多數之下是否可與多數權商之問題是也此問題若揆之學理則幾毫無價值然從日用觀之則至爲重要且大有研究之價值在向使有二黨立於相對之地而少數黨之人數與多數黨相差無幾則多數黨必不敢以其勢力壓制少數彼此有權商之餘地而兩黨亦可收互相提携之效若使少數黨之人數與多數黨大相懸殊則彼黨之勢力必不厚在議院中惟爲他黨之陪臣而已彼勢力既不足復不願受人節制則其消極精神必至釀成一兩不相融之

弊而後已此則今日國民黨之情形也日前記者與國民黨中某黨員相談據云昔日國民黨大有勢力於中國今則日就凋落勢力遠不如昔日且黨中激烈分子目袁總統爲暴主謂帝制緣之而興遂不惜用種種之術以排斥之詆毀之使不復爲中國之總統記者聞之驚駭無似遂詳詢其所以然則曰彼激烈派必不使袁氏爲總統雖不幸而舉袁氏之數迴出其右彼亦必設法破壞之無論其選舉地在北京武昌南京上海廣東而彼破壞之手段則始終如一此次亂軍之興亦爲彼所主使其包藏禍心破壞國家之意不可不一究之

當亂軍之初興也囂囂然號於衆曰臨時總統違背憲法實則彼等自破壞憲法耳於總統何尤曷以知之以其欲破壞異日依憲法選舉之總統知之也嗟夫破壞憲法豈理所當然而法所應許者哉向使日作破壞共和違背憲法之舉奚以號召天下而爲萬民則人民由是而對於共和國

之精神與夫應具之責任皆茫然不知則國是有不動搖者乎不特此也苟彼等所否認之總統而爲才者智者則彼亦安能俯首貼耳而受其指揮一旦彼此相持則兵戎興而內亂起矣吾今敢正告亂黨曰反對當反對其政策而不當反對其個人苟其政策誠有害於國民爲天下所公認然後從而去之可也斷不如今反對者之所云云即可謂之反對也抑又有進者政治中之反對與夫國會中之反對亦必有反對之理在也彼等所據而反對者則謂總統當事事依憲法而行之一語蓋彼昧於臨時憲法之義不知臨時憲法固不詳備一遇意外其勢不得不略加更變而一見其舉動稍異則從而目之曰違法其井蛙之見亦大可笑也且復設法以阻撓正式選舉之成立蓋彼恐選舉之果不能如願而總統之位爲他人所得也吾無以名之惟謂之曰積不相能之激烈派而已彼激烈分子亦政黨之黨員也故爲彼之計莫如推廣彼黨之勢力以求

選舉之得手而阻袁氏爲總統皆以反對激烈之手段行於無形不亦休乎今則舍此而興內亂欲以兵力得之無乃大悖前國民黨員自述之言即此次叛亂之真相也記者今敢正告之曰此種叛亂非特見其愚抑亦大有禍於中國者也凡政客其慎之

英報論中國亂事之一

在歐報中議論中國近事有價值者莫如倫敦泰晤士報茲特譯其社說如下中國改革事業隨其民性及歷史演進彼其遺傳來源甚遠每當舊朝顛覆亂事必爲延長羣雄角逐流血遍地人民視此等爲一種之天災與水旱饑饉瘟疫無異以爲劫數無可逃避在歐人固不見慣而彼等則不足爲奇也前年大革命後人民憔悴不堪盜賊橫行善良失業此種現象每數十年或百年必一見中國人在歐所辦機關從未將此慘狀示人故歐人多爲所蔽以爲共和幸福實則全國均蹈於無政府之地位嘉德

君所著神龍消滅一書言之極詳僅有不知中國內情之理想家誤信中國入好時代興高采烈孫逸仙於清廷退位時曾宣言中國從此太平然歐人之稍有遠識及知中國經濟狀況者無不知革命結果乃將統治權破壞道德法律掃地殆盡僅有強大之行政權或能救正暴亂今則已大失望財政紊亂情形無論穩健派之所主張急進派之所主張均無解決之法而商工各業以及生命財產亦終無術以保障之此恐慌現已大著南北權利競爭卒以武力相見北方尙有幾分可以代表中國之舊國民性而南方則空洞無物並無政治問題及高尚理想可言其所爭者專爲位置僅可謂爲南方之新官僚與北方之舊官僚戰爭而已無論南北能有一大偉人強權專制鎮定擾亂速將秩序回復中國或尙可救否則入於慘酷震盪之漩渦亦如歷朝鼎革非有絕大殺戮人民死去大半各競爭者弱肉強食殆盡決不能有休息之時也南省舉岑春煊爲大總統其

人夙對民黨及改革事業無好感情彼爲滿清高官爲慈禧所寵信千九百七年曾任郵傳部尙書主以強硬政策對付浙江鐵路風潮前年四川反對鐵路國有岑爲清廷信賴以能殺人著名派往四川平亂是岑之性質乃爲守舊專制達於極點茲南方革黨舉之與袁相抗其爲個人權利不含政治意味尤爲鐵証岑亦未必與革黨同氣不過爲廣西人家族均在南方或爲革黨所脅且彼與袁有私恨亦欲借此報復遂挺而走險耳岑爲人有膽略頗得舊人信任彼既出而與袁爲敵則袁不能不危懼矣此時最要一著在視袁究有無勇敢之氣以與惡風潮相抵抗更須視其運命能否免革黨之暗算惟舉現勢論之於袁實有大利全國上中社會以及商工實業均皆傾心於袁大借款更與袁以勢力能令軍心鞏固就體幹及軍械均以北軍爲優其人多招集於山東河南遠非揚子江流域可及且中國之稍知外情者見列強既以大借款與袁勢如賽馬利於袁

勝袁之位置不穩則列強之博進全輸歐陸勢不得已必出於最後之干涉其對革黨決無好意况明知其萬無建設之能力乎袁氏真能始終不撓不爲調和派之曖昧局拘方法所誤堂堂正正以強力解決亂事則南方今日之騷擾未必非置中國於穩固之機兆不特無損反有大益則此南北大戰爭或將舊有之統治權恢復回法律之效力保社會之秩序在此一舉倘袁稍得勝利革黨將卽消滅現時中國輿論頗游移騎牆不敢爲正大之主張懼仇復之心最甚又震於無意識之民權論此皆北京無決絕之精神有以致之袁能示張勳黎元洪以心腹則革黨之敗決無疑義惟戰事必至慘烈孫黃決不退讓誠以北方勝利則附從孫黃者均將失勢自不能不生死以之袁或以利害之關係不得已再與革黨議和則中國將繼續戰爭永無已時今日此省獨立明日彼省反抗互相內鬩互相仇殺商業停歇財政紊亂全國歸於滅亡中國在五千年前亦曾陷此

境况然卒得出於險則以時勢不同彼時閉關不與外方接觸今則大不相同物質文明大進中國舊有之道德哲學不足以範圍之重以外債之巨決難需以歲月欲免中國破產舍中央速定內亂外無可幸免者也

英報論中國亂事之二

倫敦泰晤士報七月十九日著論略謂孫逸仙去年在南京謁明臨時宣言滿清退位永遠太平今僅共和二年試問中國情勢究如何乎陰雲鬱結迅雷大起南北之戰已不可避南方革黨不肯承認袁總統之權力公舉岑春煊爲臨時總統據本報之訪員專電則謂岑僅爲革軍之統帥而他報專電則稱岑寔舉爲總統南京並已成立政府云云自南北統一後各省與中央暗鬪原非一日袁總統此時無可游移或挺然爲全國負大責任以強力平此暴亂俾中國得免分崩或爲一身之利害計聽受革黨之侮辱不恤陷中國於無政府之慘境二者必居其一也北方軍隊約有

二萬餘人已到揚子江流域其大部分則紮武昌爲黎元洪所節制黎與袁頗能同心協力共圖國事此實一好現象南京以爲革黨所佔吳淞砲臺亦爲革軍所有黃興方渡江而北向津浦鐵路進攻其鋒甚銳袁已四面被困彼有多數精兵均已出防外蒙與俄交涉吃緊此時調入內地極不容易故革黨乘隙而發張勳一軍遂爲時勢上之重要人物當第一次革命時彼以孤軍扼守南京後至援窮糧絕卒能全師他去駐紮津浦綫上大爲世人驚歎袁統一南北張贊成共和與袁交最密必能爲出死力其人固血性男兒大有價值者也目前中國現勢全視各中堅人物之傾向張勳真能爲袁力戰乎黎元洪真能爲中央盡力乎此最重要問題其餘各省都督大多出於觀望以南北勝負爲轉移在歐若遇此種情勢成敗早可揣定惟在中國依違兩可之人太多殊不易於觀測也總之此次暴動決非出於民意乃爲政治家貪慾忌妬有以致之如岑春煊者無論

其爲革軍統帥或爲總統其以私怨與袁爲敵則無可疑至於黃興前此輿論過於推重至稱爲中國運命所繫之偉人似將來繼續袁而主宰中國者舍黃興將莫屬今觀最近舉動早已失其價值除黃興外若江西都督李烈鈞之類雖以彼之被黜致起二次革命寔則其人更不足道其價值又在黃興以下嗚乎年餘來盤根錯節各問題均當於此戰爭以解決之中央究能統一乎抑成各省聯邦乎以後政治能由北京爲主動乎或以嚴重之干涉政策令民間有生氣乎抑任聽少年黨虛無漂渺蠻野粗率本其萬不可行之理想而令全國支解漸滅乎或有一偉人出能以強力戡定大亂乎或任聽十人或數十人之野心家爭奪政權永無甯日乎是皆不可知也革黨諸人無愛國心本報敢斷言之彼等詆袁氏爲慘酷之魔王而乃舉岑春煊當岑平廣西匪亂歐人傳其飲人血剖人心卽黃興於革命時所用之慘酷手段亦爲講人道者所不忍見欲以安定中國

保障民權未必岑黃之能優勝於袁卽如論者所云袁之對待江西或有草率之處袁之對待廣東派或有不盡如法之處或有輕視南方之心以致引起分裂然在中國政界現在無論如何不能不承認袁爲當今惟一之人物欲阻止中國瓜分糜爛陷於不可收拾舍袁而外實難他求彼現尙在臨時總統地位故致中國大局飄搖不定此固國會延滯不肯速舉正式總統之過立法機關可鄙可笑之處不一而足彼議員者只知爲金錢計開會以來百事未理所亟亟爭論者爲議員之薪俸卒通過每員年金六千之巨額其餘國計民生重大問題原非議員之所注意也在外人意料中袁必被舉爲正式總統彼其能力早爲全國所公認此不過遲早之問題固非國會所終能留難者也

按此信由歐發寄時爲七月二十二號正亂事初起之後而泰晤士報著論則在七月十九號故其所言如此

陰謀與道德 字林西報社論

請看外人對於叛黨之評論一斑

針砭我國民之要言

本報武昌通信員續告近頃鄂亂情形細繹一過令人發生種種觀念今約略述之第一則鄂督黎元洪君近來頗遭奇妙不測之反對其事殊與副總統前此之所經歷者顯相矛盾是也溯武昌起義之始黎君絕不願爲民軍首領以與瑞澂爲難但爲衆所推舉迫不得已始允爲統率焉既經承認之後則盡力職務始終不貳肝胆皎然與人共見十八閱月以往黎氏爲革命中之英雄人人贊歎而今日則有罵之爲賊者何人情變幻如是之速耶本報通信員所晤之國民黨人某臆想黎氏爲愚拙吾則謂黎氏而果愚拙亦斷不若某臆測之甚蓋武昌亂事迭作有若惡疫之傳染使黎氏果愚拙者決不能一一撲滅之使亂黨大受創楚也又况黎氏

於省城改良事業盡力者已不少近來見於報紙之紀述者甚多此亦豈愚拙者所能爲耶彼以黎氏近日之捕殺亂黨奉以屠戶之惡名此直一乘機發揮之詭計而已黎氏於前此數次亂事其應付之方固豈出以寬大無如不獲善果亂黨謀畫反益劇烈則非用較嚴峻之法懲治不可矣矧試問假使叛亂果告成功者其殺人之數應得幾何無辜之血應流幾何彼論者何不推想及之耶黎氏之窮治亂黨正所以安善良之國民應得國人無量之感謝者也吾人思反對黎氏之故而不得今乃得之曰黎之罪大惡極者實以擁護袁總統故而其擁護之能力又異常有效故然則彼深惡痛絕袁總統者其真正原因又何在歟或以彼於戊戌變政時有不慊於人之處追念舊惡攻擊不遺餘力此誠可笑須知此已往之歷史當袁氏被推任爲中華民國總統時在理論上固已消滅於國人之腦海中矣自是以後仔細思之實不覺袁氏有若何明顯原因之過失開罪

於彼自推袁氏爲總統之人所有者祇彼曹詎詎攻訐之詞耳然此等攻訐在中國乃恒有之事亦殊覺平淡無奇也或謂袁氏未能表顯若干之行動使國會發生信任心此卽袁氏之失此言良是然責袁氏以偏私試問國會諸公果大公至正無一可責者乎此亦當平心論之者也蓋吾人返觀前此十五閱月之事實不能上懷一疑念曰彼仇視袁總統之真正原因與仇視黎副總統者同蓋以袁氏欲勉爲中國全國之福利計而行使其治權照事勢之當行者行之而不於事勢當行者以外別有所作爲以博衆人之驩心故也夫怏怏缺望之利祿家何國蔑有何時蔑有然彼曹之排斥袁氏吾姑優容之然獨不可解者則竟有荒謬絕倫之人儼然居於政界較高之地位者而自暴其衷曲謂寧願國家之統治於外人而不願統治於袁世凱也此非至怪大奇之事乎然而凡稔悉華人之性質者聞吾通信員所述此項言論固不必異常驚詫耳要之此等心理與共

和人物所詡詡自鳴之愛國心與大聲疾呼恢復主權之舉動實如風馬牛之不相及斷無可以相容之理總而言之中國人十分缺乏一種遵紀律守道義之知識此實華人性質根本上之弱點近有某君論之甚詳吾人默察華人日常之生活與共和成立以來之歷史良覺此論之確故中國之改革家于愛國心之真意味猶非致力研求不可若不能切依正軌步步進行必至一敗塗地而後已彼曹既不克制私欲以謀公共幸福又缺乏明白之建設思想而惟恣睢跳跟與尊嚴之權力爲難亦足見其器之小矣然而今日中國大局之前途則種因收果悉在人爲絲毫不能假借如論理學然中國目下必須裕財裕財則必興商興商則必須法律秩序然以此種理論與革命派人言則充耳不聞平和興盛之必要在彼輩直若無足重輕也者夫既非理可喻則惟有用強力迫其遵從耳懸念前途袁總統調停敷衍之策果足爲治國家最善之法乎抑終非用中國所

必需之政體不可乎此在今日尙難逆覩若論目前則總統與副總統之責任固遠過於彼空想家野心家所沾沾自畫者責任維何卽中國之平安是也

西報闢南北之謬說

(景瀨)

溯自辛亥起義旬月之間海內響應革命事業可謂告厥成功迨夫破壞將終建設伊始之際而分裂中國之說興焉考此說之來實由於孫文等所組織之南京臨時政府而起南京地當揚子之南大江中橫天然南北之界於是衆口一辭以爲南北之分刻不容緩此南北之說之所由來也嗣後國民黨遂奉之爲金科玉例設種種之術以動國民之觀聽初則欲建國都於南京一時輿論譁然爭論者久之既而北京政府成立遷都之說遂不果然南北分裂之見未嘗一日衰也於是囑其機關報日作南北啟釁之論同時復有日本報紙之助取南北之說言之至再至三甚者以

中國內政時事盡以南北二字加之以期挑起南北之惡感無如言雖多而無益於用計無所出遂謂南北之分乃就天然地形其荒謬說一時聲聞全球實則其無稽野談適足見其不學無術而爲天下所竊笑也

世界各國以地形論誰無南北誰無東西且時至今日疆域之說不過爲各國之政治區劃而已科學日新輪船鐵路電線通行各國惟交通之便利是求亦何有於東西何有於南北故試展視輿圖而覽各國之境界吾曹皆知其爲人爲而非天然况現今政治觀念日趨於世界的乎夫國境既爲人爲則必有爲之之人向使中國分爲數部或東西分之或南北分之或上下分之則必有分之之計畫在焉圖形在焉然計畫圖形皆人爲可一旦而擯除之非一成而不變者也

中國而分爲南北其果爲何有知之者乎其所以必就天然形勢而分之理有聞知者乎吾聞各國憲法多矣有憲法必就地理而定者乎吾聞宋

案之爭亦熟矣其利害曲直亦有關於地理者乎吾聞各種借款不謂不多矣亦有財政與地理何關係乎凡此種種與南北之分皆無絲毫之涉而多數政客盡謂此則實分南北之厲階吾誠不知其所指而云然也中國自共和成立以來南北分裂之說未嘗一日去之懷始則報紙相爭政客相議以口舌競今則揭竿而起以干戈相見矣嗚呼豈中國之福哉昔者美國南北之戰分爲南北相持不下亦曷故哉蓋北美禁蓄黑奴而南則否以南方天氣炎熱故多蓄黑奴使之種植木棉一旦禁奴則於農業大有響應故遂興兵戎以氣候而分則有之矣於地理則未也且美國南北之戰純爲人道起見固無與於地理一旦戰息則南北之見亦隨之泯矣今中國則既無道德政治之必要而分爲南北亦安用汲汲求分裂而自召滅亡哉今年五月袁總統爲本社記者曰中國固無南北之見惟政客之創說而已袁總統并未明言存南北之見之人然習聞中國時事

者類能道其姓氏今則此種政客盡揭竿而起作無謂之內亂復囂囂號於衆曰南北決裂矣仍欲以南北之說而達其分裂中國之目的噫亦可怪矣

孫文黃興輩吾曹知之熟矣其叛亂之意亦盡知之矣彼等生長南方遂號爲南人袁總統籍隸北方故目爲北人彼孫文等欲推倒袁氏其處心積慮已非一日適二人籍貫不同遂藉南北之說以達其志趣此南北之見之所由來而內亂之所爲起也

黨爭內亂各國之所忌中國共和初成未能和衷共濟先效同室操戈若不鏟除南北分裂之見則中國之亡可計日而待也

法報對於二次革命之評論

(漢聲)

贛事決裂後英字報紙屢有評論茲節譯法文報評論數則如左

一南京領袖所發革命文告最堪發噓者爲勸令外人嚴守中立一語彼

人口中所稱之外人吾人不知其果作何解至吾輩字典中之外人二字其定義爲（人民之屬他國者）此次亂事日本人援助甚力吾不知南京領袖之心目中亦視日本人爲外人否豈以日本人非外人而可不守中立乎其另一問題亂黨究以何時則吾輩外人即可不守中立豈以彼輩心存擾亂吾輩外人之商業即當中止利益即當犧牲乎記者今敢斷言曰中國今次革命并非多數人民之意見僅少數野心家之暴舉而已滿洲政府政治之腐敗已達極點此語誠然然彼尙時以償還外債爲念溯自革命告成政體改革共和二字外邦中無論爲立憲國爲專制國罔不歡迎之財政艱窘列強更貸以巨款使少年民國不致常陷於困艱之境乃不料借款方成而國中頓分兩派第一派大權在握方熱心改革他一派則因手無寸柄乃百端冀以推翻之吾人當此時機是否宜守中立實一問題也

二南北戰爭方烈揚子江流域風雲疊起殊堪注意吾人對於此次亂事可斷爲決非全國人民之義舉乃國民黨之暴動而已該黨圖亂之舉蓄謀已久不惜廣散金錢百端煽惑至近日乃公然稱戈目前戰事是否可速了與夫此次之結果究屬何若吾人尙不敢戀爲論斷惟目前最宜注意者爲日本人援助黃興軍隊一事此事日本人雖不敢公然爲之然前次孫文遊日與此事確有莫大之關係目前亂黨資財有限決不足以有爲至袁總統之資財與兵力在在可操勝算四處要隘均以忠誠自矢之軍隊守之觀其調遣軍隊四百人防守江南製造局卽足見一斑矣總之自民國肇建以來國民黨無日不思構亂竭力煽動軍隊乃成此次暴舉惟聞宗社黨已乘機在北方蠢然欲動中國少數之野心政客爲謀一己利益起見不惜糜爛全國使陷於內亂而轉令日本人及宗社黨有隙可乘試問於中國前途有何裨益乎

西報對於贛亂評論一

(時事)

日前太晤士報載有一論說云或謂江西之亂在中政府與國民黨兩方面皆故意釀成之國黨人之構亂已匪一日其機關報之託庇於租界者日以愚弄人民煽惑軍隊爲維一之職務迨政府知該黨之亂謀日亟不得不遣軍入贛而負固不服之李烈鈞輩遂揭竿而起卽以此爲聲討政府之資至贛省軍民之輕於從亂則國民黨報之愚弄煽惑與有力焉其在政府一方面則自審其力足以平贛亂而有餘萬一江西果入亂黨之陷竄胆敢反抗中央公然挑戰中央於是赫然震怒出其猛厲之手段爲盡法之懲治卽以平江西一省之亂者寒全國奸宄之胆而隱弭其圖謀不軌之心所謂殺一以儆百者是也或人之言如此要不無可採至以勝負之勢而言則袁總統對於此次亂謀籌備已久况又有黎副總統坐鎮武昌與袁氏同心戮力以策全國之治安吾知不轉瞬間而亂黨之勢瓦

解中國或因此而得數十年平治之福未可知也蓋袁氏秉性剛毅頗具遠識其今日所以爲中國計者頗類墨西哥之狄愛士墨國當久弱之後得狄愛士連任總統數十年而國家之榮譽復振袁氏殆庶幾焉國民黨人負黔驢之技自張其無聊之聲勢甚且謂海軍將士皆將從逆然以記者所聞則海軍中人僉以忠誠自矢決無有如若輩所言者也抑今日討袁軍之司令中有所謂黃興其人者非卽昔年陽夏之役望見北軍之旌旗而棄城以走者乎國民黨黨魁之中其大言炎炎狃於乘時竊柄之已事而一味以自私自利爲目的者此公實一時之上選跡其生平言行頗有類於江湖醫士之口述真方而手鬻假藥然而此公今日則又率其國人而墮於喋血之旋渦矣彼豈不以爲幸而事成則又將與外國銀行多開數次之往來而囊橐中之黃白物自益臻於充物卽不幸而兵戎失利則前敵之出入於槍林彈雨中而甘爲之替死者固大有人在彼遠在全

軍之後何難出其在陽夏時之故智作鴻飛之冥冥記者用敢大聲疾呼以警告南軍曰彼黃興陳其美李烈鈞孫文柏文蔚之徒雖嘗藉同胞之流血由貧賤而驟躋於富貴然初未嘗有將領之才識與資格而公等乃樂爲之馳驅乎而記者又敢大聲疾呼以警告中華之人民曰千九百一二年上海都督府之成績與夫南京臨時政府之設施其有愈於今日之北京政府者幾何而國人乃又從而附和之乎至黃興輩欲利用日本人對袁之夙怨冀藉其力以推翻政府則又睡夢中之夢語而已

西報對於贛亂之評論二

(時事)

贛亂既作附和者流輒盛誇南方之兵力謂可操必勝之券特華人中之較有責任者多不與若輩同意而對於袁總統則均有推戴之誠至以目前而言各方面正守候兩方之勝敗以定其去舍之方針則亦無可諱者雖然革黨既公然稱戈則最重要之兵旅軍火餉銀三者皆缺一而不可

革黨於此是否已有備而無患殊暗昧勿明第聞其今日有大宗之火藥自某所運至某所明日有大隊之軍人自某地開至某地而已至以資財一端而言則彼等固嘗求助於海峽殖民地與秘魯之華僑又嘗求助於上海之華商三處華人皆敬謝不遑除投資於實業一途外均不肯浪擲毫厘此則確鑿之事實而無可強辨者也彼等之計畫利在速戰當北方援師未抵之前一二戰而獲大勝則以爲長江下游一帶皆將聞風響應然以其所挾持之軍實觀之此願恐未易竟償也總之兩軍相遇捷在彼輩則亂禍將蔓延而未有已捷在北方則彼大言炎炎之革命軍固一轉瞬而瓦解冰消耳據徐州訪員報告謂徐州之北已起小戰夫以張勳所部之精悍跨兗州一帶之鐵路而張師其間彼黃興設非真有如雲之猛將爲之偏裨而願効前驅則浦口北上之師北京直將以無物視之而已抑革命之尤要者在於得多數人心之贊助昔日之義師爲全國人民所

歸附故滿清終至於傾覆若今日之事則國人方疾首痛心之不及而各界之傾向袁總統者亦甚衆彼討袁之檄雖列布其罪狀而此文致周內之辭終不足以掩其懷挾私見之實以祿位之被奪營謀之未遂而悻悻出此終無以自解於國人至以北軍入贛爲倡亂之藉口則尤使人一望而知其爲故設之機關嗚呼二次革命云乎哉特使各國見之慨然於若輩之終不能犧牲地方之見以謀全國之統一而已夫革命而果具有愛國心則列強自當嚴守中立若如此次所爲純被自私自利之心所鼓動則列強對之又安能狃於前此之政策而不一變也若夫借約既訂債券已發各國更不能不爲中國謀保護非欲代中國全信用也實各國自爲其政府全信用而已蓋債券發行於外洋乃由各國政府示人民以担保而後其民始樂於投資此等事實要不足以稍動構亂者之心則惟望中政府痛加若輩以懲創俾國事得一舉而定否則經濟困難之源將從此

而益深恐終須賴外人之援助而後亂源得底於肅清

西報對於贛亂之評論三

(文滙)

李烈鈞叛迹昭著已匪一日今果揭竿而起公然與國家宣戰矣據近頃所得之消息而觀兩方交綏其性質尙不甚劇烈惟以今日之時局而言苟有戰事卽爲中國之不幸初勿論其劇烈與否也彼倡亂之徒或狃於固執之成見或憤其利祿之驟失奔走道途百計構煽始則鼓吹於文字繼則運動於軍隊終則聯絡於種種之秘密會社聚羣不逞之徒以釀成今日之事變良友之忠告不之聽熟於歷史前例者之智慮不足勸務翔實而不尙虛矯者之常識不能動舉凡商界實業界之呼籲曾不足以稍致其矜憐嗚呼亂黨如此所可望者惟彼強有力之中央政府一舉而撲滅之固尙綽有餘裕耳李烈鈞爲留日學生之一其治贛成績昭然在人耳目無庸深論自解任之後曾來滬一行今則公然爲叛軍之領袖矣贛

中軍情若何外間尙無確信茲亦不必論獨是彼亂黨所藉爲起事之口實者不過曰政府遣軍入贛耳以此爲號召之資曾何異於英國之威廉西克思以一公司而起兵以抗政府乎蓋英政府以該公司臨近之地匪類橫行人民之生命財產瀕於危殆乃添設警察以資防衛該公司因是而移檄全國聲討中央其不度德不量力非足以動天下之駭笑乎江西毗連五省鄂皖在其北浙閩在其東廣東在其南湖南在其西邇來變故迭作最稱多事者爲鄂皖二省惟一省之向背全視其都督之順逆苟都督而能關懷大局不生異心則一省之人民亦決無有甘心從亂者是亦猶英國之康且（英國之稱省曰康且）其好亂與否悉繫乎總督之忠奸也嗚呼贛亂作矣吾人不能不深致其扼腕而冀肅清之早奏也

贛亂觀（文滙報社論）

冰譯

贛省之亂吾人旁觀推度有二困難或將其關係看得太重或將其關係

看得太輕厥弊維均也惟吾人深望其不至竟爲二次革命之起點良以中國林林總總僑僑其最先之希望厥維遵依恆軌安居樂業耳而二次革命既不得此大多數人之默認又不得實業界人之助力以供給戰費則亂事之幘積決不能推廣祇可局于暴動範圍旋起旋滅耳然自另一方面觀之則此次亂事似亦未可輕視如或人所謂此不過長江上遊一點騷亂者未免看事太易誠以據日來之外狀觀察關係頗非淺尠也總之括以最簡之一言此次亂事乃爲平和之破壞者夫破壞平和罪無可赦鮮有可以原宥之時今茲之事亦有可以原宥之理由乎則試略舉近來大局之情形而謀亂者之可恕不可恕曉然矣溯自前年革命告成民黨一面因絕無有經驗有才具之人負建設事業之資格堪以擔當大局故不得已承認敵人一面之首領爲此新國家之臨時元首此在當時蓋出於無可奈何縱孫逸仙君大公無私讓德可風而其左右近習中之公

心較弱者決非出於素願此可推測而知者然而不論彼輩之心曲如何要之經彼輩之承認而袁總統始得袁然當選爲民國之臨時總統此則不可掩之事實也既已推舉袁氏躋此高位則卽當恪誠贊助以共建大業然而彼輩是否曾爲此贊助則殊有難言者但聞彼輩於袁氏一舉一動莫不橫加攻擊謂其種種違法實則有等事件在今日大局之下不能不加以簡略之判斷須知今日正在過渡時代凡在過渡時代之人對於何事爲違法何事不違法實難確切斷定誠以行權達變爲過渡時代所不可少要而言之凡能維持法律秩序使憲法制度由是得以馴致者此堪謂之合法的行動也

在一般無個人野心無黨派意見之外人眼光中觀察覺袁總統之行動正爲時勢所完全許可者初未嘗有逾越範圍之處而一部分之華人則深致其不滿之意而某大政黨赫然負時重望勢力巍巍之某氏其思想

亦復迥不猶人彼於此曹怨望不馴之儔蓋不啻菓中之核焉此次贛省亂事彼決不聞而歎息不怡蓋斷然無疑也今所亟當問者此事果如何處置之乎夫袁 所持之共和主義與彼反對派所持之共和主義其間不同之點甚微斷無足以訴諸武力以爲解決之理由誠以目下苟言爲國家負責任其重心全在維持平和一方面即使此臨時總統有專斷之舉動（專指不合理之專斷舉動言若合理之專斷則在目下地位其所需之範圍正廣也）反對者亦決不至用武力爲解決之方蓋反對者固擁有權力可以彈劾此臨時總統可以迫其去任可以阻其再行被舉和平之手段正多奚必以干戈相見告故贛省此次之行動絕對的不得保障而中央政府則應得一切愛憐此顛顛中國之人協助用極強峻之方法以恢復秩序維持法律也

上海西人戰事觀

（顛）

自星期六工部局告示出後中西居民莫不稱之工部能以防衛爲己任其熱誠毅力有足多者此其故不可不一言之自叛軍攻製造局以還數日之間成效難覩日見其計窮力拙南旣不能得手遂欲以開北爲其根據地然試思之北軍能不追逐至此乎吾知其必至也於是乎有劃租界左近爲中立地之說然劃租界左近爲中立地則敗其北遷之策故此說所以難行而旋棄之也然聞北毗連租界一旦爲叛軍所據租界居民之生命財產能無慮乎且租界居民日求工部局以保衛爲責工部局之責亦重且大矣彼安能坐觀其危而拂民意哉故遂有前日之示告示中又有命軍事領袖等一律遷出租界北鄉否則必拘留懲罰云云吾知租界居民亦樂聞之今我亦不復述對於此事之私見彼叛黨亂徒已爲神人所共憤放逐而遠之衆人公意也亦何用余之喋喋哉至於宣告宜逐之人工部局之責吾曹毋用過問者也惟告示中對於處置叛黨

報紙之法未能言明爲可憾耳彼等當擾亂之始卽力求各邦嚴守中立今則一旦而掃其輿能無怒於心乎且際此言論龐雜之秋彼等發爲排外之論誠意中事苟如是則工部局不可不設法而爲之所也吾尙有一言爲工部局告則水兵登岸等事吾甚望其布置周密不至召恐慌爲要一以保衛商業爲念則幸甚

一星期以來無日不在砲火之中至星期六而戰事略息叛軍將收拾餘燼以爲孤注一擲乎抑自審力薄知難而退乎今尙不能以一言決意者或以西國水兵登陸而阻其進行乎或力求和議之成乎然和議成否尙未可知蓋上海不過受戰事之一隅則本地政府中人必無可以和議之力亦勢使然也頃據道途傳說有謂戰事將移往吳淞而政府亦有巡洋艦自芝罘南下之說然此皆忖度之言未可深信惟觀今各處叛黨勢力日蹙湖南宣告獨立不附叛黨湖北則黎副總統頗持堅定態度不至有

變江西叛軍已爲官軍困於九江浙江亦擁中央而排亂黨惟南京及津浦路一帶尙有叛軍蹤跡然已退至淮水以禦倪嗣冲軍隊由是可見叛黨勢力已拙且爲人民所嫉政府之勝已不待著龜矣此次亂平或者內憂外患得藉以稍戢中國前途庶有豸乎

西報論亂黨之人物

(襲冰)

舉世界之戰爭而一一寫其人物卷帙之浩繁殆汗牛充棟不能盡也寫之者又非具異常之學識而文章又足以副之不爲功要之一言以蔽之作戰爭之目的無非犧牲多數人之生命財產以博一二人之歡樂而已彼法蘭西之皇后嘗有一詡詡自誇之言曰此乃我之戰爭也而終致無窮之悔巴爾幹一年以來戰雲搶攘彼孟德尼哥國王尼古拉斯野心勃勃其意中所欲出者殆亦與法后同科克利米亞之戰爲歷史一大事而其一部分之起因則緣俄皇祇呼拿破崙爲好友而無他尊重稱謂之故

此讀史者所飡聞苟欲歷引此等陳迹縷指難窮最近則有所謂討袁軍者當其未實行發生之際彼中領袖效顰囂俄小說中戍軍之口吻藉黨報之行墨大聲疾呼曰民國矣共和危矣約法病矣實則民國也共和也約法也皆表面之文章其中僅包含一事曰推倒袁而已彼反對派之痛忌袁氏不欲袁大業之成功但欲其失敗於是牽之掣之阻撓之反抗之千方百計殊途同歸此其心曲人人共見旁觀者固早已憤憤不平矣數袁氏所得於彼敵黨之助力惟初任總統時口頭之贊頌實際上則絲毫無有也迨一二月以後則並此口頭之贊頌而無之於是彼黨黨報漸漸肆無忌憚言言亂吠如脫銜之馬愈馳愈狂若必欲其死敵覆敗而後已者至彼黨重要之領袖某某則藏身於隱蔽之地而縱容其徒黨之叫囂如是者歷若干時迨至羽毛漸豐運動漸熟視夫贊成彼黨宗旨之都督已有五六省矣李烈鈞已公然向政府及總統挑戰矣岑春煊則願自任

爲革命之大元帥矣巍巍乎黃興之權力則已弼中彪外大堪一試矣陳其美二次攻克製造局則可操左券而得矣如此好機會豈可放過於是黑幕一揭活劇登場如荼如火之討袁軍轟轟出矣其聲殷然試一研討袁軍之意義則其目的祇在摧毀一個之敵人使不爲我之障礙耳討袁討袁蓋欲糜其身粉其骨飄飄大旗高矗雲表其義非如是耶

雖然今則如何討袁軍討人者乃爲人所大討特討矣討袁軍所到處之無不大受撻伐今其殘兵敗卒困處南京之孤城奮鬪雖烈祇以無可逃之隙畏張勳之報仇耳然彼胆大氣豪之二大領袖何海鳴柏文蔚者不可不謂之勇於拒敵者道路風傳謂陳其美李烈鈞亦在甯垣果爾則二人亦不愧健者無論如何西方之人必表若干之同情良以西人對於勇敢之士必致其敬愛之意也苟若輩果堅貞強毅者在西人視之雖謂其應得戰勝亦無不可至於其他所謂偉人者一見危機將至立去如脫兔

遠逃異國苟全性命此等人物實不敢信其能再爲國家之大患若黃興若岑春煊若胡漢民與夫其他同一流人物他日脫能更仰首伸眉於國人之名脫能更得大羣華人之崇信而受其指揮則是吾人所賤視若糞土之人而華人則以爲猶有可賞識之價值矣然則華人之性質信爲吾西人所莫測矣嗚呼吾人目中已親見一惡獮之戰爭以賤土爲主動以金錢爲維繫此等賤士以一己之野心故不惜誘騙千萬人入於死途而彼則一有危險卽抱頭鼠竄而逃棄此等陷於水火之人於不顧嗚呼今茲之亂其人物之心術如是也是可爲永遠之鑑戒者也

英人之上海治安論

(時事)

倫敦泰晤士報上海通信略謂中國政治變幻極大現時社會心理已由破壞趨於保守與孫逸仙之言論頗相抵觸尤於少年黨所輸入之歐美社會主義絕不相容日內有一重要事件卽上海工部局取締租界內之

華字報是也工部局之職任原在保障秩序租界內爲中國法權所不及其責全在於工部局現時在滬外人均以少年黨舉動十分危險毫無服從秩序之性質更乏箇人自治之能力而報紙之言論自由復爲推波助瀾未免太過分際往年排滿論盛倡之時外人以種族觀念愛國熱忱極表歡迎有意爲之擁護直至革命起時外人無不贊美且甚誇其成功之速彼時觀念固與今日大相逕庭者也千九百三年時北京政府震於上海言論發達曾設法求租界取締報館並欲移交蘇報案盡力懲法而工部局力抗之宣言凡中國人住居租界以內納有工部局捐稅者無論如何概不交出必須中國政府能證明其爲私罪且經混合法庭判決始能照辦而蘇報案尤賴此宣言得以實現同時雖有多數主筆囚於西牢均係鼓吹亂事太過於租界之安甯秩序有碍且欲示以言論自由當有界限卽在歐西亦重排謗之律俾其知所警耳經大革命以後中國情形大

變往時外人致慨其全以老病癯廢之人用事現乃致慨其全以童豎狂且之人用事其害轉較前而益甚加以報館言論更鼓吹無秩序及擾亂暗殺種種罪惡軍隊尤易受其影響一動而不復靜始益信東方人種非以武斷專制萬無能爲治者矣此類無知少年自以爲共和之新世界當盡蔑棄孔教之精義爭以不道德爲能事有一種言論家在革命前夙以平和見稱者今亦變爲激烈且較他人加甚以求迎合社會並爲個人位置及利益計不得不趁時矣似此現相保守穩重之人將日減少破壞暴亂之人將日加多當孫逸仙辭職袁被舉之時依草附木之人頓至失其勢力乃百計以攻袁狂咀毒詈無所不用其極彼尙自命愛國在外人心目中視之實與病瘋狂者無異行將禍及全國吾英夙以排除人類中之危險分子爲己任者也其在印度英常以此盡力今中國之可恐怖者實較往時之印度尤甚因北京無真實之主權者不敢出以強腕大局必至

不可收拾不特外人代爲危懼卽中國人中之頭腦明白者見此趨勢無不人人自危南方各省商民前本力助革命現皆起而反對上海商會爲全國商人中之最有力者現已全體通電政府力斥黨人激烈舉動其他各項社會亦均有電告急彼等均知非中央政權強固不能拯全國於水火救工商實業於既敗也就此諸事觀之二次革命之舉不特全國決不贊成卽其濡染最深該黨所視爲根據地之上海亦不贊成則民意大可知矣工部局爲租界治安起見乃先警告各華字報不許再爲煽惑之言論凡館主訪事主筆印刷無論直接間接發表論說新聞圖畫於報紙足以煽惑聞聽者均當立刻逮捕並交法庭審判視其詞之輕重罰辦有差此項示諭以五月初一日宣布同日有公民大會演說各省獨立已較前爲和緩卽此可見工部局此舉大有效力滬人謠稱工部局乃爲袁所運動與大借款有密切之關係而孫逸仙及其黨人之有常識者則知實係

暴亂分子之舉動太逾分際已令外人厭惡盡失其從前之好感情乃反轉而助袁非有其他之關係須知革命黨本爲外人所重視乃既共和之後而尤密謀不已迫使工部局不能不行取締華字報館之法此在滿清時代政府百計運動而不得者今乃由外人自行決議中國人之稍知愛國者當如何太息痛恨也

英報對於孫文函件之批評

前據字林西報轉載孫文致日本某亞人一函已誌前報日昨英文京報著爲一論對於無信用之維新派大肆批評亦係爲該函而發茲特追譯於左

諺云給以長繩愚人行將自盡一語今續上海報載孫文致日本某重要人物函稱各節卽此之謂也若給孫文以長繩彼足迹至滬不出半月勢將自盡祇緣不給予長繩使其多造不可洗滌之惡果竟得卸責殊非中

國之福倘孫文總攬統治權半月之久則兩年以來禍亂相尋分裂之象何從發現耶孫文辭總統職後則其狂想澁弱之舉動外間絕少注意不以爲害無論其對於時事發抒意見如何荒謬亦鮮有膽敢披露者祇以孫文在中國未共和之前曾充總統兩月當時原無劇烈之戰爭然千萬無知國民奉若神明卽外人亦有信服者自孫文發表其六百萬磅鐵路練兵五百萬至千萬以期驅逐在蒙俄人以及不兌換紙幣等計畫後無知國民仍爲孫文之言是聽然中外達士聆悉其近來之行動斷不視爲有價值之人觀其致日本某要人之函則不得謂之爲政治家亦不得謂有愛國之思想者去歲亂黨起事外間咸疑孫文事前以東三省等處之權利運動日本政府求其公然協助摒棄此等利權無異將東三省（或福建省亦在其內）割讓日本然孫文近日行爲更有甚於此者按其致日本要人之函據云中國國民以大總統違背約法大爲憤激勢將革命

惟無外人協助難定收效之期擬請日本幫助若得強如日本之國贊助自可縮短收效之期日本幫助中國改良政治啓發利源中國當予日本以商業特別利益使日本總攬中國之商業以爲報酬云云

兩國政府本極輯睦若因少數亡命之輩之請求竟爾出而干涉希冀將友國政府推翻此非大謬耶孫文何不思之甚也日本若欲實行其緣須先尋隙與中國正式政府挑釁設使日本竟將中國政府推翻有改良政治及啓發利源之權本報之意日本必採用其對待高麗之故智則又何須給日本以工商特別利益耶斯時日本准可不待孫文之允許任意攫取而幻想家如孫文輩在日本範圍之下焉有立足之地以日人實事求是斷不容祇有理想社會派從中干涉也今日人祇願售大與孫黨向該黨要求權利並授以進行之策耳倘孫文係日本國民久已投諸囹圄或送瘋人院但孫係華人而願賣國故日本視爲上賓姑息作惡並准予圖

謀不軌以該國爲根據地耳想接收該函之日本要人亦疑孫文有神經之病若日本聽信孫文之言實行其議則英國政府持何態度如何舉動可不言而喻也

民國四年三月出版

民國四年三月發行

定價壹元貳角

編輯者

萃文社

印刷者

順記印刷所

發行所

萃文社

分售所

各大書局

